

NCHAA SÁ NĬ XINÍ TÉ JUÀÁ NDĬHĬ NCHAA SÁ NĬ TECÚ DÓHO-DĚ

Xítóhó Jesucrìstú xáhaⁿ-gă xii té Juàá nchaa nàcuáa cada-xi ñuyíú

¹ Te Yá Ndiöxí ní xáhaⁿ-gă xii Xítóhó Jesucrìstú nchaa sá tá cùyatni vií-nă cada-xi ñuyíú-a cuendá sá cǔñaha-gă xii cue tée xìnu cuechi núú-gă, te Xítóhó Jesucrìstú ní tendaha-gă ìⁿ espíritú xínú cuèchi núú-gă ní quixi-xi ní cachí tnúhu-xi nchaa tnúhu-áⁿ xii yúhú té Juàá tée xìnu cuechi núú-gă, te nchaa tnúhu-áⁿ ndéè núú tütú-a. ² Te yúhú càhí tnúhu ndáá-í xii-ndo nàcuáa ní cáháⁿ Yă Ndiöxí, te càháⁿ ndáá tucu-í cuendá Xítóhó Jesucrìstú, ndĬhĬ cuendá nchaa sá nĬ xiní-í.

³ Te váha táhú ñăyiu dàcuaha nchaa tnúhu ndéè núú tütú-a, te váha tucu táhú ñăyiu ndédóho, te váha tucu táhú nchaa ñăyiu tnĬ nacuáa càháⁿ-xi, chi sa ta cùyatni vií-nă nduu càda-xi nchaa nacuáa càháⁿ-xi.

Té Juàá cádǔha-dé tutú quíhĬⁿ ndaha ndi ùsá xichi cue ñăyiu ndècu ichi Yá Ndiöxí

⁴ Te yúhú té Juàá cádǔha-í tutú daquìxi-í ndi ùsá xichi núú ndécú nchòhó ñăyiu ndècu ichi Yá Ndiöxí ndécú dĭstrítú Àsiá. Te mee-gă ná chindee chitúu ñaha-gă xii-ndo, te ío váha cuu iní-ndó cùndecu-ndo. Te cuèi ndéè sanaha dĭu-ni-gá ndécú, te dĭu-ni-gá ndécú cuèi vitna, te ducaⁿ-ni

cùndecu-gá cuëi ndéé núú cuàháⁿ núú vëxi, te ðiu-ni ðucaⁿ ïo na çhìndee chitúu ñaha ndì usá cue espíritú ndécú núú-gã xii-ndo, te ïo váha cuu iní-ndó cùndecu-ndo. ⁵ Te ðiu-ni ðucaⁿ na càda tucu Xítohó Jesucristú, te ðiu-gã cúú-gã Yaá càháⁿ ndáá, te ðiu-ni-gá ní xíhí-gá te díhna-gá ní ndoto, te dǎtnùní ndéé cuèé-gá te ndoto cue ñáyiú ní xíhí, te ðiu-ni-gá táxí tnùnì-gá nchaa cue téé yìndaha ñaha xii ñáyiú ndècu ñuyíú-a. Te ïo cùu iní ñáhá-gã xii-o, te mee-gã ní sati níñí-gã te ní xíhí-gá núú cùrúxí sá cuèndá nchaa sá cuèhé sá dúhá quide-o, te ní ndada ndoo ní ndada nine-gá iní-ó, ⁶ te vitna ní quide ñaha-gã xii-o dàtná cue téé yìndaha ñáyiú, te ní quide ñaha tùcu-gã xii-o dàtná cue dútú xínú cuèchi-o núú Tǎtá-gã Dútú Ndiöxí. Te vitna nchaa-o çhí ná càchí-ó sǎ ïo càhnu cuu Xítohó Jesucristú, te ïo cùnuu-gã, te ðucaⁿ-ni na cùnuu-gã ni caa ni quíhíⁿ. Te ðucaⁿ na cùnduu.

⁷ ;Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiú ndècu ñuyíú-a quínì ñáhǎ-yu xii-gá, te tnàhá nchaa ñáyiú ïíⁿ-ni cùu ndìhì ñáyiú ní dánìcuèhé ñáhá xii-gá quínì ñáhǎ-yu, te nchaa ñáyiú xìndecu nihíí ñuyíú, ñáyiú ñá túú cùu váha iní ñáhá xii-gá ndíhú iní-yu òré quínì ñáhǎ-yu xii-gá, te ndáá sá dúcáⁿ càda-xi.

⁸ Te Yá Ndiöxí càchí-gá: “Yúhú ïo cùnuu-í chi ðiu-í sa ndècu ndéé cútnàhá ní ngáva ñuyíú, te ðiu-ni-í cundecu ndéé ná sáá nduu nàa-xi ndìhì nchaa sá ìó, chi yúhú cundecu-í ni caa ni quíhíⁿ”, duha càchí Yá Ndiöxí Yaá ndácú quide nchaandi túhú sá vǎha. Chi ðiu-ni-gá sa ndècu ndéé cútnàhá ní ngáva ñuyíú, te ðiu-ni-gá ndécú-gã vitna, te

ducaⁿ-ni cùndecu-gá ni caa ni quíhíⁿ.

Té Juàá ní xini-dé Xítohó Jesucristú Yáá ío cùnnuu

⁹ Te yúhú té Juàá té ndècu ndihi-ndo ichi Xítohó Jesucristú, tnàhá-í ndóhò-í cuèndá-gá dàtná ndóhò-ndó, te tnàhá-í nduu táhù-í cundecu ndihi ñaha-í xii-ndo núú ndécú Yá Ndiöxí táxí tnùní-gá. Te ío quide cahnu iní-ó cuèi nándi yáha-o ndècu-o sá cuèndá Xítohó Jesucristú. Te yúhú ní ngava-í vecaá ìⁿ ñúú nání Pătmós, te ñúú-áⁿ cáá xití ndute lámár. Te ducaⁿ ní cuu cuèndá sá càháⁿ-í tnúhu Yá Ndiöxí, te càháⁿ váha-í cuèndá Xítohó Jesucristú.

¹⁰ Te ìⁿ nduu ndumìngú nduu nàtacá-ó chìñuhu-o Yá Ndiöxí ní quide ñaha Espíritú-gá xii-í nàcuáa càchí iní-xi, te ní tecú dóho-í níhi ní càháⁿ ìⁿ sá ñí càháⁿ ndàa sátà-í te dàtná níhi càháⁿ ìⁿ cútú ducaⁿ níhi ní càháⁿ-xi. ¹¹ Te càchí sá càháⁿ-áⁿ:

—Yúhú sa ndècu-í ndéé cútnàhá ní ngáva ñuyíú, te diu-ni-í cundecu-í ndéé ná sàá nduu nà-xi ndihi nchaa sá ío, te chido tnùní-n ìⁿ núú tütú sá ná dènehé núú ñàhá-í xii-n, te daquihíⁿ-n tütú-áⁿ ndi úsá xichi núú xíndecu cue ñáyiú ndècu ichi Yá Ndiöxí xíndecu distritú Àsiá, ndaha ñáyiú ñúú Éfesú, ndaha ñáyiú ñúú Èsmirná, ndaha ñáyiú ñúú Pèrgamú, ndaha ñáyiú ñúú Tiàtirá, ndaha ñáyiú ñúú Sărdís, ndaha ñáyiú ñúú Filàdelfiá, ndaha ñáyiú ñúú Laodiceá, nchaa ñáyiú ñúú-áⁿ daquihíⁿ-n tütú-áⁿ ndahá-yu —càchí sá càháⁿ-áⁿ.

¹² Te ní nchócuñhu-í ndéhè-í núu ná cúú sá càháⁿ-áⁿ, te ní xini-í xínutnì úsá tnàhá sá ñí cuáha mee-ni dǐhúⁿ cuááⁿ sá ndéé dité-xi, te núú dité-xi-áⁿ yíndòdo ìⁿ caa candíl. ¹³ Te cuádava tnuú nchaa xíáⁿ ní xini-í nùtnì Yáá cáá dàtná cáá nchàa

nchoo ñáyiú ndècu ñuyíú-a, te ñihnu-gá ìḡ dóó cání cãa-xi ndéé núú sàhá-gá, te yìdúcúḡḡḡ ìḡ sìnchú ní cuáha mee-ni dǐhúḡ cuàáḡ pèchú-gá. ¹⁴ Te idi díquí-gã cuìxíḡ quiyí dàtná cuìxíḡ idi dava mběé, àdi yúhá sá quée èré quidé vǐxiḡ-xi, te tinùu-gá quidé-xí dàtná quidé-xí èré sàá itá ñuhú. ¹⁵ Te sáhá-gã súúní dātásáḡ-xi dàtná dātásáḡ sá nání bròncé èré càyú-xi ducaḡ dātásáḡ-xi sáhá-gã, te dõndaha tnúhu cãháḡ-gá quidé-xí dàtná quidé-xí dõndaha titní víhí yũte. ¹⁶ Te xio ndaha cùha-gá núndàha-gá úsá tnàhá chódíní, te mei yùhu-gá quéné ìḡ yuchí cáhnú ndéé úú xio núú-xi, te núú-gã quidé-xí dàtná quidé-xí núú nchǐcanchii èré súúní ngòyo cahni.

¹⁷ Te sá dúcáḡ cãa Yaá-áḡ ñǐ xiní-í ñũu xǐáḡ ní yùhú-í ní nduá-í núú-gã, te ní cuu-í dàtná ìḡ téé ní xíhí sá dúcáḡ ïo ní yùhú-í, dico mee-gã ní sacáḡ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yùhú sa ndècu-í ndéé cútnàhá ní ngáva ñuyíú, te ñiu-ni yùhú cundecu-í ndéé ná sàá nduu nàa-xi ndihí nchaa sá íó. ¹⁸ Te yùhú cùu-í Yaá ní xíhí te ní ndoto-í, te vitna ndècu vívù-í, te ducaḡ-ni cùndecu-í ñǐ caa ñǐ quíhíḡ. Te yùhú cúnùu-í núú nchàa ñáyiú ní xíhí te ñiu-ni-í cúnùu-í núú ndécũ-yu. ¹⁹ Te chido tnùnì-n nchàa sá ñǐ xiní-n-áḡ ìḡ núú tütú, ndihí nchaa nàcuáa cùu vitna, ndihí nchaa sá cádá-xí ndéé núú cuáháḡ núú vèxi-gá. ²⁰ Te na càhí tnúhu-í xii-n nàcuáa quèe-xi ndi usá chódíní ñǐ xiní-n yòtnḡ-í xio ndaha cùha-í, ndihí nàcuáa quèe-xi ndi usá sá ñǐ cuáha mee-ni dǐhúḡ cuàáḡ, sá ndéé dité-xi te yìndodo ìḡ caa candíl núú dité-xi-áḡ. Te ndi ùsá chódíní-ãḡ,

xíǎⁿ cúú-xí sǎ cútnùní iní-ó sǎ ndécú ũsá cue téé xínu cuechi núú Yǎ Ndiǒxí, te ndi ùsá cue téé-áⁿ ndécú-güedě ndi ùsá xichi núú ndécú ñǎyiu ndècu ichi Yá Ndiǒxí. Te cuendá ndi ùsá sá ndèé dité-xi-áⁿ, xíǎⁿ cúú-xí sǎ cútnùní iní-ó sǎ ndécú ũsá xichi ñǎyiu ndècu ichi Yá Ndiǒxí —duha càchí Yaa càháⁿ-áⁿ.

2

Tnúhu sá cúú-xí ñǎyiu xǐndecu ichi Yá Ndiǒxí ndécú ñùú Éfesú

¹ Te ní cachí tucu Yaa càháⁿ-áⁿ xii-í sá chídó tnùní-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú Yǎ Ndiǒxí ndécú ñùú Éfesú sá cúú-xí cuè ñǎyiu xǐndecu ichi-gá ndécú ñùú-áⁿ, te duha ní cachí-gá: “Yúhú cúú-í Yaa núndàha úsá chódíní xio ndaha cùha-í, te xìca cuu-í núú ndécú ndi usá sá ñǎ cuáha mee-ni díhúⁿ cuááⁿ, sá ndèé dité-xi te yǐndodo ìⁿ caa candíl núú dité-xi. ² Te yúhú xìní-í nchaa nàcuáa quide nchohó ñǎyiu xǐndecu ichi Yá Ndiǒxí ndécú ñùú Éfesú, te xìní-í sá ïo ndùcu ndee-ndo quide chiuⁿ-ndo cuendá-gá, te ío quide cahnu iní-ndó ndècu-ndo quide-ndo chiuⁿ-gá. Te xìní-í sá ñà túú tnàhí tnàhá iní-ndó nàcuáa quide nchaa ñǎyiu ndècu ichi cuehé ichi duha. Te xìní tucu-í sá xító ndèé-ndó cuè téé càchí sá ñǎ tendaha-í véxi càháⁿ tnúhu-í te ñá ndàá sá càháⁿ-güedé tnúhu-í, te ducaⁿ te cùtnuní iní-ndó sǎ ñǎ ndàá sá càháⁿ-güedé tnúhu-í. ³ Te xìní tucu-í sá ïo ndòho-ndo quide-ndo chiuⁿ cuendá-í, te ducaⁿ ïo quide cahnu iní-ndó cuèi nándi yǎha-ndo, te ñá túú cùu dusaⁿ-ndo quide-ndo chiuⁿ-áⁿ. ⁴ Dico ñá túú cùu váha iní-í chi nchòhó ñá túú-gǎ quidé-ndó dàtná ní xóo cada-ndo

cũtnàhá vitna cùu vii-ni ní sándáá iní ñáhá-ndó xii-í, chi vitna ñá túú-gă cùú iní ñáhá vihi-ndo datná ní xóo cada-ndo dàvâ-áⁿ. ⁵ Te chí dándàcu iní nàcuáa ní xóo cada-ndo cũtnàhá vitna cùu saa ní sándáá iní ñáhá-ndó xii-í, te ndixi cuéchi iní-ndó sã ñà túú-gă quidé vâha-ndo ndècu-ndo vitna, te nucuíta saa tucu-ndo cada-ndo datná ní xóo cada-ndo ndéé díhna. Te nchòhó cada iní-ndó sã ndécú ndih-ndo ìⁿ sá ñi cuáha mee-ni dǐhúⁿ cuááⁿ, sá ndéé dité-xi te yìndodo ìⁿ caa candíl núú dité-xi. Te núú vá ndíxí cuéchi iní-ndó nàcuáa quide-ndo ndecu-ndo ña, te quixi-í xocàni-í xǎⁿ, te ducaⁿ sãtnahá-xi cada ñaha-í xii-ndo te núú vá ndíxí cuéchi iní-ndó nàcuáa quide-ndo ndecu-ndo, te ducaⁿ te vá yõo-gá nàtacá chiñuhu ñaha xii-í ñuú-ndó. ⁶ Dico quide váha-ndo ìⁿ xichi chi dàquee tihú-ndó nchaa sã quidé cué ñáyiu cùu nicolaitás, te yúhú tnàhá-í dáquèe tihù-í nchaa sá quidé ñáyiu-áⁿ. ⁷ Te nchòhó cada cuèndá váha-ndo nàcuáa xãhaⁿ-í xii Espíritú Yá Ndiõxí xãhaⁿ-xi xii cue ñáyiu ndècu ichi-gá xĩndecu nchaa xichi. Te duha ndùu tnúhu xãhaⁿ-í xii Espíritú-gá xãhaⁿ-xi xii-yu: Cũñaha-n xii nchaa ñáyiu sá nõu na càda ndee iní-yu yáha-yu nándi sá ná yãha-yu sá cuèndá-í, te yúhú cada-í te nduu táhũ-yu cundecu váha-yu núú ndécú Yá Ndiõxí, duha cãhí Yaá cãháⁿ-áⁿ. Te nchaa tnúhu-áⁿ ñi chídó tnùní-í sá cùú-xí ñáyiu xĩndecu ichi Yá Ndiõxí ndécú ñuú Éfesú.

Tnúhu sá cùú-xí ñáyiu xĩndecu ichi Yá Ndiõxí ndécú ñuú Èsmirná

⁸ Te ní cachí tucu Yaá cãháⁿ-áⁿ xii-í sá chídó tnùní-í nchaa tnúhu sá vítná cãháⁿ-gá ìⁿ núú tütú,

te tendaha-ĩ quíhíⁿ ndaha tée xìnu cuechi núú Yă Ndiõxí ndécú ñúú Èsmirná sá cúú-xí cuè ñáyíu xĩndecu ichi-gá ndécú ñúú-áⁿ, te duha càchí-gá: “Yúhú ndécù-í ndéé cútnàhá ní ngáva ñuyíú, te ñu-ni-í cundecu-í ndéé ná sàá nduu nàa-xi ndíhi nchaa sá ìó, te ñu-ni-í ní xíhí te ní ndoto-í ndécù-í vitna. ⁹ Te yúhú xìní-í nchaa nàcuáa quide nchohó ñáyíu ndècu ichi Yă Ndiõxí ndécú ñúú Èsmirná. Te xìní-í sá ìo ndòho-ndo ndecu-ndo sá cuendá-í, te xìní tucu-í sá ìo ndàhú-ndó dico cùu-ndo ñáyíu xĩndecu váha núú Yă Ndiõxí. Te xìní tucu-í sá ìo càháⁿ cuèhé ñáyíu isràél cuendá-ndó, dico ñá túú quidé-yu nàcuáa tàú-yu cadá-yu sá cúũ-yu ñáyíu isràél, chi cùú-yu ñáyíu xìnu cuechi mee-ni núú sàcuíhná. ¹⁰ Dico nchòhó vá yùhú-ndó cuèi nándi cùu nchaa sá ná ndòho-ndo cuendá-í, chi sàcuíhná cada-xi te ngava dava-ndo vècaá, te ducaⁿ càda-xi chi cùní-xi coto ndéé ñáhá-xí xii-ndo núu ndisa sá vá ná tùhú iní-ndó sá nchìcúⁿ nihnu-ndo ìchi Yă Ndiõxí. Te ndòho-ndo ùxí nduu dico vá ñá ná ndèé-ndó càncicúⁿ nihnu-ni-ndo ìchi-gá cuèi na cùú-ndó sá cuendá-gá, te yúhú cada-í te nduu táhú-ndó cùndecu-ndo ndíhi-gá ni caa ni quíhíⁿ. ¹¹ Te nchaa nchòhó cada cuendá váha-ndo nàcuáa xăhaⁿ-ĩ xii Espíritú Yă Ndiõxí xăhaⁿ-xi xii cue ñáyíu ndècu ichi-gá xĩndecu nchaa xichi, te duha nduu tnúhu xăhaⁿ-ĩ xii Espíritú-gá xăhaⁿ-xi xii-yu: Cúñaha-n xii nchaa ñáyíu sá nùu na cùndee iní-yu yáha-yu nándi sá ná yăha-yu sá cuendá-í te vá cuíta nihnú-yu na sàá nduu cuíta nihnu nchaa dava-gá ñáyíu, duha xăhaⁿ-ĩ xii Espíritú-gá cúu-xi ñáyíu”, duha ní cachí Yaá càháⁿ-áⁿ. Te nchaa tnúhu-áⁿ ní chídó tnùn-í sá cúú-xí ñáyíu xĩndecu ichi Yă Ndiõxí

ndécú ñùú Èsmirná.

Tnúhu sá cúú-xí ñǎyiu xǐndecu ichi Yá Ndiöxí ndécú ñùú Përgamú

¹² Te ní cachí tucu Yaá cǎháⁿ-áⁿ xii-í sá chídó tnùn-í nchaa tnúhu sá vítná cǎháⁿ-gá ñⁿ núú tütú, te tendaha-ǎ quíhíⁿ ndaha téé xínu cuechi núú Yá Ndiöxí ndécú ñùú Përgamú sá cúú-xí cuè ñáyiu xǐndecu ichi-gá ndécú ñùú-áⁿ, te duha cǎchí-gá: “Yúhú cúú-í Yaá néhé ñⁿ yuchí cání te ndèé úú xio núú-xi. ¹³ Te yúhú xìn-í nchaa nàcuáa quide nchohó cue ñáyiu xǐndecu ichi Yá Ndiöxí ndécú ñùú Përgamú, te xìní tucu-í sá ndécú-ndó núú ïo cùnnu yucu ñávǎha, te ñá túú dàña ndeé-ndó nchìcúⁿ nihnu-ndo ìchi-í, te ducaⁿ ïo sàndáá iní ñáhá-ní-ndó xii-í, te ñiu-ni ducaⁿ ñⁿ quide-ndo cǔtnàhá ní sahani-güedé té Àntipás núú ndécú-ndó ñiu-ni núú dúcáⁿ ïo cùnnu yucu ñávǎha. Te ndí-áⁿ ñⁿ quide ndáá ndí ní xǐndecu ndí ichi-í chi ní cǎháⁿ váha ndí cuendá-í. ¹⁴ Dico ñá túú cùu váha iní-í cuendá ñⁿ úú sá quidé-ndó, chi ndècu ndíh-ndo ñáyiu nchìcúⁿ nihnu-ni nchaa nàcuáa ní cǎháⁿ ndí Balaám. Chi ndí-áⁿ ñà túú ní quide váha ndí chi ní dácáhú iní ndí ingá téé ní xínani Bálác nàcuáa cada-dé canu ichi-dé cue ñáyiu isràél ingá ichi sá ñà túú vǎha, chi ní xáhaⁿ tǎ Bálác-áⁿ xii-yu sá cǎxí-yu nchaa sá ndúú tǎhú nchaa sá ñⁿ cadúha cue téé ñuyíú-a dànani ñáyiu ndiöxí te ñá ndáá sá ndiöxí cúú-xí, te ní dácáhú iní ñáhá-dě xii-yu sá cùndécú-yu ichi dǎ iní. ¹⁵ Te ndècu ndíh tucu-ndo ñáyiu nchìcúⁿ nihnu sá dácuàha cue ñáyiu cùu nicolaitás. Te nchaa sá dácuàha ñáyiu-áⁿ dáquèe tíhù-í, ¹⁶ te nchòhó chí dándixi cuéchi iní sá ñà túú quide

váha-ndo ndècu-ndo, chi núu ñáhá te quixi-í nàá-í ndihí cue ñáyiú-áⁿ ndihí yuchí cání sǎ quéné yùhu-í. ¹⁷ Te nchaa nchòhó cada cuendá váha-ndo nàcuáa xǎhaⁿ-í xii Espíritú Yǎ Ndiǒxí xǎhaⁿ-xi xii cue ñáyiú ndècu ichi-gá xǐndecu nchaa xichi. Te duha ndùu tnúhu xǎhaⁿ-í xii Espíritú-gá xǎhaⁿ-xi xii-yu: Cúñaha-n xii nchaa ñáyiú sá nǔu na càda ndee iní-yu yáha-yu nándi sá ná yǎha-yu sá cuendá-í, te yúhú cuáñaha-í sá ndúú yùhu xií-yu caxí-yu ìⁿ sá vǎtá quíní-gá-yu caxí-yu. Te xiǎⁿ cúu-xí mànáá sá ñí xóo caxi cue ñáyiú ní xǐndecu ndéé sanaha, te cuáñaha tùcu-í ìⁿ caa yǔú cuìxíⁿ xií-yu, te núú yǔú-ǎⁿ cundeé ìⁿ diú saa. Te diú-áⁿ vǎ yǒo tnàhí xìní chi ìⁿdií díí-ni ñáyiú na quèheⁿ cuendá diú-áⁿ quíní-yu, duha xǎhaⁿ-í xii Espíritú-gá cúu-xi ñáyiú”, duha càhí Yaá càháⁿ-áⁿ. Te nchaa tnúhu-áⁿ ñí chídó tnùn-í sá cúu-xí ñáyiú xǐndecu ichi Yá Ndiǒxí ndécú ñùú Pèrgamú.

Tnúhu sá cúu-xí cuè ñáyiú xǐndecu ichi Yá Ndiǒxí ndécú ñùú Tiàtirá

¹⁸ Te ní cachí tucu Yaá càháⁿ-áⁿ xii-í sá chídó tnùn-í nchaa tnúhu sá vítná càháⁿ-gá ìⁿ núú tùtú, te tendaha-í quíhíⁿ ndaha tǎe xìnu cuechi núú Yǎ Ndiǒxí ndécú ñùú Tiàtirá sá cúu-xí cuè ñáyiú xǐndecu ichi-gá ndécú ñùú-áⁿ, te duha càhí-gá: “Yúhú cúu-í Déhe Yá Ndiǒxí, te càa tinuu-í dàtná cáá ìtá ñuhú, te sáhà-í cáá dàtná cáá sǎ nání bròncé òré ñuhú-xí nǔú ñuhú càyú-xi. ¹⁹ Te yúhú xìn-í nchaa nàcuáa quide nchohó ñáyiú xǐndecu ichi Yá Ndiǒxí ndécú ñùú Tiàtirá. Te xìn-í tucu-í sá ìo cùu iní-ndó Yá Ndiǒxí te sàndáá iní-ndó-gǎ. Te xìn-í tucu-í nàcuáa ndùu chiuⁿ quide-ndo sá cúu-xí-gǎ. Te xìn-í tucu-í sá ìo quide cahnu iní-ndó

cuèi nándi cùu sá yăha-ndo ndècu-ndo. Te xìní tucu-í sá ïo-gá ndúcú ndèe-ndo quide váha-ndo vitna dacúxí cŭtnàhá vitna cùu saa ní sándáá iní-ndó Yă Ndiöxí. ²⁰ Dico ñá túú cùu váha iní-í cuèndá ìⁿ sá quidé-ndó, chi ñá túú tnàhí ná sání iní-ndó ndècu ndihi-ni-ndo ñáyiú nchicúⁿ nihnu nchaa nàcuáa dānehé ñáhá ñàha nani Jezabél. Te ñaha-áⁿ cāchí-aⁿ sá cāháⁿ-aⁿ tnúhu Yá Ndiöxí dico ñá ndáá sá cāháⁿ-aⁿ tnúhu-gá, te cuáháⁿ-aⁿ dāndahú-aⁿ nchaa ñáyiú xīnu cuechi núu-í ndihi nchaa sá dānehé ñáhá-áⁿ cuèndá cundecú-yu ichi dīí ìní, te caxí-yu nchaa sá ndúú tǎhú nchaa sá nǐ cadúha cue téé ñuyíú-a dānani ñáyiú ndiöxí te ñá ndáá sá ndiöxí cúú nchaa xǐⁿ. ²¹ Te ní cuu vǎi nduu ta dacaca-í ndécú-áⁿ cuèndá ndixi cuéchi iní-aⁿ sá ñá túú quide váha-aⁿ ndècu-aⁿ, te cuèi ducaⁿ quide-í dico ñá túú cuiní-aⁿ dañ-a-aⁿ nǐ ìⁿ sá cuéhé sá dúhá quide-aⁿ. ²² Te vitna yúhú ío dandòho-í-aⁿ chi tñi ñaha cuéhé xii-aⁿ, te ñiú-ni ducaⁿ ïo dandòho-í nchaa ñáyiú quide datná quidé-áⁿ te núu vá ndíxí cuéchi iní-yu sá ñá túú quide váha-yu ndécú-yu, te dàñá-yu nchaa sá cuéhé sá dúhá quidé-yu. ²³ Te nchaa ñáyiú cùndihi ñaha xii ñaha-áⁿ cahni-í-yu, te ducaⁿ te nchòhó ndihi dava-gá nchaa ñáyiú xīndecu ichi Yá Ndiöxí ndécú nchaa xichi cutnuni iní-ndó ndihi-yu sá yǔhú cúu-í Yaá xìní ndáá nchaa nàcuáa sàni iní ñáyiú, ndihi nchaa nàcuáa quide-xi iní-yu. Te nchòhó nàcuáa ndùu sá quidé-ndó ìⁿ ìⁿ-ndo te ducaⁿ cùnduu sá táxi-í nduu táhú-ndó. ²⁴ Te dava nchòhó ñáyiú ndècu ñuú Tiàtirá, ñáyiú ñá túú nchicúⁿ nihnu nàcuáa dānehé ñáhá ñàha nani Jezabél-áⁿ ñá túú xìní-ndó nǎ cúú sá cāchí ñáyiú ndùu yuhu dcahu iní ñáhá yùcu ñávàha. Te nchòhó, ñá túú nǎgá cachí tnúhu-í xii-ndo càda-ndo

25 diu-ná sá ïo nducu ndèe-ndo cada-ndo nchaa nacuáa càháⁿ tnúhu sá ndécú ndìhi-ndo, te ducaⁿ-ni càda-ndo ndéé òré quixi tucu-í. 26 Te nchaa nchòhó ñáyiú na càda ndee iní yáha nándi sá ná yáha sá cuèndá-í, te núu na càda-ni-ndo nchaa nacuáa cuìní-í cada-ndo ndéé nduu vǎ cùndecu-gá-ndó ñùyíú-a, te yúhú taxi-í tnúhu ndee iní xii-ndo sǎ táxi tnùn-í-ndó nchàa ñáyiú ñuyíú 27 dàtná ní quide mee Tǎtà-í Dútú Ndiöxí ní taxi-gá tnúhu ndee iní ndécú ndìhi-í, te ducaⁿ càda ñaha-í xii-ndo tàxi-í tnúhu ndee iní xii-ndo cuèndá ío taxi tnùn-í-ndó, te cada iní-ndó sǎ cádá-ndó cuè ñáyiú dàtná quidé-xí ìⁿ quídi òré tǎhú-xi càchi duuⁿ-xi, te ducaⁿ chi nchòhó cada-ndo sǎ ncháá ñáyiú ñá túú quide váha cuíta nihnú-yu. 28 Te cada iní-ndó sǎ dàtná dáyèhé chódíní quiti quène oré sa ta tǔndaá-nǎ cuáháⁿ ducaⁿ càda-xi oré ná sàá nduu ngǔita-xi cada váha-xi, te ducaⁿ chi yúhú cada-í nàcuáa nduu tǎhú-ndó cùndecu ndìhi ñaha-ndo xii-í núú ïo váha càa ndecu-í. 29 Te nchaa nchòhó cada cuèndá váha-ndo nàcuáa xǎhaⁿ-í xii Espíritú Yǎ Ndiöxí xǎhaⁿ-xi xii cue ñáyiú ndècu ichi-gá xǐndecu nchaa xichi”, duha càchí Yaá càháⁿ-án. Te nchaa tnúhu-án ní chídó tnùn-í-í sá cúú-xí ñáyiú xǐndecu ichi Yá Ndiöxí ndécú ñùú Tiàtirá.

3

Tnúhu sá cúú-xí ñáyiú xǐndecu ichi Yá Ndiöxí ndécú ñùú Sǎrdís

1 Te ní cachí tucu Yaá càháⁿ-án xii-í sá chídó tnùn-í-í nchaa tnúhu sá vítná càháⁿ-gá ìⁿ núú tǔtú, te tendaha-í quíhíⁿ ndaha tée xǐnu cuechi núú Yǎ Ndiöxí ndécú ñùú Sǎrdís sá cúú-xí cuè ñáyiú

xĩndecu ichi-gá ndécú ñùú-áⁿ te duha càchí-gá: “Yúhú cúù-í Yáá ndécú ndìhi ndi usá espíritú cúú cuendá Yă Ndiöxí, te ñu-ni-í cúù-í Yáá ndécú ndìhi ndi usá chódíní. Te yúhú xíní-í nchaa nàcuáa quide nchohó ñáyiú xĩndecu ichi Yá Ndiöxí ndécú ñùú Sărdís, te xíní-í sá cúú-ndó dàtná ñáyiú ní xihí cuèi càchí ñáyiú sá ñăhá. ² Te chí cuăha cuendá nàcuáa quide-ndo ndecu-ndo vitna, te nducu ndèe-ndo cada-ndo ìⁿ úú-gá nchaa sá văha nchícúⁿ nihnu-ndo vitna, chi sa ndètu vií-nă dañ-a-ndo nchàa-ndi túhú sá văha quide-ndo ni cuu, te quide cuendá-í sá ñà túú quide-ndo nchaa nacuáa cuení Yă Ndiöxí cada-ndo. ³ Te chí dándàcu iní nàcuáa càháⁿ tnúhu sá ñi xĩndedóho-ndo cùtnàhá ní tuha-ndo ìchi Yá Ndiöxí, te canchícúⁿ nihnu-ndo càda-ndo nacuáa càháⁿ tnúhu-áⁿ, te ndixi cuéchi iní-ndó să ñà túú quide váha-ndo ndècu-ndo, te núu vá nàcuăha-ndo cuendá nàcuáa quide-ndo ndecu-ndo ña, te cada-í dàtná quidé ñadúhú, chi òrè ñá túú nă yihí ìní-ndó quèxio-í núú ndécú-ndó. ⁴ Dico ndècu ndìhi-ndo ìⁿ úú ñáyiú cãndoo caa nine iní-xi, chi ñáyiú-áⁿ ñi nduu táhũ-yu cuihnú-yu dóó cuixíⁿ cuendá cundecu ndìhi-í-yu, te ducaⁿ chi cùdũ-yu núù-í. ⁵ Te nchaa ñáyiú na càda ndee iní-xi yáha nãndi sá ná yăha sá cuendá-í, te ñáyiú-áⁿ nduu táhũ-yu cuihnú-yu dóó cuixíⁿ, te vá náquète-í dũ-yu núú tûtú núú yódó tnùní cue ñáyiú ní nduu táhú cundecu ndìhi-í ñi caa ñi quihíⁿ, te cúñaha-í xii Tătà-í Dútú Ndiöxí ndìhi cue espíritú xínú cuèchi núù-í sá ñáyiú-áⁿ cúũ-yu ñáyiú cùu cuendá-í. ⁶ Te nchaa nchòhó cada cuendá váha-ndo nàcuáa xáhaⁿ-í xii Espíritú Yă Ndiöxí xáhaⁿ-xi xii cue ñáyiú ndècu ichi-gá xĩndecu nchaa xichi”, duha

càchí Yaa càháⁿ-áⁿ. Te nchaa tnúhu-áⁿ nǐ chídó
tnùnǐ-í sá cúú-xí ñáyiú xǐndecu ichi Yá Ndiǒxí ndécú
ñùú Sárdís.

*Tnúhu sá cúú-xí cuè ñáyiú xǐndecu ichi Yá Ndiǒxí
ndécú ñùú Filàdelfiá*

7 Te ní cachí tucu Yaa càháⁿ-áⁿ xii-í sá chídó
tnùnǐ-í nchaa tnúhu sá vítná cǎháⁿ-gá ñⁿ núú tútú,
te tendaha-ǐ quíhíⁿ ndaha téé xínu cuechi núú Yá
Ndiǒxí ndécú ñùú Filàdelfiá sá cúú-xí cuè ñáyiú
xǐndecu ichi-gá ndécú ñùú-áⁿ, te duha càchí-gá:
“Yúhú cúú-í Yaa ío váha quide ndáá te ñá túú
tnàhí cuéchi-í. Te díhna-gá ndíí Dávíí ní taxi tnùnǐ
ndíí ñáyiú, te vitna yúhú táxí tnùnǐ-í-yu, te yúhú
cáháⁿ-í te núú nděndida càa ñáyiú ndíhu ndaha-ǐ te
nděndida càa ñáyiú vá ndíhu ndaha-ǐ. 8 Te yúhú
xíní-í nchaa nàcuáa quide nchohó ñáyiú xǐndecu
ichi Yá Ndiǒxí ndécú ñùú Filàdelfiá, te yúhú ní
quide-í nàcuáa ní níhí-ndó ñⁿ ichi cahnu quide-ndo
chiuⁿ-í, te vá yǒo ñⁿ cada nàcuáa vá ñíhí-gá-ndó
nàcuáa cada-ndo chiúⁿ-í. Te cuéi ñá túú ío ñíhí
ndéé-ndó cùndecu-ndo ichi Yá Ndiǒxí dico tñⁿ-ndo
nchaa tnúhu càháⁿ-í, te ní ñⁿ xito ñá túú càháⁿ-ndó
sá ñà túú ndècu ndíhí ñaha-ndo xii-í. 9 Te nchaa
ñáyiú quide nchaa nacuáa cuíní yucu ñáváha,
ñáyiú-áⁿ cúú-yu ñáyiú isràél, te cuéi cúú-yu ñáyiú
isràél dico ñá túú quidé-yu nàcuáa tàú-yu cadá-yu,
te yúhú cada-í sá ncháá ñáyiú-áⁿ canehé-yu sá
yíñùhu núú-ndó, te cutnùnǐ ínǐ-yu sá yúhú ío cùu
ínǐ ñáhà-í xii-ndo. 10 Te ío quide ndee-ni ínǐ-ndó
nchícúⁿ nihnu-ndo quide-ndo nchaa nacuáa ní
cáháⁿ-í, te xǐáⁿ coto ñaha-ǐ xii-ndo ñà túú ñà
tnahá-ndó ndùu na quixi nchaa tnúndòho tnúhu

ndàhú ñuyíú-a. Te òré quexìo nchaa tnúndòho-án ñuyíú-a te dàvá-án cutnùnì nàcuáa ndùu sá quidé ìⁿ ìⁿ ñáyíu. ¹¹ Te ío ndìhì quixi tucu-í. Te vá dáñá ndéè-ndó càda-ndo nchaa sá vǎha nchìcúⁿ nihnu-ndo quède-ndo cuendá sá vǎ cuíta sá ñí cachí Yǎ Ndiǒxí nduu táhú-ndó. ¹² Te nchaa nchòhó ñáyíu na càda ndee iní yáha nándì sá ná yáha sá cuendá-í, te yúhú cada-í sá nchòhó ío cuu cǎhnu-ndo cundecu-ndo núú ndécú Tǎtà-í Dútú Ndiǒxí, te vá ìⁿ ndùu-gá xocuíñí-ndó núú ndécú-gǎ. Te cada iní-ndó sǎ dàtná sá chídó tnùnì-í dǐu Tǎtà-í Dútú Ndiǒxí ñì-ndo chi ducaⁿ-ni cundecu-ndo ndìhì-gá, te cada tucu iní-ndó sǎ dàtná sá chídó tnùnì-í nàcuáa nàni ñuú-gá ñì-ndo, chi dǐu ñuú-gá-án cundecu-ndo, te ñuú-án nánì-xí Jèrusalén Sáá, duha nàni ñuú-gá. Te ñuú-án quee-xi andǐu núú ndécú Yǎ Ndiǒxí Yaá cúu Tǎtà-í quée-xi ñuyíú. Te cada tucu iní-ndó sǎ dàtná sá chídó tnùnì-í dǐu mee-í ñì-ndo, te xǎⁿ cúu-xí ìⁿ dǐu saa, te ducaⁿ càda iní-ndó chi cundecu ndìhì ñaha-ndo xì-í. ¹³ Te nchaa nchòhó cada cuendá váha-ndo nàcuáa xǎhaⁿ-í xii Espíritú Yǎ Ndiǒxí xǎhaⁿ-xì xìi cue ñáyíu ndècu ichi-gá xǐndecu nchaa xichi”, duha cǎchí Yaá cǎháⁿ-án. Te nchaa tnúhu-án ñí chídó tnùnì-í sá cúu-xí ñáyíu xǐndecu ichi Yǎ Ndiǒxí ndécú ñùú Filàdelfiá.

Tnúhu sá cúu-xí ñáyíu xǐndecu ichi Yǎ Ndiǒxí ndécú ñùú Laodiceá

¹⁴ Te cǎchí tucu Yaá cǎháⁿ-án xii-í sá chídó tnùnì-í nchaa tnúhu sá vítná cǎháⁿ-gá ìⁿ núú tútú, te tendaha-í quíhìⁿ ndaha téé xínu cuechi núú Yǎ Ndiǒxí ndécú ñùú Laodiceá sá cúu-xí cue ñáyíu xǐndecu ichi-gá ndécú ñùú-án, te duha cǎchí-gá:

“Yúhú cùu-í Yaá quidé nǔú Yă Ndiöxí, te cùu-í Yaá quidé ndáá chi càháⁿ ndáá cuiti-í nàcuáa càháⁿ Yă Ndiöxí. Te yúhú cùu-í Yaá ní quide ní ngúndecu nchaa sá nǐ cadúha Yá Ndiöxí. ¹⁵ Te yúhú xini-í nchaa nàcuáa quide nchohó ñáyiú xĩndecu ichi Yá Ndiöxí ndécú ñùú Laodiceá, te xini-í sá ñà túú cuini-ndó cànchicúⁿ nihnu-ndo nchàa nacuáa càháⁿ-í, te ni ñà túú cuini-ndó ãña duuⁿ-ndo. Te váha-gá sá dúúⁿ dùuⁿ cada-ndo nchaa nacuáa càháⁿ-í àdi núu ñáhá te duuⁿ duuⁿ ãña-ndo. ¹⁶ Te sá dúcáⁿ quide-ndo ñà túú cuini-ndó dùuⁿ duuⁿ-ni cada-ndo nàcuáa càháⁿ-í, te ni ñà túú cuini-ndó dùuⁿ duuⁿ-ni ãña-ndo te sáá nduu vǎ cùndèe-gá ini-í cuendá nchaa sá quidé-ndó-ǎⁿ, te daquèe tíhú ñáhà-í xii-ndo. ¹⁷ Te càchí-ndó sǎ cuicá-ndó, te ío váha ta yǎha-ndo nchàa nduu cuáháⁿ, te ñà túú tnàhí ná cúmǎní xii-ndo, te ñà túú cùtnuní ini-ndó sǎ cúu-ndó ãtná cue ñáyiú ío ndàhú yǎha, te cùu-ndo ãtná ñáyiú ndàhú, ñáyiú ío cùndahú ini ñáhá tnàha ñáyiú-xi, te cùu-ndo ãtná cue ñáyiú cuáá, te cùu tucu-ndo ãtná cue ñáyiú ndàhú ñà túú tnàhí dóó-xi. ¹⁸ Te na càchí tnúhu-í xii-ndo sǎ cáda-ndó ãtná xĩquide cue ñáyiú sàaⁿ #ⁿ sá nǐ cuáha mee-ni dǐhúⁿ cuàáⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo ãtná xĩquide cue ñáyiú sàaⁿ dóó cuixíⁿ sácuihnu-yu cuendá sá vǎ cúu-yu ãtná ñáyiú ndàhú ñà túú dǒó-xi, te cada tucu-ndo ãtná quidé cue ñáyiú sàaⁿ yúcu quèe núu-xi nàcuáa cutnùní váha núu-yu, te duha càháⁿ-í xǎhaⁿ-í xii-ndo chi cuini-í sá nàtuha ñaha-ndo xii-í, te ío váha cundecu-ndo sǎ cúu-xi Yă Ndiöxí. ¹⁹ Te càháⁿ-í dóho nchaa ñáyiú cùu ini-í òrè ñà túú quide ndáá-yu, te ãndoho-í-yu, núu xiáⁿ cuini-í sá nchòhó ndixi cuéchi ini-ndó sǎ ñà túú

quìde váha-ndo ndècu-ndo. ²⁰ Te na càchí tnúhu-í xii-ndo sã yùhú cúu-í dàtná ìⁿ téé nùtníi yuyèhe ndaa quehé te càháⁿ-í ñáyiú yìhi xití vehe, te núu na càda cuendá-yu sá càháⁿ-í te nacaáⁿ-yu yuyèhe te quíhu-í xití vehe cudìni-í ndihí-yu, te duha càháⁿ-í chí cuìní-í cundecu ndihí ñaha-í xii-ndo. ²¹ Te nchaa nchòhó ñáyiú na càda ndee iní-xi yáha nándi sá ná yáha sá cuendá-í, te yúhú taxi-í xii-ndo ìⁿ xichi núú ndécù-í cundecu-ndo te cunuu-ndo tnàhá-ndó dàtná cùnùu-í, chí yúhú ducaⁿ nì guide ndee iní-í ní yáha-í nándi sá nì yáha-í te vitna ní nduu táhù-í ndécù-í núú ndécú Tātà-í Dútú Ndiòxí cùnùu-í. ²² Te nchaa nchòhó cada cuendá váha-ndo nàcuáa càháⁿ Espiritú Yá Ndiòxí xáhaⁿ-xi xii cue ñáyiú ndècu ichi-gá xíndecu nchaa xichi”, duha càchí Yaá càháⁿ-áⁿ. Te nchaa tnúhu-áⁿ nì chídó tnùn-í sá cúu-xí ñáyiú xíndecu ichi Yá Ndiòxí ndécú ñùú Laodiceá.

4

Nàcuáa chìñuhu ñáyiú Yá Ndiòxí andiu

¹ Te sátá nì yáha ducaⁿ nì cuu te ní xiní-í nchìi andiu, te ní càháⁿ tucu Yaá ní càháⁿ ndihí ñaha xii-í díhna, te Yaá-áⁿ nì càháⁿ níhi-gá dàtná càháⁿ níhi ìⁿ cútú, te ní cachí-gá xii-í:

—Taquène iha te na dànehé ñáhà-í xii-n nchàa nàcuáa cada-xi ndéé núú cuaháⁿ núú vèxi — càchí-gá.

² Te òré-ni-áⁿ nì guide ñaha tùcu Espiritú Yá Ndiòxí xii-í nàcuáa càchí iní-xi, te ñu-ni òré-áⁿ nì xiní-í nùtní ìⁿ xilé váha andiu te cà dàtná cáá xilé sácõo nchihi cue ñáyiú ío cùnuu, te núú xilé váha-áⁿ núcõo Yaá táxi tnùn-í. ³ Te Yaá-áⁿ cáá-gã dàtná cáá

yúú chànhchí yúú vǎha sá nání jǎspé, te càa tucu-gá dàtná cáá yúú vǎha sá nání còrnalíná, te ñùhu doco ñaha ìⁿ cóó yáhnchí xii-gá, te tǎsaⁿ-di dàtná tǎsaⁿ ìⁿ yúú vǎha sá nání èsmeraldá. ⁴ Te ní xiní tucu-í nútñí ócó cúmí xilé váha ni càndéé núú núcõo-gá, te núú xilé-áⁿ xǐnucóo ócó cúmí cue téé cùu sacuéhé te xǐxǐhnu-güedé mee-ni dǒó cuèxíⁿ, te ìⁿ caa coróná sá nì cuáha mee-ni dǐhúⁿ cuááⁿ xǐxúhuⁿ díquí-güedé. ⁵ Te núú núcõo Yaá táxí tnùnì-áⁿ sàà ndúté, te càháⁿ ñùhu te xica chìhi-xi dónaha, te càyú úsá iti núú núcõo-gá, te sá úsá iti-áⁿ xǎⁿ cútnùnì sá ndécú úsá espíritú cúu cuèndá-gá. ⁶ Te ndècu ìⁿ sá ndécú ndàa núú-gǎ te xǎⁿ cáá dàtná cáá làmár, te dàtná cáá vǐdriú cáá ñihí.

Te ni càndéé dǐñí Yaá núcõo-áⁿ xǐnutñí cúmí quiti te titní víhí tǐnuu-güedi ndéé ndàa sátá-güedi ndihí ndàa núú-güedi. ⁷ Te quiti dǐhna nuu càa-di datná cáá ndìcaha, te quiti cùu uú cáá-dí dàtná cáá ndìcutu, te quiti cùu uní néhé-dí núú tǎe, te quiti cùu cúmí cáá-dí dàtná cáá yàcolo oré cuáháⁿ-di núú tàchí. ⁸ Te ndi cùmí quiti-áⁿ ndèé íñú ndíxíⁿ-güedi ìⁿ ìⁿ-güedi, te ñihí xití ndíxíⁿ-güedi ndihí ndàa sátá ndíxíⁿ-güedi ndèé tǐnùu-güedi, te nduu niú chíñùhu-güedi Yá Ndiõxí, te xǎhaⁿ-güedi xii-gá:

Yòhó Dútú Ndiõxí ducaⁿ-ni ta quide ndáá-n vǎxi, te
 ducaⁿ-ni quide ndáá-n cuèi vitna, te diu-ni
 ducaⁿ càda ndáá-n núú cuáháⁿ núú vǎxi,
 te cùu-n Yaá quidé nchàa-ndi túhú sá vǎha,
 te diu-ni-n sà ndecu-n ndéé cútnáhá ní cuáha
 ñuyíú,
 te diu-ni-n ndècu-n cuèi vitna, te diu-ni-n
 cùndecu-n cuèi ndéé núú cuáháⁿ núú vǎxi.

Duha xǎhaⁿ cuè quiti-áⁿ xii Yaá núcõo núú xilé váha-áⁿ chíñùhu ñaha-güedi.

⁹ Te cue quiti-áⁿ ïo ndàcáⁿ táhú-güedi núú Yàá núcõo núú xilé váha-áⁿ cuendá nchaa sá quidé-gǎ. Te Yaá-áⁿ cúú-gǎ Yaá ndécú nchàa nduu nchaa quíú. Te cue quiti-áⁿ càchí-güedi sá ïo càhnu cuu-gá te nèhe-güedi sá yíñùhu núú-gǎ. Te ndi tnahá òré ducaⁿ càháⁿ-güedi, ¹⁰ te ndi òcò cúmí cue téé cùu sacuéhé xñucóo-áⁿ ngüiñí xítí-güedé núú Yàá núcõo-áⁿ, chi ñiu-gá cúú-gǎ Yaá ndécú nchàa nduu nchaa quíú te chíñuhu ñaha-güedé xii-gá, te tàva-güedé coróná ñúhú díquí-güedé te tàxi ndecu-güedé núú-gǎ, te xǎhaⁿ-güedé xii-gá:

¹¹ Yòhó cúú-n Dütú Ndiõxí Yaá cúú cuendá ñáhá xii-ndí,

te ío càhnu cuu-n, te ío váha quide-n,

te nèhe-ndí sá yíñùhu núú-n, chi ducaⁿ tàú-xi cada-ndí,

chi yòhó cúú-n Yàá ní cadúha nchaandi túhú sá ío, te ducaⁿ ñí ngúndecu nchaa xíǎⁿ chi mee-n dùcaⁿ ní sani iní-n càda-n.

5

Cuendá Yaá cáá dàtná cáá ñⁿ mbéé quiti ní dánícuéhé-güedé ndihi cuendá ñⁿ tutú

¹ Te ní xiní tucu-í sá Yàá núcõo núú xilé váha-áⁿ núndàha-gá ñⁿ tutú ní nacaúnuu xio ndaha cùha-gá, te ndèé lètrá ndàa sátá-xi ndihi ndàa xítí-xi, te úsá tnahá tutú líhli ñùhu seyú ndèé sátá tütú-áⁿ cuendá sá vǎ dáñá-xí nàcaá. ² Te ní xiní-í ñⁿ espíritú xínú cuèchi núú Yǎ Ndiõxí, te ndee vìhi-xi te níhi càháⁿ-xi, te càchí-xi:

—¿Yoo tàú-xi xocàni nchaa tutú lǐhli ñùhu seyú ndèè sàtá tütú-a te nadacàá-xi? —càchí espíritú-án.

³ Dico ni àndiu, te ni nùú ñùyíú-a, te ni ndaa xítí ñuhu ñá túú ñá yiu tàú-xi nadacàá tutú-án te cundèhé-yu. ⁴ Te yúhú ní ngüíta-í ndàhyú víhì-í cuendá sá ñà túú ñá yiu tàú-xi nadacàá tutú-án cundèhé-yu. ⁵ Te ñá cue téé cùu sacuéhé xǐnucóo xíaⁿ ñí cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ñá yiu cùu ñaní tnáhá ndi Jùdá, diu-ni Yaá cúú ñaní tnáhá ndi Dàvíí, Yaá-án cúú-gǎ Yaá ní ndacu ní yáha nchaa nándi sá ñí yáha, núu xíaⁿ diu-gǎ tàú-gǎ xocàni-gǎ nchaa tutú lǐhli ñùhu seyú ndèè sàtá tütú-án te nadacàá-gǎ —duha càchí téé cùu sacuéhé-án.

⁶ Te tnuú ndi ócó cúmí cue téé cùu sacuéhé xǐnucóo-án, ndihi tnuú ndi cùmí quití xǐnutnǐ-án, ndihi núú núcõo Yaá táxí tnùn-í-án ñí xini-í nútñí ñá Yaá cáá dàtná cáá ñá mbéé quití ní dánicuéhé-güedé te ní xihí-di ní cùu te ní ndoto-di, te ndèé úsá ndiqui-di, te ndèé úsá tinùu-di, te sá úsá tinùu-di-án cútnùn-í sá ndécú úsá espíritú cúú cuendá Yǎ Ndiõxí, ducaⁿ càa Yaá-án ñí xini-í. Te cue espíritú-án ñí tendaha-gǎ xicá cùu-xi ní caa xico ñuyíú. ⁷ Te Yaá cáá dàtná cáá ñá mbéé quití ní dánicuéhé-güedé-án ñí sáháⁿ-gǎ núú Yáá núcõo núú xilé váha-án. ⁸ Te óré ní queheⁿ-gǎ tutú-án te ndi cùmí quití xǐnutnǐ xíaⁿ ñí ngüñí xítí-güèdi núú-gǎ, te ducaⁿ ñí ngüñí xítí tucu ndi ócó cúmí cue téé cùu sacuéhé xǐnucóo-án, te ndi dííⁿ núú-güedé xǐnehe-güedé yaá sá nání àrpá, te xǐnehe tucu-güedé ndí dííⁿ núú-güedé ñá caa tǐcùú ní cuáha mee-ni díhúⁿ cuááⁿ, te chitu dǔsa sá sáháⁿ

tnámí. Te ñúhmá dŭsa sá sàháⁿ tnámí-ǎⁿ cúú-xí
 dàtná nchaa tnúhu càháⁿ nchaa ñáyíu ndècu ichi
 Yá Ndiǒxí òré càháⁿ ndihì ñàhá-yu xii-gá. ⁹ Te
 xìta-güedé ìⁿ ndudú sáá ndihì cue quitì-áⁿ chíñùhu
 ñaha-güedé xii-gá, te càchí-güedé ndihì cue quitì-áⁿ:
 Yòhó tàú-n quèheⁿ-n tutú-a te xocàni-n nchaa tutú
 lìhli ñùhu seyú ndèé sátá-xi,

chi yòhó ní sati níñí-n te ní xíhí-n,
 te cuèndá xíǎⁿ ní nduu cuèndá Yá Ndiǒxí cue ñáyíu
 ìⁿ ìⁿ nàcióⁿ, ndihì ñáyíu xĩndecu ìⁿ ìⁿ ñúú,
 ndihì ñáyíu càháⁿ ndí dííⁿ ndí dííⁿ núú tnùhu,
 ndihì ñáyíu xĩndecu ìⁿ ìⁿ xichi.

¹⁰ Te ní quidé-n-yu dàtná cue téé yìndaha ñáyíu, te
 ní quide tùcú-n-yu dàtná cue dútú sǎ cúú-xí
 Yá Ndiǒxí.

Te sáá nduu te taxi tnùnì-yu ñuyíú-a.
 Duha càháⁿ cue téé-áⁿ ndihì cue quitì-áⁿ
 chíñùhu-güedé ndihì-güedi Yaá-áⁿ.

¹¹ Te sátá dúcáⁿ te ní tecú dóho-í ní cáháⁿ cuéhé
 víhí espíritú xínú cuèchi ni candéé núú núcõ
 Yaá táxí tnùnì-áⁿ, ndihì núú xĩnutnì ndi cùmí cue
 quitì-áⁿ, ndihì núú xĩnucõ cue téé cùu sacuéhé-ǎⁿ,
 te ní xiní-í sá sũúní cuéhé víhí espíritú-áⁿ xĩndecu
 xíaⁿ, ¹² te níhì ní cáháⁿ cue espíritú-áⁿ, te càchí-xi:

Yòhó Yaá cáá dàtná cáá ìⁿ mbéé quitì ní
 dánñcuèhé-güedé te ní xíhí ní cùu te ní ndoto,
 te yòhó ío càhnu cuu-n, te ndècu ndihì-n nchaandi
 túhú,

te ío ndècu ndihì-n sá xìnì tnùnì-n,
 te ndàcu-n quide-n nchaa sá cuìnì-n,
 te nèhe-ndí sá yíñùhu núú-n, te ío váha quide-n,

te chíñuhu ñaha-ndí xii-n, chi ducaⁿ tàú-ndí
 cada-ndí chi ío càhnu cuu-n.
 Duha càchí nchaa cue espíritú-áⁿ xăhaⁿ-xi xì-gá
 chíñuhu ñaha-xi.

¹³ Te ní tecú dóho-í ní cáháⁿ nchaandi túhú sá
 ñí cadúha Yá Ndiǒxí ndécú àndi, ndihí nchaa sá
 ndécú ñùyíú, ndihí nchaa sá ndécú xìtí ñuhu, ndihí
 nchaa sá ñúhú xìtí ndute làmár, te xíchí-xi:
 Yòhó Yaá núcǒo núú xilé váha, ndihí yòhó Yaá cáá
 dàtná cáá ñⁿ mbéé qui^{ti} ní dánicuèhé-güedé
 táxí tnùní-ndó, te nèhe-ndí sá yíñuhu
 núú-ndó,

te ducaⁿ ío ndàcáⁿ táhú-ndí núú-ndó, chi ío váha
 quide-ndo te ío cùnuu-ndo,

te ñi-ni duha cáháⁿ váha-ndí cuendá-ndó ñí caa ñí
 quíhíⁿ.

Duha càchí nchaa sá ñí cadúha Yá Ndiǒxí.

¹⁴ Te ndí cùmí cue qui^{ti} xĩnutní-áⁿ càchí-güedi:

—¡Ducaⁿ na cùnduu! —cachí-güedi.

Te ndí òcó cùmí cue téé cùu sacuéhé xĩndecu-áⁿ ñí
 ngüñí xìtí-güedé chíñuhu-güedé Yaá ndécú nchaa
 nduu nchaa quíú.

6

Cuendá úsá tutú líhli ñuhu seyú

¹ Te sátá dúcáⁿ te ní xiní-í sá Yàá cáá dàtná cáá
 ñⁿ mbéé qui^{ti} ní dánicuèhé-güedé-áⁿ ñí xócání-gă ñⁿ
 tutú líhli ñuhu seyú ndéé sátá tütú sá ñí nadúcúⁿ
 nuu-áⁿ, te ní tecú dóho-í ní cáháⁿ ñⁿ qui^{ti} cùmí
 xĩnutní-áⁿ, te níhi ní cáháⁿ-di dàtná càháⁿ ñúhu, te
 càchí-di:

—¡Taquixi cundehe-n! —cachí-di.

² Te òré-ni-áⁿ nǐ xiní-í ìⁿ cuàyú cuixíⁿ yódó ñàha ìⁿ sá yódó ñàha xii-di, te sá yódó ñàha xii-di-áⁿ néhé-xí ìⁿ arcú sá cúú tnùxí-xi, te ní nduu táhú-xi ìⁿ coròná, te ní ndacu-xi ní cunuu-xi te ducaⁿ-ni ta cùnuu-xi cuáháⁿ.

³ Te òré ní xócání-gǎ tutú lǐhli cùu uú ñúhú sèyú ndèé sátá tütú sá nǐ nadúcúⁿ nuu-áⁿ, te ní tecú dóho-í ní cáháⁿ tucu ingá quiti cùu uú xǐnutní-áⁿ, te cǎchí-di:

—¡Taquixi cundehe-n! —cachí-di.

⁴ Te òré-ni-áⁿ nǐ xiní tucu-í ìⁿ cuàyú tícuèhé ní quee-di cuáháⁿ-di, te yòdo ñàha ìⁿ sá yódó ñàha xii-di, te sá yódó ñàha xii-di-áⁿ nǐ níhí-xi tnúhu ndee ìní sá dáticánuu-xi ñáyiu vá cúndècu ndìhi tnaha váha-gá-yu, te ngúíta ñáyiu cahni tnàhá-yu, te ní nduu táhú-xi ìⁿ yuchí cáhnú vèhi.

⁵ Te òré ní xócání tucu Yaá-áⁿ ingá tutú lǐhli cùu uní ñúhú sèyú ndèé sátá tütú sá nǐ nadúcúⁿ nuu-áⁿ, te ní tecú dóho-í ní cáháⁿ quiti cùu uní xǐnutní-áⁿ xíáⁿ, te cǎchí-di:

—¡Taquixi cundehe-n! —cachí-di.

Te òré-ni-áⁿ nǐ xiní tucu-í ìⁿ cuàyú tnúú te yòdo ñàha tucu ìⁿ sá yódó ñàha xii-di, te sá yódó ñàha-áⁿ núndàha-xi úú yaxiⁿ libré. ⁶ Te ní tecú dóho-í ní cáháⁿ ìⁿ sá nǐ cáháⁿ tnuú cue quiti xǐnutní-áⁿ, te cǎchí-xi:

—Íⁿ cuàrtú-nǎ triú níhí-ndó sǎ íⁿ dǐhúⁿ denàriú, te uní cuàrtú-nǎ cebàdá níhí-ndó sǎ íⁿ tucu dǐhúⁿ denàriú, dico acítì ndìhi ndudí ndéhé yoho yàha stilé chi vá ndíhí nìhnu —duha cǎchí sá cǎháⁿ-áⁿ.

⁷ Te òré ní xócání tucu Yaá-áⁿ tutú lǐhli cùu cumí ñúhú sèyú ndèé sátá tütú sá nǐ nadúcúⁿ nuu-áⁿ,

te ní tecú tucu dóho-í ní cáháⁿ tucu ìngá quìti cùu cumí xĩnutnĩ-áⁿ, te càchí-di:

—¿Taqùxi cundehe-n! —cachí-di.

⁸ Te òré-ni-áⁿ nĩ xini tucu-í ìⁿ cuàyú yàhá, te yòdo ñaha tucu ìⁿ sá yódó ñaha xii-di, te sá yódó ñaha xii-di-áⁿ nání-xí Sǎ xìhí, te xǎⁿ sáhní-xí ñǎyiu, te sátá xǎⁿ nchìcúⁿ sá nèhé núú ndécú ñǎyiu ní xíhí. Te cúmí xichi cùu ñuyíú, te sá sáhní ñaha xii ñáyiu-áⁿ nĩ níhí-xi tnúhu ndee ìní danàa-xi ñáyiu ìⁿ xichi ñuyíú, te davá-yu cahni ñaha-xi ndìhi yuchí, te cada-xi sá cóo tnámá te cuú-yu, te cada tucu-xi sá cóo cuèhé cahni-xi ñáyiu, te diu-ni tucu-xi cada sá ncháá quìti dééⁿ cahni-di ñáyiu.

⁹ Te òré ní xócání tucu Yaá-áⁿ tutú lĩhli cùu uhúⁿ ñúhú sèyú ndéé sátá tutú sá nĩ nadúcúⁿnuu-áⁿ, te òré-áⁿ nĩ xini-í nútñĩ ìⁿ núú sácòdó sǎ ndúú tǎhú Yǎ Ndiǒxí, te ndàa caha xǎⁿ ní xini-í xĩndecu nchaa àlmá ñáyiu ní sahní-güedé núú ñuyíú sǎ cuendá tnúhu Yá Ndiǒxí, ndìhi sá cuendá sá nĩ cáháⁿ váha-yu cuendá-gá. ¹⁰ Te nchaa àlmá-áⁿ nĩhi xícáháⁿ-xi, te xǎhaⁿ-xi xii Yá Ndiǒxí:

—Yòhó Dútú Ndiǒxí cúu-n Yàá ñá túú tnàhí cuéchi-xi, te ñá túú tnàhí quée cáva-n quide-n ìⁿ sá càháⁿ-n. ¿Te ná ndéé ama dandòho-n ñáyiu ndècu ñuyíú nachinaa-n cuendá sá nĩ quide ñàhá-yu xii-ndí-i? —càchí cue àlmá-áⁿ xǎhaⁿ-xi xii-gá.

¹¹ Te sátá dúcáⁿ te nchaa cue àlmá ñáyiu-áⁿ nĩ níhí-xi dóo cuìxíⁿ ní quée cuíhnu-xi, te ní xitnũhu ñaha xii-xi sá ná ndètatú-xi te cundetú tnaa-xi ndéé ná xĩnu cava cuú ñáyiu nàcuáa ndéé tnuní dàtná ní xíhí cue ñáyiu dii àlmá-xi cùu-xi. Te ñáyiu sa ní xíhí-áⁿ ìⁿ-ni cùú-yu ndìhi ñáyiu vitna cuú-áⁿ chi

mee-ni chiùⁿ Xítóhó Jesucrístú quídě-yu, te diu-ni ichi-gá ndécũ-yu.

¹² Te òré ní xócání tùcu Yaá-áⁿ tutú lìhli cùu iñú ñúhú sèyú ndèé sátá tütú sá nǐ nadúcúⁿ nuu-áⁿ, te ní xiní-í sùúní nǐhi ní quidi-xi ñuyíú, te ní cutnuu nǐhíí núú nchǐcanchii dàtná ìⁿ dóó tnuú, te ní cuu ticuèhé níñí nǐhíí núú yóó. ¹³ Te ní xiní-í ní ngoyo chódíní ñuyíú-a dàtná ngóyó ngǔxí yíhí òré quéné tǎchí nǐhi. ¹⁴ Te ní xiní-í ní nadúcúⁿnuu andiu dàtná nádúcúⁿnuu ìⁿ tutú te ní ndóñúhú-xí, te nchaa tindúú nǐ xica ndehe-xi núú ndécú-xí, te ducaⁿ nǐ xica ndehe tucu nchaa tindúú yìchí ndécú xítí ndute làmár. ¹⁵ Te nchaa cue téé yìndaha ñáyiu ní nguívǎha-güedé, ndihí nchaa dava-gá cue téé ío tàxi tnuní, ndihí nchaa ñáyiu cuica, ndihí nchaa cue téé tàxi tnuní sandàdú, ndihí cue sandàdú cue téé ío váha sáá díquí-xi nàcuáa cada-güedé nàá-güedé, ndihí nchaa ñáyiu ñá túú tnàhí dàñá quee núú chíúⁿ patróóⁿ-xi, ndihí nchaa ñáyiu dàñá queé núú chiùⁿ patróóⁿ-xi. Te dava ñáyiu-áⁿ nǐ nguívǎha-yu xítí yaú, te davá-yu ní nguívǎha-yu nchaa tnuú cava. ¹⁶ Te xǎhǎⁿ-yu nchaa tindúú ndihí nchaa cava:

—Chí tǎcùuⁿ chiváha ñaha-ndo xìi-ndí cuèndá sá vǎ quíní ñáhá Yáá ío tàxi tnuní núcòo núú xilé váha, ndihí cuèndá sá vǎ dándòho ñaha Yáá cáá dàtná cáá ìⁿ mbéé quiti ní dánícuèhé-güedé, chi Yaá-áⁿ ïo cùdééⁿ-gǎ núú-ndí —duha càchí nchaa ñáyiu-áⁿ xǎhǎⁿ-yu xii nchaa tindúú-ǎⁿ ndihí nchaa cava-áⁿ.

¹⁷ Te vitna ní sáá nduu ío cùu cahnu nduu tnúndòho tnúhu ndàhú, te vá yóo ìⁿ cundee ìní-xi yáha nchaa tnúndòho-a.

7

Ñáyiú isràél ñáyiú naníhí tàhú

¹ Te sátá xǎⁿ te ní xiní-í cùmí tnàhá espíritú xínú cuèchi núú Yǎ Ndiǒxí xǐnutnǐ-xi ndi cùmí xio ñuyíú, te cue espíritú-áⁿ ní ngani-xi táchí cuendá sá vǎ cuícó-gǎ-xi ni làmár, te ni dǐquí yutnu, te ni ìⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndìh-xi tnúhu ndee ìní danàa-xi sá íó làmár ndìh sá íó ñuhu yìchí, te ní xiní tucu-í ingá espíritú xínú cuèchi núú Yǎ Ndiǒxí ní quee nchita-xi ndàa nacuáa quène nchícanhii, te nùndaha-xi seyú Yǎ Ndiǒxí Yaá ndécú nchàa nduu nchaa quíú, te níhi ní cáháⁿ-xi xǎhaⁿ-xi xì ndi cumí cue espíritú-áⁿ:

³ —Vá dánàa-ndo sá íó làmár, te ni vǎ dánàa-ndo yutnu, te ni ìⁿ sá íó ñuyíú vǎ dánàa-ndo, chi cundetú-ndo ndèé ná tàxi ndecu-ndí ìⁿ sèñá tneé nchaa ñáyiú xínu cuechi núú Tǎtá-ó Dütú Ndiǒxí — duha càchí espíritú-áⁿ xǎhaⁿ-xi xì ndi cumí espíritú xǐnutnǐ ndi cùmí xichi ñuyíú.

⁴ Te ní tecú dóho-í ní cáháⁿ ìⁿ sá nǐ cáháⁿ, te ní cachí-xi sá núú ndí ùxúú xichi cue ñáyiú isràél te ní xínu ìⁿ cièndú údico cùmí mǐl-yu ní ngúndecu sèñá tneé-yu. ⁵ Te núú ìⁿ cièndú údico cùmí mǐl ñáyiú-áⁿ, te ní xínu ùxúú mǐl cue ñaní tnáhá ndíi Jüdá ní ngúndecu sèñá tneé-yu, te ùxúú mǐl cue ñaní tnáhá ndíi Rùbén, te ùxúú mǐl cue ñaní tnáhá ndíi Gǎd, ⁶ te ùxúú mǐl cue ñaní tnáhá ndíi Àsér, te ùxúú mǐl cue ñaní tnáhá ndíi Neflálí, te ùxúú mǐl cue ñaní tnáhá ndíi Manàsés, ⁷ te ùxúú mǐl cue ñaní tnáhá ndíi Mìó, te ùxúú mǐl cue ñaní tnáhá ndíi Lèví, te ùxúú mǐl cue ñaní tnáhá ndíi Isàcár, ⁸ te ùxúú mǐl cue ñaní tnáhá ndíi Zabùlón, te ùxúú mǐl cue ñaní tnáhá ndíi

Chèé, te úxúú mǐl cue ñaní tnáhá ndíi Benjàmín, nchaandi túhú ñáyíu-áⁿ nǐ ngúndecu sèñá tneé-yu.

Cuéhé víhí ñáyíu ñihnu dóó cuixíⁿ

⁹ Te sátá xǎⁿ te ní xiní-í cuéhé víhí ñáyíu, ñáyíu ñⁿ ñⁿ nàcióⁿ, ndíhi ñáyíu ñⁿ ñⁿ ñuú, ndíhi ñáyíu càháⁿ ndí dǐⁿ ndí dǐⁿ núú tnǔhu, ndíhi ñáyíu ní xíndecu ñⁿ ñⁿ xichi, te nchaa ñáyíu-áⁿ xǐnutní-yu ndàa núú Yàá táxí tnùní núcõo núú xilé váha, ndíhi núú Yàá cáá dàtná cáá ñⁿ mbéé quiti ní dánícuèhé-güedé, te vá yõo ñⁿ ndàcu cahu ñaha xii-yu chi cuéhé víhí-yu, te nchaá-yu xǐxǐhnu-yu mee-ni dóó cuixíⁿ, te nùndahá-yu nchaá-yu ñⁿ caa ndàha yutnu ñúú.

¹⁰ Te nchaá-yu níhi xǐcáháⁿ-yu, te càchí-yu:

Yàá táxí tnùní núcõo núú xilé váha cùu-gá Ndiõxí-ó, te diu-gá ndíhi Yàá cáá dàtná cáá ñⁿ mbéé quiti ní dánícuèhé-güedé ní dácàcu ñihnu ñaha-gá xii-o núú ùhú núú ndàhú.

Duha càchí nchaa ñáyíu-áⁿ. ¹¹ Te nchaa espíritú xínú cuèchi núú Yǎ Ndiõxí ní nadúcúⁿndèé-xi xǐnutní-xi nǐ càndéé núú núcõo Yàá núcõo núú xilé váha, ndíhi núú xǐnucóo cue téé cùu sacuéhé, ndíhi cue ndí cùmí quiti xǐnutní-áⁿ, te nchaa-xi ní ngüíñí xítí-xí te ní ngúnu ndeyi-xi núú Yàá núcõo núú xilé váha-áⁿ, te nchaa-xi ní ngüíta-xi chĩñuhu ñaha-xi xii-gá, ¹² te càchí-xi:

Na càháⁿ ndáá-ndí núú yòhó Tátá-ndí Dútú Ndiõxí sá ïo càhnu cuu-n, te ndàcu-n guide-n nchaa sá vǎha cuìní-n, te ío váha guide-n, te ndècu ndíhi-n nchaa sá xìní tnùní-n,

te chiñuhu ñaha-ndí xii-n, te ducaⁿ ndàcáⁿ táhú-ndí
núú-n cuèndá nchaa sá quidé-n, te nèhe-ndí
sá yíñuhu núú-n,

te tnúhu càháⁿ-ndí-a cùu-xi tnúhu ndáá, te ñiu-ni
duha cáháⁿ-ndí ndéé núú cuàháⁿ núú vëxi.
Duha càchí nchaa cue espíritú-áⁿ xáhaⁿ-xi xii Yaá
núcõo núú xilé váha-áⁿ.

¹³ Te ñⁿ cue téé cùu sacuéhé xĩndecu-áⁿ ñí xicáⁿ
tnúhú-dé núú-í, te càchí-dé:

—¿Yóndi cùu ñáyiu dàcáⁿ xĩxíhnu dóó cuixíⁿ-áⁿ, te
ndèé véxi-yu núú dàcáⁿ xĩndáá-yu-i? —càchí-dé.

¹⁴ Te yúhú ní xáhaⁿ-í:

—Tǎtá, ñá túú xini-í, dico mee-n xini-n —duha ní
xáhaⁿ-í xii-dé.

Te dàtnúni ní cachí tnúhu-dé xii-í ná cúú ñáyiu-áⁿ,
te càchí-dé:

—Nchaa ñáyiu-a cùú-yu ñáyiu ní quee núú ió
víhí tnúhu ndóho tnúhu ndàhú sá vǎ cùndèe iní-ó
te véxi-yu iha, te cúú-yu ñáyiu sa ní nduu ndoo
ní nduu nine iní-xi cuèndá sá ñí sati ñíñí Yàá
cáá dàtná cáá ñⁿ mbéé quiti ní dánicuèhé-güedé,
cuèndá xíǎⁿ vitna ní ndihí-yu ní nduu cuixíⁿ dóó
xĩxíhnu-yu. ¹⁵ Te núú xíǎⁿ vitna ní nduu táhũ-yu
ndécú-yu núú ndécú Yǎ Ndiõxí Yaá táxí tnùní
núcõo núú xilé váha, te cuèi nduu cuèi niú xínú
cuèchí-yu núú-gǎ vitna, te ñiu-gǎ xító ñàha-gǎ
xií-yu. ¹⁶ Te vitna ní sáá-yu núú-gǎ cundecú-yu
te vá ndóhó-gǎ-yu docó, te ni vǎ quini-gǎ-yu
ndohó-yu yíchí-yu ndute, te ni vǎ quini-gǎ-yu
ndohó-yu cahni nchíanchii, te ñá túú-gǎ ná cahni
ndohó-yu. ¹⁷ Te ducaⁿ chi Yaá cáá dàtná cáá ñⁿ
mbéé quiti ní dánicuèhé-güedé ndécú-gǎ núú nútní
xilé váha núcõo Yá Ndiõxí Yaá táxí tnùní, Yaá-áⁿ

coto ñaha-gă xií-yu dàtná quidé ìⁿ toli oré xító-dě mběé-dě, te candeca ñaha-gă xií-yu quíhíⁿ núú tǒo ndute, te ndute-áⁿ cúú-xí ndute candeca iní-yu, te Yá Ndiǒxí cada-gá sá vǎ quíní-gá-yu tnúhu ndàhyú —duha ní cachí tnúhu téé cùu sacuéhé-ǎⁿ xii-í.

8

Cuèndá tǐcùú sá ñǐ cuáha mee-ni dǐhúⁿ cuááⁿ

¹ Te sátá dúcáⁿ te Yaá cáá dàtná cáá ìⁿ mbéé quiti ní dánícuèhé-güedé ní xócání-gă tutú lihli cùu usá ñúhú sèyú ndéé sátá tütú sá ñǐ nadúcúⁿnuu-áⁿ, te òré-áⁿ ñǐ cunahi sǔúní nàvíí-nǎ ní cuu andiü dàtná cuádava òré. ² Te ní xiní-í úsá tnàhá espíritú xínú cuèchi núú Yǎ Ndiǒxí xǐnutnǐ-xi núú núcǒo-gá, te ní níhí-xi ìⁿ caa cǔtú xǐnehe-xi. ³ Te dǎtnùní ní xiní tucu-í ingá espíritú xínú cuèchi núú-gă ní quexio-xi nehe-xi ìⁿ tǐcùú ní cuáha mee-ni dǐhúⁿ cuááⁿ tǐ ñúhu vai dúsa sá sàháⁿ tnámí, te ní ngúnutnǐ espíritú-áⁿ núú ndécú sǎ ñǐ cuáha mee-ni dǐhúⁿ cuááⁿ núú sácǒdó sǎ ndúú tǎhú Yǎ Ndiǒxí, te xiǎⁿ nútnǐ-xi ndàa núú-gă, te dúsa sá sàháⁿ tnámí-áⁿ cahmi espíritú-áⁿ núú sácǒdó sǎ ndúú tǎhú-gă-áⁿ cuèndá ñúhmá dǔsa-áⁿ cundihí-xi nchaa tnúhu càháⁿ ñáyüu càháⁿ ndihí ñaha xì-gá, nchaa ñáyüu cùu cuendá-gá. ⁴ Te nùndaha espíritú-áⁿ tǐcùú ñúhú dǔsa sá sàháⁿ tnámí càyú, te quène ñúhmá nútnǐ-xi núú Yǎ Ndiǒxí, te ñúhmá-ǎⁿ cundihí-xi nchaa tnúhu càháⁿ ñáyüu càháⁿ ndihí ñaha xì-gá, nchaa ñáyüu cùu cuendá-gá. ⁵ Te ní queheⁿ espíritú-áⁿ tǐcùú te ní dáchítú-xi ñuhú yódó núú sácǒdó sǎ ndúú tǎhú Yǎ Ndiǒxí, te ní xiténuu-xi ñuyíú, te òré ducaⁿ

nĩ quide-xi te ní cáháⁿ víhí ñũhu, te ío dusaⁿ nĩ quide-xi ñuyíú, te ní sáá ndúté, te níhi víhi ní tnáa.

Ndi ùsá espíritú ní tiú-xi ìⁿ caa cútú xĩnehe-xi

⁶ Te ndi ùsá cue espíritú xĩnehe ìⁿ caa cútú-áⁿ nĩ ngúndecu túha-xi cuèndá tiú-xi.

⁷ Te espíritú díhna nuu nĩ tiú-xi cútú néhé-xí, te ñuyíú-a ní ngoyo ñĩñi dàcánuu-xi ndihí ñuhú ndihí níñí, te luha-ná te cuu dava ñuyíú nĩ cáyú, te luha-ná te cuu dava tucu nchaa yutnu ío ñuyíú nĩ cáyú, te luha-ná te cuu dava tucu nchaa cùhú ío ñuyíú nĩ cáyú.

⁸ Te espíritú cúú ùú ní tiú-xi cútú néhé-xí, te dàtná cáá ìⁿ tĩndúú cáá ìⁿ sá nĩ ngava xití làmár te nchìcúⁿ ñuhú, te luha-ná te cuu dava ndute làmár-áⁿ nĩ nduu-xi níñí. ⁹ Te luha-ná te cuu dava nchaa quití xixúhuⁿ xití làmár-áⁿ nĩ xihí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tiú-xi cútú néhé-xí, te ní ngava ìⁿ chódíní cáhnú ndèé andiu ñuyíú te nchìcúⁿ ñuhú-di, te ñuhú-áⁿ cáá dàtná cáá ñuhú ití. Te luha-ná te cuu dava nchaa yúte ní ngava chódíní-áⁿ, te luha-ná te cuu dava tucu nchaa núú quèñihni ndute ní ngava-di. ¹¹ Te chódíní-áⁿ nání-dí: Yúcú Ùá. Te ndute xìca nchaa yúte-áⁿ ndihí nchaa ndute quèñihni-áⁿ nĩ cuu úá-xi dàtná yúcú ùá, te ío cuéhé ñàyiu ní xihí sá dúcáⁿ nĩ cuu úá ndute-áⁿ.

¹² Te espíritú cúú cùmí ní dácàháⁿ-xi cútú néhé-xí, te luha-ná te cuu dava nchìcanchii ñá túú ní dàyehé-xi, te ducaⁿ lùha-ná tucu cuu dava yóó ñà túú ní dàyehé-di, te ducaⁿ lùha-ná te cuu

dava tucu nchaa chódíní ñà túú ní dàyehé-güedi, te luha-ná te cuu dava nduu ñà túú ní dàyehé nchícanhii, te ducaⁿ lùha-ná te cuu dava niú ñá túú ní dàyehé yóó ndihí nchaa chódíní.

¹³ Te sátá dúcáⁿ te ní xiní-í xícó ìⁿ espíritú xínú cuèchi núú Yă Ndiöxí núú tàchí, te ní tecú dóho-í níhi càháⁿ-xi, te càchí-xi:

—Íó ndàhú ndoho nchaa ñáyiu xĩndecu ñuyúú òré ná dàcaháⁿ úní-gá cue espíritú cúmăní cútú xĩnehe-xi, chi sa xĩndecu túha-ná-xi sá dácàháⁿ-xi!— duha càchí espíritú-áⁿ.

9

¹ Te espíritú cúú ùhúⁿ ní tíú-xi cútú néhé-xí, te òré-áⁿ ñí xiní-í ní queue ìⁿ espíritú andíu te càa-xi datná cáá ìⁿ chódíní, te ní ngava-xi ñuyúú, te ní níhí-xi ìⁿ ndacaá néhé-xí cuëndá nacaáⁿ-xi yuyèhe yaú cùnú víhí. ² Te ní nacaáⁿ-xi yaú-áⁿ te ní ngüíta-xi ní quene ñúhmá dàtná quéné ñúhmá ìⁿ xítnú cáhnú vîhi, te ní quene táchí ñí xítenuu-xi ñúhmá-ăⁿ te ní sadí-xi núú nchícanhii, te ní cunee ñuyúú. ³ Te xití ñúhmá-ăⁿ ñí quene tíca làngóstá, te ní xítenuu-di ñuyúú, te dééⁿ-güedi dàtná dééⁿ nchacua. ⁴ Te ní ngúndecu ndihí-güedi tnúhu ndee ìní cuëndá sá dándòho-güedi mee-ni ñáyiu ñá túú ndée señá Yă Ndiöxí tneé-xi, te ñá túú ñá cada-di nchaa yutnu ndihí nchaa cúhú. ⁵ Te ñá túú tnúhu ndee ìní ndécú ndihí-güedi sá cáhní-güedi ñáyiu, chi mee-ni sá dándòho ñaha-güedi xií-yu úhúⁿ yóó. Te òré ní ngüíta-güedi dándòho ñaha-güedi xií-yu te tàhú tnùhú núú dáquëe-güedi iñu-güedi dàtná quidé-xí núú dáquëe nchacua iñu-güedi. ⁶ Te

ñáyiú-áⁿ xìcáⁿ táhŭ-yú sá ndĩhi cuú-yú cuèndá sá ïo ndòhó-yú dàquée ñaha nchàa quitì-áⁿ iñu-di xií-yú te ñá cuìní-xì cuú-yú, te ìⁿ nduu ìⁿ nduu sàni iní-yú cuú-yú te ñá túú cuìní-xì cuú-yú chi ñá túú tnũhu xìhí sá cúú-xĩ-yú.

7 Te nchaa tíca lànghostá-áⁿ xĩndáa-güedi dàtná ndáa nchaa cuàyú cue téé cuáháⁿ nàá, te díquí-güedi ñũhu ìⁿ sá cáá dàtná cáá còroná ní cuáha mee-ni dĩhúⁿ cuááⁿ, te núú-güedi càa datná cáá núú cuè téé. 8 Te idi díquí-güedi càa datná cáá ìdi díquí ñáyiú dĩhí, te núhu-güedi càa datná cáá núhu ndicaha. 9 Te yidúcúⁿnuu-güedi ìⁿ sá cáá dàtná cáá càá, te ndíxíⁿ-güedi quide-xi datná quidé-xí núú vèxi cuéhé víhí càrretá sá táñũhu cuayú cuáháⁿ-güedé ndĩhi-güedi núú nàá-güedé. 10 Te ndéé iñu núú lùhmá-güedi dàtná ndéé iñu núú lùhmá nchacua, te iñu núú lùhmá-güedi-áⁿ dáquëe-güedi ñáyiú dàndoho ñaha-güedi xií-yú, te ducaⁿ-ni càda-güedi dandoho ñaha-güedi xií-yú ndéé xínu úhúⁿ yóó. 11 Te nchaa tíca lànghostá-áⁿ táxí tnùnì ñáhá espíritú sá táxí tnùnì yaú cùnú víhí, te espíritú-áⁿ nánì-xí Àbadón tnũhu hèbreú, te tnũhu griégú nánì-xí Àpoliòn, te ndi ndúú tnũhu-áⁿ quée-xí: Sá dánàa ñáyiú.

12 Te tnúndòho-a cuu-xi tnúndòho díhna nuu, te vitna cùmání ùú-gá.

13 Te espíritú cúú iñú ní tíú-xi cútú néhé-xí. Te núú Yã Ndiõxí nútñĩ ìⁿ sá ñĩ cuáha mee-ni dĩhúⁿ cuááⁿ núú sácódó sã ndúú táhú-gã, te ndi cùmí xíquí-xi xĩndecu ìⁿ caa ndiqui, te ní tecú dóho-í ní cáháⁿ ìⁿ sá ñĩ cáháⁿ nihnu ndi cùmí ndiqui-áⁿ. 14 Te

sá càháⁿ nihnu ndiqui-áⁿ xăhaⁿ-xi xîi espíritú cúú ñnú sá ñî tíú cútú-ăⁿ:

—Cuàháⁿ nandaxi-n ndì cumí espíritú ndútú ndècu yúte càhnu nani Eúfratés —càchí sá càháⁿ-áⁿ xăhaⁿ-xi xîi espíritú-áⁿ.

15 Te sátá dúcáⁿ te ní nandáxí ndi cùmí cue espíritú-áⁿ cuendá cahni-xi cuéhé víhí ñăyiu, te sa yatni dàtná cuádava ñăyiu xĩndecu ñuyíú cahni-xi, te ducaⁿ chi sa ndècu túha tnàhí cue espíritú-áⁿ ndétú-xí sàá òré, àdi nduu, àdi yóó, àdi cuíá ducaⁿ càda-xi cahni-xi ñăyiu. 16 Te ní xiní-í nchaa cue sandàdú cúndìhi-xi xixódó-güedě cuàyú, te ní níhì-í tnúhu sá xĩnu úú ciendú millón-güedě.

17 Te duha xĩndáa cue cuàyú-áⁿ ndihi cue téé yòdo ñaha-áⁿ ñî xiní-í: Te cue téé-áⁿ yídúcúⁿ nuu ìⁿ sá yídúcúⁿ nuu pèchú-güedě, te luha ticuèhé te luha cuì datná cuì andiú, te luha cuááⁿ, te nchaa cuàyú-áⁿ cáá dǐquí-güedi dàtná cáá dǐquí ndicaha, te yuhu-güedi quène ñuhú ndihi ñúhmá, ndihi àzufré nchìcúⁿ ñuhú. 18 Te ío cuéhé ñăyiu ñuyíú ñî xíhí chi luha-ná te cudavá-yu ní xíhí sá cuendá ñuhú-áⁿ ndihi ñúhmá-ăⁿ ndihi àzufré-áⁿ. 19 Te ndihi núú lùhmá-güedi ndihi yuhu-güedi dândoho-güedi ñăyiu, te núú lùhmá-güedi nèhe-xi dǐquí cǒó, te diu-ni dàtná cáá cǒó cáá ñìhí lùhmá-güedi.

20 Te nchaa dava-gá ñăyiu ní cácu ñá túú ni xíhí núú nchàa tnúndòho-áⁿ ñà túú ní cuìní-yu dàñá-yu ichi cuèhé ichi duha ndècú-yu, chi quide cahnu-ní-yu nchaa espíritú cúndìhi yucu ñávăha, ndihi nchaa sá càchí-yu cùu ndióxí ní cadúha cue téé ñuyíú-a, te dava xíăⁿ ní cuáha mee-ni dǐhúⁿ cuááⁿ, te dava ní cuáha mee-ni dǐhúⁿ cuixíⁿ, te dava

ní cuáha sá nání bròncé, te dava ní cuáha mee-ni yúú, te dava ní cuáha mee-ni yùtnu, te nchaa xiáⁿ ñá túú cùtnuní núú-xi, te ni ñá túú tècú dóho-xi, te ni ñá ndácú-xi càca-xi. ²¹ Te ni sá sáhní tnahá-yu, te ni sá sáhní ndùu tnahá-yu, te ni sá ndécũ-yu ichi díí ìní, te ni sà dúhú ndàchiuⁿ tnahá-yu ñá túú ní cuíní-yu dàñá-yu.

10

Èⁿ espíritú xínú cuèchi núú Yá Ndiöxí néhé-xí ìⁿ librú

¹ Te sáta dúcáⁿ te ní xiní tucu-í ìⁿ espíritú cúnùu xinu cuechi núú Yá Ndiöxí ní quee-xi andiù, te yìhi-xi xití vícò cuãnguee-xi ñuyíú te ndàa díquí-xi ndècu ìⁿ cóó yáhnchí, te núú-xi súúní chàhnchí dàtná chàhnchí núú nchìcanchii, te ndi ndùú díhiⁿ-xi càa datná cáá itá ñuhu. ² Te nùndaha-xi ìⁿ librú líhli ní nandíca, te sáhá cùha-xi ní sani-xi núú ndute làmár, te sáhá dàtni-xi ní sani-xi núú ñuhu yìchí. ³ Te espíritú-áⁿ ñhi vèhi ní cáháⁿ-xi, te ní quide-xi dàtná quidé ìⁿ ndìcaha oré cánásàa-dì, te òré ducaⁿ ñhi vèhi ní cáháⁿ-xi te úsá xito ní cáháⁿ ñuhu. ⁴ Te sáta ñ yáha ní cáháⁿ ñuhu-áⁿ úsá xito, te chido tnùní-í ìⁿ núú tütú nàcuáa ní cáháⁿ-xi ní cùu, te mei òré-áⁿ ñ tecú dóho-í ní cáháⁿ ìⁿ sá ñ cáháⁿ andiù te càchí-xi:

—Vá chídó tnùní-n nàcuáa ní cáháⁿ ñuhu-áⁿ, iní mée-ní-n ná cùhuⁿ —duha càchí sá ñ cáháⁿ-áⁿ.

⁵ Te espíritú sá nútñí ìⁿ xio sáhá-xi núú ndute làmár-áⁿ ndihì ìngá xio sáhá-xi núú ñuhu yìchí-áⁿ ñ xiní-í ní ndonehe-xi ndaha cùha-xi, ⁶ te càchí-xi:

—Yá Ndiöxí Yaá ndécú nchàa nduu nchaa quíú Yaá ní cadúha ñuyíú, ndihì andiù, ndihì làmár,

ndihì nchaa sá ìó, Yaa-áⁿ náhá ndää-gá sá yǔhú cǎháⁿ ndáá-í, te vá cǔyàa vihi ⁷ te cada-xi nchaa nàcuáa ndùu tnúhu ndùu yuhu ní cǎháⁿ-gá, tnúhu ní xáhaⁿ-gǎ xii cue tée ní xinu cuechi nǔú-gǎ, cue tée ní xóo cǎháⁿ tnúhu-gá ndéé sanaha, chi òré ná tiú espíritú cúú ùsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá nǐ xáhaⁿ-gǎ xii nchaa cue tée-áⁿ —duha cǎchí espíritú-áⁿ.

⁸ Te sátá dúcáⁿ te ní tecú tucu dóho-í ní cǎháⁿ tucu sá nǐ cǎháⁿ andiu-áⁿ, te cǎchí-xi xii-í:

—Cuaháⁿ te queheⁿ-n lìbrú lǐhli sá nǐ nàndicá nùndàha espíritú-ǎⁿ, espíritú sá nútñǐ ìⁿ xio sáhá-xi nùú ndute làmár, te ìⁿ xio sáhá-xi nùú ñuhu yìchí — duha cǎchí sá nǐ cǎháⁿ-áⁿ.

⁹ Te yúhú ní sáháⁿ-í nùú ndécú espíritú-áⁿ xìcáⁿ-í lìbrú lǐhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cuvídí òré xíhí-n ndudí ñúúñú, dico xití-n chi cada úa-xi — cǎchí-xi.

¹⁰ Te ní queheⁿ-í lìbrú lǐhli nùndaha espíritú-áⁿ nǐ xexi-í, te yuhu-í ní quide vídí-xi dàtná vídí ndudí ñúúñú, dico sátá nǐ ngava-xi xití-í te ní quide úa-xi.

¹¹ Te ní cachí tucu espíritú-áⁿ xii-í:

—Dacuítí cǎháⁿ tucu-n nàcuáa cǎchí Yǎ Ndiǒxí cuèndá ñáyiu titní víhí nàcióⁿ, ndihì cuèndá ñáyiu titní víhí ñúú, ndihì cuèndá ñáyiu cǎháⁿ ndí dííⁿ ndí dííⁿ nùú tnúhu, ndihì cuèndá cue tée yìndaha ñáyiu.

11

Cuèndá úú cue té cǎháⁿ nàcuáa cǎchí Yǎ Ndiǒxí

¹ Te ní níhì-í ìⁿ tnuyoo nàcuáa chicùhá-í ìⁿ sá chicùhá-í, te ní cǎháⁿ ìⁿ sá nǐ cǎháⁿ, te cǎchí-xi:

—Ndacuíñí te chicùhá-n vèhe Yá Ndiöxí, te chicùhá tucu-n nũú sácödó sã ndúú tãhú-gã, te cahu-n nã daha tnàhá ñáyiú chĩñuhu ñaha xii-gá xĩndecu. ² Dico vá chícùhá-n ndàa quehé vehe-gá, chí xiáⁿ nĩ nduu cuendá cue ñáyiú ñá túú cùu ñáyiú isràél, te ñáyiú-áⁿ nduu nuu-nã-yu núú nĩ cuu ñuú-gá, te cadá-yu dàtná càchí iní méè-yu, te údico úú yóó ducaⁿ càdá-yu. ³ Te yúhú tendaha-í úú tnàhá cue téé cáháⁿ yuhu-í nàcuáa càchí Yã Ndiöxí, te úxúú cièndú únídico nduu ducaⁿ cãháⁿ-güedé yuhu-í cada-güedé núù-í, te cuihnu-güedé dóó tnúú sã sácuĩhnu cue ñáyiú ndĩhú iní-xi —duha càchí sã càháⁿ-áⁿ.

⁴ Te ndi ndúú cue téé-áⁿ cúú-güedé dàtná úú yutnu òlívú sã xĩnutnĩ núú Yã Ndiöxí, ndihi dàtná úú sã ndèè dité-xi, sã yíndòdo ìⁿ caa candíl núú dité-xi ndècu tucu núú-gã, te diu-gá cúú-gã Yaá yíndàha ñuyíú. ⁵ Te ñáyiú na càni iní-xi ná cada ñaha xì-güedé te yuhu-güedé quene ñuhú cahmi ñaha-xi xii-yu, te ducaⁿ càda-güedé cahni-güedé nchaa ñáyiú na cùu úhú iní ñáhá xì-güedé. ⁶ Te ndi ndúú-güedé ndécú ndihi-güedé tnúhu ndee iní cada-güedé sã vã cúúⁿ dǎú, te ducaⁿ càda-güedé nini cãháⁿ-güedé nàcuáa càchí Yã Ndiöxí, te ndacu-güedé nadatiu-güedé ndute nduu-xi níñí, te ndacu-güedé dandòho-güedé nchaa ñáyiú titní núú tnúhu ndòho, te ducaⁿ càda-güedé ná daha xito càchí iní méé-güedé. ⁷ Te nà yáha sã cãháⁿ-güedé nàcuáa ní cachí Yã Ndiöxí, te dàvá-áⁿ quene ìⁿ quiti dééⁿ yàú cùnú víhí sã ïo nèhé cáá, te quiti-áⁿ ngüita-di nàá-di ndihi ndi ndúú cue téé-áⁿ te cahni ñaha-di xì-güedé. ⁸ Te yiqui cùñú cue téé-áⁿ

cautùu-xi ìⁿ tnuú ñuú cáhnú nùu ní sahnì-güedé Xítóhó Jesucrístú núú cùrúxí, te ñuú Yaá-áⁿ cúu Xítóhó-ó ndìhi-güedé, te cächí ñáyiú sá ñuú-áⁿ cúu-xí dàtná ñuú Sòdomá ndìhi nàcióⁿ Ègíptú. ⁹ Te úní nduu dava cautùu yìqui cuñú-güedé xíáⁿ, te ñáyiú nchaa nàcióⁿ, ndìhi ñáyiú nchaa ñuú, ndìhi ñáyiú càháⁿ ndí dǐíⁿ ndí dǐíⁿ nùú tnǎhu, ndìhi ñáyiú xǐndecu nchaa xichi quíní-yu yìqui cùñú-güedé, te vá dáñǎ-yu nguíndǔxi. ¹⁰ Te nchaa ñáyiú-áⁿ nduu vétú ínì-yu sá dúcáⁿ cùú cue téé càháⁿ nàcuáa cächí Yá Ndiǒxí-áⁿ, te ío cudǐí ínì-yu, te nándi sá cuǎha táhú tnáhǎ-yu sá cudǐí ínì-yu sá dúcáⁿ nǐ xíhí-güedé, te ducaⁿ chí ñuú-güedé ní quide ío ní ndohó-yu. ¹¹ Te sátá ná yǎhá úní nduu dava sá dúcáⁿ cùú-güedé te Yá Ndiǒxí dandòto ñaha-gá xii-güedé, te ndacóo-güedé, te nchaa ñáyiú na quíní sá ndótó-güedé te yùhú víhǐ-yu. ¹² Te ndí nduú cue téé-áⁿ tecú dóho-güedé càháⁿ ìⁿ sá càháⁿ ndéé andiú, te cúñaha-xi xii-güedé:

—Chí táquène iha —duha cúñaha sǎ càháⁿ-áⁿ xii-güedé.

Te cue téé-áⁿ quǐhu-güedé ìⁿ xítí vícò caa-güedé andiú, te nchaa ñáyiú cùu úhú ínì ñáhá xii-güedé quíní ñáhǎ-yu xii-güedé caa-güedé andiú. ¹³ Te òré-áⁿ nǐhi víhi tnáa ñuyíú, te úxí xichi cùu-xi ñuú núú cùndècu-güedé-áⁿ te ìⁿ xichi ñuú-áⁿ naa, te cuú úsá mǐl ñáyiú, te nchaa dava-gá ñáyiú cácu vá cùú yùhú víhǐ-yu, te cachí-yu sá ío càhnu cuu Yá Ndiǒxí Yaá ndécú àndiú.

¹⁴ Te tnúndòho-a cuu-xi tnúndòho cuu úú yáha, te vitna sa ndètu víí-nǎ tucu sáá tnúndòho cuu únì.

Espíritú cúú ùsá tíú-xi cútú néhé-xí

¹⁵ Te espíritú cúú ùsá ní tíú-xi cútú néhé-xí, te òré-áⁿ ñí tecú níhi ní cáháⁿ títní sá ñí cáháⁿ andíu, te càchí-xi:

Nchaa sá cúú cuèndá nchaa ñáyíu ñuyíú táxí
tnùní-yu ní cùu ní nduu cuèndá Tātá-ó Dútú
Ndiǒxí táxí tnùní-gá,

Te tnàhá Yaá ní tendaha-gă ní sáháⁿ ñuyíú táxí
tnùní-gá nchaa xíăⁿ,

te ðíu-gá taxi tnùní-gá ní caa ní quíhíⁿ.

Duha ní cáháⁿ nchaa sá ñí cáháⁿ-áⁿ. ¹⁶ Te ndi
òcò cùmí cue téé sacuéhé xñucóo núú xilé váha
ní ngüñí xítí-güedě núú Yă Ndiǒxí, te ní nuu
núú-güedě ndàa núú ñúhú te ní ngüíta-güedé
chíñùhu ñaha-güedé xii-gá, ¹⁷ te càchí-güedé:

Ío ndàcáⁿ táhú-ndí núú yòhó Dútú Ndiǒxí,

Yaá ndácú quide nchaandi túhú sá vâha,

te ðíu-ni-n ndècu-n ndéé cútñàhá ní ngáva ñuyíú, te
ðíu-ni-n ndècu-n vitna, te ðíu-ni-n cùndecu-n
ndéé núú cuàháⁿ núú vëxi,

te ío càhnu cuu-n te ní ngüíta-n ïo-gá táxí tnùní-n.

¹⁸ Te nchaa ñáyíu xñndecu ñuyíú xícudéⁿ-yu núú-n,
te vitna ní sáá nduu dândohó-n-yu chi ñá túú cùu
váha iní-n nũ-yu,

te cada ndáá-n cuèchi nchaa ñáyíu sa ní xíhí,

te ní sáá tucu nduu cuăñaha-n sã ndúú tãhú nchaa
ñáyíu ní xinu cuechi nũú-n ñí cáháⁿ-yu
tnúhu-n, ndíhi nchaa dava-gá ñáyíu cùu
cuendá-n, chi ñáyíu-áⁿ néhë-yu sá yíñùhu
núú-n,

te cuèi ñáyíu cùnnu ndíhi ñáyíu ñá túú cùnnu
cuăñaha-n sã ndúú tãhü-yu,

te ní sáá tucu nduu dànaa-n nchaa ñáyiú sàhni
tnaha ñáyiú-xi.

Duha càchí ndi òcò cùmí cue téé sacuéhé-ǎⁿ
xàhaⁿ-güedě xii Yá Ndiǒxí.

¹⁹ Te ní xiní-í ní nacaáⁿ yuyèhe vehe Yá Ndiǒxí
andiú, te xití vehe-gá-áⁿ ñí xiní-í ndécú càjà ñúhú
sǎ yódó tnùnì nàcuáa ní cundáá cada-gá sá cúú-xí
ñáyiú, te òré-áⁿ ñí xiní-í ní sáá ndúté, te ní cáháⁿ
ñúhu te ío dusaⁿ ñí guide-xi, te níhi vìhi ní tnáa, te
súúnì càhnu dáú ñíñí ñí cuuⁿ.

12

*Cuèndá ñⁿ ñadìhí ndihì cuèndá ñⁿ quitì dééⁿ nání
dràgón*

¹ Te ío vìhi ní guide-xi ñⁿ sá ñí guide-xi andiú,
te ní xiní-í ñⁿ ñadìhí te dóó níhnú-áⁿ guide-xi datná
quidé-xí nùú nchĩcanchii, te ndàa núú sàhá-aⁿ
guide-xi datná quidé-xí nùú yǒó, te ñúhu ñⁿ coroná
díquí-aⁿ te ndèé úxúú chódínì. ² Te ñúhu déhe-aⁿ te
càna saa-aⁿ sá quidé úhú ñáhá-xí xii-aⁿ chi sa ndètu
vii-nǎ cacu déhe-aⁿ. ³ Te dǎtnùnì ní guide tucu-xi
sá ñí guide-xi andiú, te ní xiní-í ñⁿ quitì càhnu
quitì ticuehé, quitì dééⁿ nání dràgón, te ndèé úsá
díquí-dì ndihì úxí ndiqui-dì, te ñⁿ caa coróná ñúhú
ñⁿ caa díquí-dì-áⁿ. ⁴ Te quitì-áⁿ luha-ná te cuu dava
nchaa chódínì dǎngòyo-dì ñuyíú ndihì lúhmá-dì,
te quitì-áⁿ nì ngúnu tní-dì núú ñaha ndètu vii-nǎ
cacu déhe-xi-áⁿ cuèndá caxi-dì déhe-aⁿ òré cacu ni
cùu. ⁵ Te ñaha-áⁿ ñí cacu déhe-aⁿ te téé cùu-dé, te
té lĩhli-áⁿ ío cunuu-dě taxi tnùnì-dé nchaa ñáyiú
ñuyíú, te mee Yá Ndiǒxí ní nacuaca ñaha-gǎ xii té
lĩhli-áⁿ cuèndá cundecu ndihì ñaha-dě xii-gá núú

ndécú-gă táxí tnùnı-gá. ⁶ Te ñadhı́-án nı́ xınu-aⁿ cuáháⁿ-aⁿ xıtı́ yucu núú nı́ quide túha Yá Ndiöxı́ cundecu-aⁿ cuëndá xı́áⁿ nı́hı́-aⁿ caxı-aⁿ, te ducaⁿ nı́hı́-aⁿ sá cáxı́-áⁿ ùxúú ciëndú únı́dico nduu chi ducaⁿ ndúu cundecu-aⁿ xı́áⁿ.

⁷ Te sáta dúcáⁿ te andıu nı́ xıní-ı́ espı́ritú cúnúu xınu cuechi núú Yă Ndiöxı́ nánı Mı́guél, ndıhi nchaa dava-gá espı́ritú cúndıhi-xı, te nchaa espı́ritú-áⁿ nàá-xı ndıhi quıtı́ dééⁿ nánı drágón ndıhi nchaa espı́ritú cúndıhi-dı. ⁸ Te quıtı́-áⁿ ñà túú ní ndàcu-dı ndıhi nchaa espı́ritú cúndıhi-dı, te ñá túú ní nı́hı́-gă-dı núú cúndècu-dı andıu ndıhi nchaa espı́ritú cúndıhi-dı-áⁿ. ⁹ Te cue espı́ritú xınú cuèchi núú Yă Ndiöxı́-áⁿ nı́ dąngává-xı quıtı́ dééⁿ nánı drágón-áⁿ ndıhi nchaa espı́ritú cúndıhi-dı ñuyı́ú, te quıtı́-áⁿ cúu-dı mèi sácı́hná àdi sá càchı́-ó cùu yucu ñávàha, te dıu xı́áⁿ ní dándàhú-xı ñáyıu nı́hı́ ñuyı́ú, te dıu-nı́ xı́áⁿ ní nduu-xı cóó nı́ dándàhú-xı ñáyıu ndéé sanaha.

¹⁰ Te ní tecú dóho-ı́ níhi ní cáháⁿ tucu ñⁿ sá nı́ cáháⁿ andıu, te càchı́-xı:

—Vitna te Yá Ndiöxı́ ní quide-gá ní ngúndecu ñáyıu ndıhi-gá, te ío càhnu cuu-gá, te ío tàxi tnunı́-gá, te tnàhá Crı́stú Yaá ní tendaha Yă Ndiöxı́ ní quıxı ñuyı́ú-a ío tàxi tnunı́-gá, te ducaⁿ chi sa ní xócuı́ñı́ sácı́hná sã sũúnı́ núnúu sacáⁿ cuèchi núú Tátá-ó Dütú Ndiöxı́ cuëndá nchaa ñáyıu ndècu ndıhi-o ichı́-gá, te nduu niú ducaⁿ sácáⁿ cuèchi-xı núú-gă cuëndá-yu ni cùu. ¹¹ Dico ní ndacú-yu ní cunúú-yu núú sácı́hná sã dúcáⁿ sácáⁿ cuèchi cuëndá-yu-áⁿ ní cùu, te ducaⁿ nı́ cunúú-yu sá cuëndá Yaá cáá dàtná cáá ñⁿ mbéé quıtı́ ní

dánĭcuèhé-güedé, chi Yaá-áⁿ ñĩ sati ñĩñĩ-gă te ní xíhí-gá sá cuendá-yu, te ducaⁿ ñĩ cunuu tùcú-yu sá cuendá sá sàndáá iní ñáhă-yu xii Yaá-áⁿ, te ñá túú ní yùhú-yu cuú-yu sá cuendá-gá. ¹² Te vitna ío chí cúdĭ iní nchaa nchòhó espíritú xínú cuèchi núú Yă Ndiöxí, ndihí nchaa nchòhó ñáyiu ndècu andiu, dico ĩndàhú ní cuu nchaa ñáyiu xĩndecu ñihĩ ñuyú! Chi súúní cùdéeⁿ sàcuíhná ñĩ ngava-xi te nándi cada ñaha-xi xii-yu, te ducaⁿ chi cùtnuní iní-xi sá sàcú duha-ná nduu cudí-xi cundecu-xi —duha càchí sá ñĩ cáháⁿ andiu.

¹³ Te sátá ñĩ quee quiti déeⁿ nání dragón-áⁿ andiu ñĩ ngava-di ñuyú quiti cùu mei sàcuíhná-ăⁿ, te quiti-áⁿ ñĩ chinchícúⁿ-di ñadìhí ñaha ní cacu déhe téé-xi-áⁿ. ¹⁴ Te ñadìhí-áⁿ ñĩ nduu táhú-aⁿ ní quene úú ndíxí-aⁿ, te càa datná cáá ndíxíⁿ ĩⁿ yacòlo cahnu vihi cuendá ndava-aⁿ núhú-aⁿ yucu núú ñĩ cachí Yă Ndiöxí cundecu-aⁿ, te yàcáⁿ cundecu-aⁿ úní cuíá dava cuendá sá vă ñihí ñáhá quiti déeⁿ quiti nàni dragón-áⁿ te xíáⁿ ñihí-aⁿ sá cáxí-áⁿ, te quiti-áⁿ cúú tùcu-di datná ĩⁿ cóó dĕeⁿ. ¹⁵ Te quiti-áⁿ ñĩ quene cuéhé ndute yuhu-di, te ndute ní quene yuhu-di-áⁿ ñĩ cuu-xi ĩⁿ yúte, te ducaⁿ ñĩ quide-di cuendá ndute-áⁿ cuido-xi ñadìhí-áⁿ ní cùu. ¹⁶ Te ñuhu yìchí ní chindee-xi ñadìhí-áⁿ, chi ní ndátá te ní quee naa-ni ndute ní quene yuhu quiti-áⁿ. ¹⁷ Te sá dúcáⁿ ñĩ quide-xi xíăⁿ ní cudéeⁿ víhí quiti-áⁿ núú ñadìhí-áⁿ, te ní xica-di cuáháⁿ-di núú xĩndecu nchaa dava-gá cue déhe ñadìhí-áⁿ cuendá nàá ndihí ñaha-di, te ñáyiu-áⁿ cúŭ-yu ñáyiu tñi nchaa tñuhu càháⁿ Yă Ndiöxí, te nchìcúⁿ ñihnú-yu nchaa tñuhu sá càháⁿ váha cuendá Xítóhó Jesucrístú.

13

Cuèndá úú quitì

¹ Te yúhú ní ngúnu tní-í yuhu làmár, te ní xiní-í ní quene ìⁿ quitì te ndèé úsá díquí-di te úxí ndiqui-di, te núú ìⁿ ìⁿ ndiqui-di-áⁿ ndécú ìⁿ caa coroná. Te ìⁿ ìⁿ díquí-di-áⁿ ndèé tnúhu sá càháⁿ úhú-xi cuèndá Yá Ndiòxí. ² Te quitì-áⁿ cáá-dí dàtná cáá cuiñí, te sáhá-di càa datná cáá sáhá òso, te yuhu-di càa datná cáá yùhu ndicaha. Te quitì dééⁿ nání dragón ní sáñaha-di tnúhu ndee ìní xii quitì-áⁿ cuèndá taxi tnùnì víhí-dí, te dragón-áⁿ nǐ sáñaha-di núú ndécú-dí tàxi tnuní-di xii quitì ní quene xití làmár-áⁿ, te ducaⁿ nǐ quide-di cuèndá sá nihí ndéé quitì-áⁿ cunuu-di. ³ Te ìⁿ díquí quitì ní quene xití làmár-áⁿ càhú víhí càa ní nícuèhé, te sa ndètu vií-nǎ cuú-di sànuu dico ní ndúha-di, te nihí ñuyíú nǐ nihí ñáyiú tnúhu sá dúcáⁿ nǐ cuu, te ío ní cuñúhu-yu te ní tuhá-yu quitì-áⁿ. ⁴ Te nchaa ñáyiú-áⁿ nǐ cachí-yu sá ío càhnu cuu quitì dééⁿ quitì nàni dragón-áⁿ cuèndá sá nǐ sáñaha-di tnúhu ndee ìní sá táxí tnùnì quitì ní quene xití làmár-áⁿ, te ní ngúíta-yu ní chiñuhú-yu quitì ní quene xití làmár-áⁿ, te càchí-yu:

—Vá yõo ìⁿ nǔtnahá ñáhá xì quitì-a, te nǐ vǎ yõo ìⁿ ndacu nàa ndihí ñaha xì-di —cachí-yu.

⁵ Te ní nihí-di tnúhu ndee ìní sá càháⁿ úhú-di Yá Ndiòxí, te cada càhnu-di mee-di, te údico úú yóo ducaⁿ nǐ nihí-di tnúhu ndee ìní-áⁿ cunuu-di. ⁶ Te ducaⁿ nǐ quide-di ní càháⁿ úhú-di Yá Ndiòxí ndihí cuèndá nchaa sá quidé-gǎ, te diu-ni ducaⁿ nǐ càháⁿ úhú-di núú ndécú-gǎ, te ní càháⁿ úhú tucu-di nchaa ñáyiú ndècu ndihí-gá andiu. ⁷ Te ducaⁿ nǐ nihí-di

tnúhu ndee ìní sá nàá-di ndihì nchaa ñáyiù cùu cuendá Yã Ndiõxí, te ducaⁿ nàá ndihì ñaha-di xii-yu ndéé òré vá ndácú-gã-yu nàá ndihì ñàhá-yu xii-di, te tnàhá ní ngúndecu ndihì-di tnúhu ndee ìní sá táxí tnùnì-di ñáyiù nchaa nàcióⁿ, ndihì ñáyiù nchaa ñuú, ndihì nchaa ñáyiù càháⁿ ndí dííⁿ ndí dííⁿ núú tnúhu, ndihì ñáyiù xíndecu nchaa xichì. ⁸ Te cue ñáyiù ñihì ñuyíú ñí cachí-yu sá ïo càhnu cuu quiti-áⁿ, te ñáyiù-áⁿ cúy-yu ñáyiù ñá túú yòdo tnuní núú tütú Yaá cáá dàtná cáá ìⁿ mbéé quiti ní dánicuehé-güedé Yaá ní xihí ní cùu te ní ndoto. Te ndéé cùtnàhá ní ngáva ñuyíú sa yòdo tnuní ñáyiù naníhí tàhú, dico ñáyiù càhí sá ïo càhnu cuu quiti-áⁿ ñà túú yòdo tnuní-yu núú tütú-gá.

⁹ Te nchaa nchòhó ñáyiù xíndedóho chí cùndedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáyiù na chihì tnaha ñáyiù-xi vecaá te sáá nduu te quihíⁿ-yu tnàhá-yu vecaá, te nchaa ñáyiù sàhni tnaha ñáyiù-xi ndihì yuchí te ñu-ni ndihì yuchí cuú-yu tnàhá-yu, te xíáⁿ núu ío xini ñuhu-xi sá ncháá ñáyiù cùu cuendá Yã Ndiõxí cunduu càhnu iní-yu, te quindáá iní ñáhã-yu xii-gá.

¹¹ Te ní xiní tucu-í ingá quiti ní quene-di núú ñuhu yichí, te ndéé úú ndiqui-di te càa datná cáá ndiqui canerú, te càháⁿ-di dàtná càháⁿ quiti dééⁿ naní dràgón. ¹² Te dàtná ndécú ndihì quiti ní quene xití làmár-áⁿ tnúhu ndee ìní sá táxí tnùnì-di ducaⁿ ndècu ndihì quiti ní quene ñuhu yichí-áⁿ tnúhu ndee ìní taxi tnùnì-di cada-di núú quiti ní quene xití làmár-áⁿ, te quiti ní quene ñuhu yichí-áⁿ ñí quide yica-di sã ncháá ñáyiù xíndecu ñihì ñuyíú

chiñuhú-yu quitì ní quene xití làmár-án, quitì càhú víhí nǐ tnahá ní nícuèhé te ní ndúha-di. ¹³ Te quitì ní quene xití ñuhu yìchí-án nǐ quide-di titní núú sǎ vǎ yǒo tnahí ndàcu cada, te nchaa ñáyiú ní xiní-yu sá ndèé andiú nǐ dǎngóyó-dí ñuhú ñuyíú. ¹⁴ Te sá dúcáⁿ nǐ ngúndecu ndìhi-di tnúhu ndee ìní ní quide-di nchaa xǎⁿ ní quide-di núú quitì ní quene xití làmár-án, te sá dúcáⁿ nǐ quide-di te xǎⁿ ní dándàhú-di nchaa ñáyiú xǐndecu ñhì ñuyíú, te ní xáhaⁿ-di xǐ-yu sá ndúcǔ-yu ìⁿ sá cǎdǔha-yu nàcuáa-ni cǎa nacuáa-ni ndùu quitì ní quene xití làmár-án, quitì càhú víhí nǐ tnahá ní nícuèhé díquí-xi-án nǐ quée machití te ñá túú ní xǐhí-di chí ní xǐndecu-ni-di. ¹⁵ Te quitì ní quene xití ñuhu yìchí ní ngúndecu ndìhi tucu-di tnúhu ndee ìní sá chíhí-dí ìní sá nǐ cadúha-yu-án, sá nǐ natavá-yu dàtná cáá quitì ní quene xití làmár-án, te ducaⁿ nǐ quide quitì-án cuèndá cáháⁿ sá nǐ cadúha-yu-án, te xǎⁿ cada-xi cuú nchaa ñáyiú ñá túú ní cuìní chiñuhu ñaha xii-di. ¹⁶ Te quitì ní quene xití ñuhu-án quídé-dí sǎ ncháá ñáyiú ngúndéé ìⁿ tnuní ndaha cùhá-yu àdi tneé-yu, te ducaⁿ nǐ quide-di cuèi ñáyiú cùnūu te cuèi ñáyiú ñá túú cùnūu, te cuèi ñáyiú cuica te cuèi ñáyiú ndàhú, te cuèi ñáyiú ñá túú dàñá quee núú chíúⁿ pàtróóⁿ-xi, te cuèi nchaa ñáyiú dàñá quée núú chíúⁿ pàtróóⁿ-xi ncháá-yu ducaⁿ nǐ ngúndéé tnuní ñhí-yu. ¹⁷ Te ní quide-di sá ncháá ñáyiú ñá túú ndèé tnuní ñhí-xi vǎ cúu cuááⁿ-yu sá cǎchí ìní-yu te ni vǎ cúu dícó-yu ìⁿ sá cuìní-yu dícó-yu, te tnuní-án cúu-xí dǐu quitì

ní quene xití làmár-áⁿ àdi númerú-di. 18 Te xìni ñuhu-xi sá ncháá ñáyu ío váha cùtnuní iní-xi ío váha cuáha-yu cuèndá nàcuáa quèe-xi númerú quití-áⁿ, te númerú-áⁿ cúú-xí ñnú cièndú únídico ñnú, te cùu-xi cuendá ñⁿ ñáyu ñuyíú.

14

Cuèndá ñⁿ cièndú údico cúmí mǐ ñáyu

1 Te sátá dúcáⁿ te ní xiní-í Yaá cáá dàtná cáá ñⁿ mbéé quití ní dánícuèhé-güedé nútní-gá ñⁿ yucu ñúú nání Sìon ndécú àndi^u, te nutní-gá ndihí ñⁿ cièndú údico cúmí mǐ ñáyu, te tneé-yu ndèè diu-gá ndihí diu tátá-gǎ Dútú Ndiöxí. 2 Te ní tecú dóho-í ní guide-xi andi^u dàtná quidé-xí nùú xíca cuèhé víhí ndùte, te quide tucu-xi datná quidé-xí òré níhi víhi caháⁿ ñúhu, te quide tucu-xi datná quidé-xí òré cuèhé víhí ñáyu caní-yu àrpá. 3 Te ní tecú dóho-í xíxita yuhu sǎ xítá yùhu núú Yàá núcõo núú xilé váha, ndihí núú ndi cùmí cue quití xñnutní-áⁿ, ndihí núú ncháa cue téé cùu sacuéhé xñnucóo-áⁿ, te xíxita-xi ñⁿ ndudú sáá. Te mee-ni cuè ñáyu ñⁿ cièndú údico cúmí mǐ-áⁿ quèe díquí-yu ndudú-áⁿ, te ñáyu-áⁿ cúú-yu ñáyu ní dácácu nihnu ñaha Yàá cáá dàtná cáá ñⁿ mbéé quití ní dánícuèhé-güedé núú ñáyu ndècu ichi cuehé ichi duha xñndecu ñuyíú, te vá yõ ñⁿ-gá quèe díquí-xi ndudú sáá-áⁿ chi mee-ni ñáyu ní cácu nihnu-áⁿ quèe díquí-yu. 4 Te ñáyu ní cácu nihnu-áⁿ cúú-yu ñáyu ñá túú ní xñndecu ichi díí iní, te cùú-yu ñáyu cándoo canine iní-xi, te ndèni ní cuu cuáháⁿ Yaá cáá dàtná cáá ñⁿ mbéé quití ní nícuèhé-áⁿ, te ducaⁿ-ni ndëndaha ñàhá-yu xii-gá

cuáháⁿ, te ñáyi-u-áⁿ ñí cácu nihnú-yu núú nchàa ñáyi-u ñuyíú, ñáyi-u ndècu ichi cuehé ichi duha, te ñáyi-u ní cácu nihnu-áⁿ cúũ-yu ñáyi-u díhna nuu ñí nduu táhú Yá Ndiõxí cuu cuendá-gá ndihí Yaá cáá dàtná cáá ìⁿ mbéé quiti ní dánñcuèhé-güedé. ⁵ Te cùú-yu ñáyi-u ñá túú càháⁿ ñí ìⁿ tnúhu ndehnde, te càndoo canine iní-yu ndècú-yu núú núcõo Yá Ndiõxí táxí tnùnì-gá.

Cuendá úní cue espíritú xínú cuèchi núú Yá Ndiõxí

⁶ Te sátá dúcáⁿ te ní xiní-í ìⁿ espíritú xínú cuèchi núú Yá Ndiõxí xícó-xí cuädava andíu, te ndècu ndihí-xi tnúhu sá càháⁿ nàcuáa naníhí tàhú-ó, tnúhu sá ñà túú tnàhí ndihí nihnu te tnúhu-áⁿ danèhé espíritú-aⁿ nchaa ñáyi-u ndècu ñuyíú, ñáyi-u nchaa nàcióⁿ, ndihí ñáyi-u nchaa ñuú, ndihí nchaa ñáyi-u càháⁿ ndí dñⁿ ndí dñⁿ núú tnúhu, ndihí ñáyi-u xíndecu nchaa xichi. ⁷ Te níhi ní cáháⁿ-xi te càchí-xi:

—Nchaa nchòhó ñáyi-u ndècu ñuyíú canehe-ndo sã yíñùhu núú Yá Ndiõxí, te cachí-ndó sã ïo càhnu cuu-gá chi sa ní sáá nduu càda ndáá-gá nchaa cuèchi-ndo, te chiñuhu-ndo-gã chi diu-gá ní cadúha-gá andíu, ndihí ñuhu yìchí, ndihí làmár, ndihí nchaa ndóhyo —duha càchí espíritú-áⁿ.

⁸ Te nchìcúⁿ tucu ìngá espíritú xínú cuèchi núú Yá Ndiõxí, te càchí-xi:

—Vitna ní naa ñuú Babiloniá ñuú ío cùnuu, te ducaⁿ ñí naa chi cue ñáyi-u ñuú-áⁿ ñí quidé-yu ní xíta nihnu nchaa ñáyi-u nihí ñuyíú, chi ní sanu ichi ñàhá-yu ichi cuehé ichi duha —duha càchí espíritú-áⁿ.

⁹ Te nchìcúⁿ tucu ìngá espíritú xínú cuèchi núú Yá Ndiõxí te níhi càháⁿ-xi, te càchí-xi:

—Nchaa ñáyiú chîñuhu ñaha xii quiti ní quene xití làmár, ndihi sá ñí natava ñàhá-yu nàcuáa càa-di-án, ñáyiú ní dáñá mée-xi ní ngúndeé tnuní ndahá-yu àdi tneé-yu, ¹⁰ ñáyiú-án sùúni dándoho ñaha Yá Ndiöxí xií-yu chi ío cùdééⁿ-gã, te ducaⁿ ïo dandòho ñaha-gá xií-yu chi daquihíⁿ ñàhá-gã xií-yu núú ñùhú núú ñùhú àzufré càyú-xi, te núú cuè espíritú xínú cuèchi núú-gã ducaⁿ dándoho ñaha-gá xií-yu, ndihi núú Yàá cáá dàtná cáá ìⁿ mbéé quiti ní dánicuehé-güedé. ¹¹ Te ni caa ni quihíⁿ quene ñùhmá núú dúcáⁿ cùndecú-yu ndohó-yu-án, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyiú chîñuhu ñaha xii quiti ní quene xití làmár, ndihi sá ñí natava ñàhá-yu nàcuáa càa-di-án, te diu-ni ñáyiú-án cúú-yu ñáyiú ní ngúndeé tnuní ndaha-xi àdi tneé-xi —duha càchí espíritú-án.

¹² Te xíáⁿ xíní ñùhu-xi sá ncháá ñáyiú cùu cuendá Yá Ndiöxí cunduu càhnu iní-yu, chi diu-ní-yu cùú-yu ñáyiú tnì nchaa tnúhu càháⁿ-gá, te ni yùhu ni iní-yu sàndáá iní-yu Xítóhó Jesucrìstú.

¹³ Te sátá dúcáⁿ te ní tecú dóho-í ní cáháⁿ ìⁿ sá ñí cáháⁿ andiú, te càchí-xi:

—Chido tnùnì-n ìⁿ núú tütú nàcuáa na càháⁿ-í-a. “Není vitna ío váha táhú nchaa ñáyiú sàndáá iní tnúhu Xítóhó Jesucrìstú te xihí-yu” —duha càchí sá ñí cáháⁿ-án.

Te Espíritú Yá Ndiöxí ní cáháⁿ-xi, te càchí-xi:

—Ndáá, chi ndetatú-yu chi ñá túú-gã nágá chiuⁿ ndohó-yu cadá-yu, te Yá Ndiöxí sa nàha-gá nchaa nàcuáa ndùu chiuⁿ ní quidé-yu —duha càchí Espíritú-gá.

Nchaa sá cúú núú ñùhú

14 Te sáta dúcáⁿ te dǎtnùní ní xiní-í ìⁿ vícò cuèxíⁿ, te núú vícò-ǎⁿ ñí xiní-í núcòò ìⁿ Yaá, te càa-gá dǎtná cáá ìⁿ téè ñuyúú, te díquí-gǎ ñúhú ìⁿ coroná ní cuáha mee-ni díhúⁿ cuááⁿ, te nùndaha-gá ìⁿ yuchí ndíquí te súúní dǎéⁿ. 15 Te ní xiní-í ìⁿ espíritú xínú cuèchi núú Yǎ Ndiǒxí ní quee-xi xítí vehe-gá, te níhi ní cáháⁿ-xi xǎhaⁿ-xi xìi Yaá núcòò núú vícò-ǎⁿ:

—Sa ní cuu nàquehdé-n nchàa sá ñí cuu ñuyúú ndìhi yuchí ndíquí-n, chí sa ní cuu nucóò tnàha-xi —duha càchí espíritú-áⁿ xǎhaⁿ-xi xìi Yaá-áⁿ.

16 Te Yaá núcòò núú vícò-ǎⁿ ñí dáyǎha ndodo-gá yuchí ndíquí-gǎ núú ñùyúú ñí nataxi tnàha-gá nchaa sá ñí cuu.

17 Te ní xiní tucu-í ìngá espíritú xínú cuèchi núú Yǎ Ndiǒxí ní quee-xi xítí vehe-gá sá cáá àndiú, te nùndaha-xi tnahá-xi ìⁿ yuchí ndíquí dǎéⁿ. 18 Te ní xiní tucu-í ní quee tucu ìngá espíritú xínú cuèchi núú Yǎ Ndiǒxí núú nútñí núú sácòdó sǎ ndúú tǎhú-gǎ, te ndècu ndìhi-xi tnúhu ndee ìní táxí tnùní-xi ñuhú, te espíritú-áⁿ ñíhi ní cáháⁿ-xi xǎhaⁿ-xi xìi espíritú néhé yùchí ndíquí dǎéⁿ-áⁿ:

—Ngüíta naquehdé-n ndìhi yuchí ndíquí-n ndǎhé yoho yàha stilé sá ìó ñuyúú chí sa ní cuu nàtehdé —duha càchí espíritú-áⁿ xǎhaⁿ-xi xìi espíritú néhé yùchí ndíquí-ǎⁿ.

19 Te espíritú néhé yùchí ndíquí-ǎⁿ ñí dáyǎha ndodo-xi yuchí ndíquí-xí núú ñùyúú ñí nàquehdé-xi nchaa ndǎhé yoho yàha stilé, te ní chíhi-xi ìⁿ xichi núú ñí chíhi-xi cuèndá xíáⁿ quihni-xi quee ndudí-xi, te sá dúcáⁿ ñí quide-xi xíáⁿ cútnùní ìní-ó sǎ ìo cùdǎéⁿ Yǎ Ndiǒxí núú ñǎyiu

ñuyíú. ²⁰ Te ndéhé yoho yàha stilé-áⁿ nǐ quihni-xi ñⁿ xio yuhu ñùú, te ndudí ndéhé yoho yàha stilé-áⁿ nǐ nduu-xi níñí te ní quee-xi núú quíhni ñihnu espíritú-áⁿ. Te úní cièndú mǐl mētrú ní xica níñí-ǎⁿ, te dàtná ñⁿ mētrú dava ní sáá cuehnu níñí-ǎⁿ nǐ xica-xi.

15

Úsá tnúndòho

¹ Te ío vìhi ní quide-xi ñⁿ sá nǐ quide-xi andiú te ní cuñúhu vìhi-í, te ní xiní-í úsá tnàhá espíritú xínú cuèchi núú Yá Ndiòxí, te ñⁿ ñⁿ cue espíritú-áⁿ ndécú ndìhi-xi tnúhu ndee ìní dandòho-xi ñáyiú ñuyíú, te nà yáha nchaa tnúndòho-áⁿ, te vá cúdeéⁿ-gǎ Yá Ndiòxí núú-yu dàndòho ñaha-gá xií-yu.

² Te ní xiní-í ñⁿ làmár te ndute làmár-áⁿ cáá dàtná cáá vǐdriú, te dácánuu-xi ndìhi ñuhú, te yuhu làmár-áⁿ xǐnutní nchaa ñáyiú ní ndacu ní dáquéé tǐhú ñàhá xì quiti ní quene xití làmár-áⁿ, te ducaⁿ nǐ ndacú-yu ní dáquéé tǐhǔ-yu sá nǐ natava ñàhá-yu nàcuáa càa-di-áⁿ, te ducaⁿ nǐ ndacu tucú-yu ní dáquéé tǐhú tucú-yu númerú-di sá cúú dàtná diú-di, te nchaa ñáyiú-áⁿ nǐ nduu táhǔ-yu núú Yá Ndiòxí àrpá xǐnehé-yu cuèndá caní-yu. ³ Te xǐxitá-yu ndudú sá nǐ xita ndí Moisés ndí ní xinu cuechi núú Yá Ndiòxí ndéé sanaha, te xita tucú-yu ndudú Yaá cáá dàtná cáá ñⁿ mbéé quiti ní dánícuèhé-güedé, te càchí-yu:

Yòhó Dútú Ndiòxí ío càhnu cuu-n, chi quide-n nchaa sá vǎ yòo tnàhí ndàcu cada, te cùu-n Yaá ndácú quide nchaandi túhú sá vǎha,

te ío ndáá quidé-n te ío ndáá càháⁿ-n, te yìndaha-n
nchaa ñáyiú ñihì ñuyíú.

⁴Te nchaa ñáyiú nèhé-yu sá yíñùhu núú-n,
te ncháá-yu càchí-yu sá ïo càhnu cuu-n,
chi ñⁿdìi díi-ni yòhó cúú-n Yáá ío váha quide ndáá,
te nchaa ñáyiú ñihì ñuyíú nataká-yu chiñuhu
ñàhá-yu xii-n,
te ducaⁿ càdá-yu chi ndèhé-yu nchaa sá vâha
quide-n.

Duha càchí ñáyiú-áⁿ xíxitá-yu.

⁵Te sátá dúcáⁿ te ní xiní-í ní nacaáⁿ yuyèhe
vehe Yá Ndiöxí andiu, te xití vehe-gá-áⁿ ndécú
sã ndèé tnúhu-gá. ⁶Te xití vehe-gá-áⁿ ñi quee
úsá tnàhá espíritú xínú cuèchi núú-gã, te ñⁿ ñⁿ-xi
ndècu ndihí-xi tnúhu ndee ìní dandòho-xi ñáyiú, te
xíxíhnu-xi mee-ni dõó vâha, te súúni vâha càndoo,
te chàhnchí, te yìdúcúⁿnuu cìnchú ní cuáha mee-ni
dĩhúⁿ cuááⁿ pèchú ndi ùsá cue espíritú-áⁿ. ⁷Te ñⁿ
quití cúmí xĩnutnĩⁿ núú nútnĩⁿ xilé váha ní sãñaha-dí
ñⁿ caa sá nàhá tícùú ní cuáha mee-ni dĩhúⁿ cuááⁿ
xii ñⁿ ñⁿ espíritú-áⁿ, te xití nchaa tícùú-áⁿ ñúhú ñⁿ sá
ñúhú te xíáⁿ cútnùní sá Yá Ndiöxí dandòho-gá ñáyiú
ñuyíú, te diu-gá cúú-gã Yáá ndécú nchaa nduu
nchaa quíú. ⁸Te xití vehe-gá-áⁿ ñi chítú ñúhmá, te
ducaⁿ ñi quide-gá cuendá cutnùní ìní ñáyiú sá ïo
càhnu cuu-gá táxí tnùní-gá, te vá yõo ñⁿ cuu quíhu
xití vehe-gá-áⁿ ndèé ndihí ndi ùsá tnúndòho cada
ndi usá cue espíritú-áⁿ ñuyíú.

16

Tnúndòho cada-xi ñuyíú

¹ Te sáta dúcáⁿ te ní tecú dóho-í níhi ní cáháⁿ ìⁿ sá ñí cáháⁿ xítí vehe Yá Ndiǒxí, te xǎhaⁿ-xi xìi ndi usá cue espíritú-áⁿ:

—Chí cuàháⁿ coyo-ndo sǎ ñúhú xítí nchaa tícùú néhé-ndó-ǎⁿ nǔú ñùyíú, chí sá ñúhú-ǎⁿ cúú-xí tnǔndòho tendaha Yá Ndiǒxí sá cúú-xí nchaa ñáyíu ñuyíú —duha càchí sá càháⁿ-áⁿ.

² Te espíritú díhna ní sáháⁿ-xi ní coyo-xi sá ñúhú xítí tícùú néhé-xí-ǎⁿ ñuyíú, te nchaa ñáyíu ñùhu tnuní quítí ní quene xítí làmár ñáyíu ní chiñuhu sá ñí natava ñàhá-yu xii-di, nchaa ñáyíu-áⁿ ñí quené-yu ndíhyi tèhyú te súúní dándoho ñaha-xi xíi-yu.

³ Te espíritú cúú ùú ní coyo-xi sá ñúhú xítí tícùú néhé-xí nǔú làmár, te ndute làmár-áⁿ ñí nduu-xi níñí te càa-xi datná cáá ñíñí ñáyíu sa ní xíhí, te nchaa quítí ñùhu xítí làmár-áⁿ ñí xíhí-güedi.

⁴ Te espíritú cúú ùní ní coyo-xi sá ñúhú xítí tícùú néhé-xí nchaa yúte ndíhi nchaa núú quèñihni ndute, te ndute nchaa yúte-áⁿ ndíhi nchaa ndute quèñihni-áⁿ ñí nduu-xi níñí. ⁵ Te sáta dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndiǒxí, espíritú yíndàha ndute, te xǎhaⁿ-xi xìi Yá Ndiǒxí:

—Yòhó Dútú Ndiǒxí cúú-n Yáá quidé ndǎá cuítí núu duha quíde-n tendaha-n tnǔndòho-a, te ñíu-ni-n cùu-n Yáá ndécú ndèé cútnàhá ní ngáva ñuyíú, te ñíu-ni-n cùu-n Yáá ndécú vìtna te ñá túú tnàhí cuèchi-n. ⁶ Chí cue ñáyíu ñuyíú ñí dácácǎ-yu níñí nchaa ñáyíu ní cáháⁿ tnúhu-n ndíhi nchaa ñáva-gá ñáyíu cùu cuendá-n, te ní sahní-yu nchaa

ñáyiú-áⁿ, te vitna ní dátíú-n ndùte ní nduu-xi níñí te ducaⁿ-ni càa ndute-áⁿ xíhí-yu, te ducaⁿ tàú-xi ndohó-yu cuendá sá ñí sahní-yu cue ñáyiú cùu cuendá-n —duha càchí espíritú-áⁿ xãhaⁿ-xi xii-gá.

⁷ Te ní tecú tucu dóho-í ní cáháⁿ ìⁿ sá ñí cáháⁿ núú nútn^h núú sácódó sá ndúú tãhú Yã Ndiõxí, te xãhaⁿ-xi xii-gá:

—Ndáá sá yòhó Dútú Ndiõxí Yaá ndácú quide nchaandi túhú sá vãha dândoho-n ñáyiú nàcuáa tàú-xi cunduu —duha càchí sá càháⁿ-áⁿ xãhaⁿ-xi xii-gá.

⁸ Te espíritú cúú cùmí ní coyo-xi sá ñúhú xití tícùú néhé-xí núú nchíanchii cuendá nchíanchii-áⁿ cahmi-xi nchaa ñáyiú ñuyíú. ⁹ Te nchaá-yu ní ndoho vîhí-yu ní cáyú-yu, te cuèi ducaⁿ ñí ndohó-yu dico ñá túú ní cuìní-yu ndixi cuéchi iní-yu cuendá nchaa sá ñà túú vãha quidé-yu, te ni ñà túú ní càchí-yu sá ïo càhnu cuu Yã Ndiõxí chi da ní cáháⁿ úhú-yu cuendá-gá, te ñu-gá cúú-gã Yaá ducaⁿ ñí tendaha tnündòho-áⁿ sã cúú-xí-yu.

¹⁰ Te espíritú cúú ùhúⁿ ní coyo-xi sá ñúhú xití tícùú néhé-xí núú ndécú quèti ní quene xití làmár-áⁿ táxí tnùní-di, te nchaa núú táxí tnùní-di ní cuu nee, te nchaa ñáyiú ñuyíú ndéé yáá-ná-yu nàcaxi nihnú-yu sá ndóhõ-yu. ¹¹ Dico ni dùcaⁿ ñá túú ní cuìní-yu dàñá-yu ni ìⁿ sá cuèhé sá dúhá quidé-yu, chi da ní cáháⁿ úhú-yu cuendá Yã Ndiõxí Yaá ndécú àndiu sá cuendá sá dándòho ñaha ndíhyi tèhyú ndéé-yu-áⁿ ndihí nchaa dava-gá sá yãha-yu.

¹² Te espíritú cúú ìñú ní coyo-xi sá ñúhú xití tícùú néhé-xí xití yúte càhnu nani Eúfratés, te ndute

yúte-áⁿ nǐ yíchí cuèndá yǎha cue tée yìndaha ñáyiú xǐndecu ndàa xio nacuáa quène nchícanchii.

¹³ Te ní xiní-í ní quee ìⁿ espíritú cùndìhi yucu ñávǎha yuhu quitì dééⁿ nání dràgón, te ní xiní tucu-í ní quee tucu ìngá espíritú cùndìhi yucu ñávǎha yuhu quitì ní quene xitì làmár, te ní xiní tucu-í ní quee tucu ìngá espíritú cùndìhi yucu ñávǎha yuhu tée dàndahú ñáyiú càchí sá càháⁿ tnúhu Yá Ndiöxí te ñá ndàá, te ndì nùní espíritú-áⁿ xǐndáa-xi dàtná cáá làhvá. ¹⁴ Te ndì nùní espíritú-áⁿ quidé-xí sǎ vǎ yǒo tnàhí ndàcu cada, te xìca dat-acá-xi nchaa cue tée yìndaha ñaha xii ñáyiú xǐndecu nihí ñuyíú cuèndá nàa-güedé mei ndùu cachí Yá Ndiöxí coo tnúndòho cahnu vihi-gá, te ðiu mee Yá Ndiöxí cúú-gǎ Yaá ío càhnu cuu. ¹⁵ Te Yaá cúú Xìtohó-ó nǐ cachí-gá: “Cunaha-ndo chi nduu ñà túú yìhi iní-ndó quìxi-í núú ndécú-ndó, te cada-í dàtná quidé ñàdúhú. Te váha táhú nchaa nchòhó ñáyiú xǐndecu túha, chi cùu-ndo datná cue ñáyiú xǐndecu túha xǐxíhnu-ni dóó-xi cuèndá sá vǎ cúcàhaⁿ núú-yu dàtná cúcàhaⁿ núú cuè ñáyiú ñà túú nihnu dóó-xi, te ðuha càháⁿ-í cuèndá sá nchòhó cundecu túha-ndo òré quexì-í”, ðuha càchí-gá. ¹⁶ Te ndì nùní cue espíritú cùndìhi yucu ñávǎha-áⁿ nǐ dátàcá-xi nchaa cue tée yìndaha ñaha xii ñáyiú, te ní taxi ndecu ñaha-xi ìⁿ xichi núú nání Àrmagedón, ðuha nàni xíaⁿ tnúhu hèbreú.

¹⁷ Te espíritú cúú ùsá ní coyo-xi sá ñúhú xitì tícùú néhé-xí núú tàchí, te ní tecú dóho-í níhi ní càháⁿ Yaá núcòo núú xilé váha xitì vehe-gá, te càchí-gá:

—Xéhé-nǎ cúmǎní te xínu cava nchaa tnúndòho

tnúhu ndàhú —duha càchí-gá.

¹⁸ Te sáta dúcáⁿ te ní sáá nduté te ní cáháⁿ ñúhu, te súúní dùsaⁿ ní quide-xi, te níhi vìhi ní tnáa ñuyú, te ndéé cútnàhá ní ngúndecu ñáyiú ñuyú te vátá ííⁿ xító-gá níhi tnáa dàtná ní quide-xi. ¹⁹ Te ñúú cáhnú ïo cùnuu nani Babiloniá ní quée dava-xi ní cuu-xi úní xichi, te nchaa ñúú cáá ñìhí ñuyú ñ ngoyo nchaa vehe, chi Yá Ndiöxí ní ndacu iní-gá nchaa sá cuèhé sá dúhá quide nchaa ñáyiú ñúú Babiloniá-áⁿ, te ducaⁿ ñ quide ñaha-gă xii-yu chi ío cùdééⁿ-gá núú-yu. ²⁰ Te nchaa tìndúú ñ ndóñúhú-xí cuèi nchaa tìndúú ñuhu yìchí ndécú xìtí làmár. ²¹ Te ní xiní-í ní cuuⁿ ñiñi nàhnu vihi ní ngaundodo-xi cue ñáyiú ñuyú, te nchaa ñiñi-áⁿ vëe-xi dàtná údico kílú, te cue ñáyiú ñuyú ñ cáháⁿ úhú-yu cuèndá Yá Ndiöxí sá dúcáⁿ ñ dácúúⁿ-gă ñiñi nàhnu vihi-áⁿ, chi ní cuu-xi ííⁿ tnúndòho cahnu vihi sá cúú-xí-yu.

17

Ñàdihí ndécú ìchi dǐí ìní

¹ Te núú ùsá espíritú néhé tǐcùú-áⁿ, te ííⁿ-xi ní quixi-xi núú ndécú-í, te càchí-xi xii-í:

—Néhé ná quihíⁿ-ó dànehé ñáhà-í xii-n nchàa tnúndòho sá ndóhó ñàdihí ñaha ndècu ìchi dǐí ìní, te ñaha-áⁿ cùnù-aⁿ núcóo-aⁿ núú ñúhú vìhi ndute. ² Te ñaha-áⁿ ndécú dǐí ìní-aⁿ ndihí nchaa cue téé yìndaha ñaha xii ñáyiú xǐndecu nihí ñuyú, te nchaa dava-gá ñáyiú ñuyú ío iní-yu nchìcúⁿ nihnú-yu quidé-yu nchaa nàcuáa quide ñaha-áⁿ —duha càchí espíritú-áⁿ.

³ Te òré ducaⁿ quide ñaha Espíritú Yá Ndiöxí xii-í nàcuáa càchí iní-xi, te ííⁿ espíritú xínú cuèchi

núú-gă ndécá ñàha-xi xii-í cuáháⁿ ìⁿ xití yucu, te xití yucu-áⁿ ñí xiní-í ìⁿ ñadìhí yódó-áⁿ ìⁿ quitì ticuehé, te ndèé úsá díquí-di te úxí ndiqui-di, te ñihí-di ndèé tnuní-di mee-ni tnùhu sá càháⁿ úhú cuendá Yă Ndiöxí. ⁴ Te ñadìhí-áⁿ ñíhnú-áⁿ dǒó muradú ndihí dǒó tícuèhé, te mee-ni sǎ ñí cuáha díhúⁿ cuááⁿ, ndihí yúú vǎha sá nání pǎrlá, ndihí nchaa dava-gá núú yúú vǎha, mee-ni nchaa xǎáⁿ ñí cuáha sá yíhí lõho-aⁿ, ndihí sá ñúhú dǔcúⁿ-aⁿ, ndihí sá ñúhú dǔcúⁿ ndáhá-áⁿ, te nùndaha-aⁿ ìⁿ tícúú ñí cuáha mee-ni díhúⁿ cuááⁿ te ñùhu mee-ni sá cuèhé sá dúhá, te xǎáⁿ cùtnùní iní-ó sǎ cúú-áⁿ ìⁿ ñadìhí ñaha ndècu ichi cuehé ichi duha. ⁵ Te tneé-aⁿ ndèé tnuní ìⁿ tnúhu, te càchí-xi: “Ñuú Babiloniá ñuú ío cùnuu, cada iní-ndó sá cúú-xí mèi ñadìhí-a, te diu ñadìhí-a cùu-aⁿ ñaha sanu ichi ñaha xii nchaa ñáyiu dìhí ñáyiu ndècu ichi díí ñí, te nándi-gá nchaa sá cuèhé sá dúhá sànu ichi-aⁿ nchaa ñáyiu cadá-yu”, duha càháⁿ tnúhu ndèé tnuní tneé ñadìhí-áⁿ. Te vá yǒo tècú tnùní ná cuendá ducaⁿ càháⁿ tnúhu-áⁿ. ⁶ Te ñí cutnùní iní-í sá díú ñàha-áⁿ ñí dácáca-áⁿ ñíñí ñáyiu cùu cuendá Yă Ndiöxí ñí sahani ñaha-aⁿ xii-yu, te ñáyiu ñí xíhí-áⁿ cúú-yu ñáyiu ñí cáháⁿ váha cuendá Xítóhó Jesucrístú, te sá dúcáⁿ ñí quide-aⁿ te ñí nduu-aⁿ dàtná ìⁿ ñáyiu quihu. Te ío ñí cuñúhu-í sá dúcáⁿ ñí cuu ñí xiní-í. ⁷ Te sátá dúcáⁿ te espíritú xínú cuèchi núú Yă Ndiöxí-áⁿ càchí tucu-xi xii-í:

—Vá ndèé dúcáⁿ cuñúhu-n, chí vitna na càchí tnúhu-í xii-n nàcuáa quèe-xi cuendá quitì ndèé úsá díquí-xi ndihí úxí ndiqui-xi-áⁿ, ndihí nàcuáa quèe-xi cuendá ñadìhí ñaha yòdo ñaha xii-di-áⁿ. ⁸ Te quitì ñí xiní-n-áⁿ cúú-dí ìⁿ quitì sa ñí xíndecu te

vitna ñá túú-gǎ-di ndècu, te sáá nduu te quene-di yaú cùnú víhí sǎ ïo nèhé cáá, te dǎtnùní sáá nduu te quíhíⁿ-di núú ùhú núú ndàhú ñi caa ñi quíhíⁿ, te cue ñáyíu xíndecu ñuyíú cuñúhu vìhí-yu quiti-áⁿ chi cùu-di ñⁿ quiti sa ní xíndecu ñi cùu te sáá nduu cùndecu tucu-di, te ñáyíu ducaⁿ cùñúhu ñaha xì-di-áⁿ ñà túú yòdo tnuní-yu núú tùtú núú yódó tnùní cue ñáyíu naníhí tàhú, chi ndéé cútnàhá vátá ngǎva-gǎ ñuyíú ducaⁿ sa yòdo tnuní cue ñáyíu naníhí tàhú.

9 'Te nchaa ñáyíu tècú tnùní xìni ñuhu-xi cani váha iní-yu cuèndá tnúhu-a. Te ndi ùsá díquí quiti-áⁿ cada iní-ó sǎ cúú-xí ùsá tǐndúú núú núcõo ñadìhí-áⁿ. 10 Te ndi ùsá díquí quiti-áⁿ cada iní-ó sǎ cúú-xí ùsá tnàhá cue téé yíndaha ñaha xii ñáyíu, te úhúⁿ cue téé-áⁿ ñà túú-gǎ cùnùu-güedé vitna, te ñⁿ téé-áⁿ cùnùu-dé vitna te ingá-dé vátá sàá-gǎ nduu cùnùu-dé, te na sàá nduu dùcaⁿ cunuu-dé te sacú-ñi nduu cunuu-dé. 11 Te quiti ní xíndecu ñi cùu te ñá túú-gǎ-di ndècu vitna, cùu-di datná téé cùu uná yíndàha ñaha xii ñáyíu, te ñⁿ-ni cùu-di ndihí cue téé úsá yíndàha ñáyíu-áⁿ, te quiti-áⁿ sáá nduu cuíta nihnu-di quíhíⁿ-di núú ùhú núú ndàhú ñi caa ñi quíhíⁿ.

12 'Te ndi ùxí ndiqui quiti-áⁿ cada iní-n sǎ cúú-xí ùxí tnàhá cue téé quíndaha ñaha xii ñáyíu, dico vátá sàá-gǎ nduu cùnùu-güedé quíndaha ñaha-güedé xii-yu. Te cue téé-áⁿ ñihí-güedé tnúhu ndee ñí taxi tnùní-güedé ndihí quiti-áⁿ, dico tnaa-ñi taxi tnùní-güedé ndihí quiti-áⁿ. 13 Te ndi ùxí cue téé-áⁿ cuu ñⁿnuu-güedé taxi tnùní-güedé,

te chindee-güedě quití-áⁿ cuendá cuu ìⁿnuu-güedě ndihi-di cuendá taxi tnùní-gá-di. ¹⁴ Te cue téé-áⁿ nàá-güedé ndihi Yaá cáá dàtná cáá ìⁿ mbéé quití ní dánìcuèhé-güedé dico vá ndácú-güedě nàá-güedé ndihi-gá chi cuíta-güedé. Te diu-gá cúú-gá Yaá ío cùnnuu taxi tnuní cuèi nchaa téé yìndaha ñaha xii ñáyíu, te ducaⁿ-ni tàxi tnuní-gá cuèi nchaa dava-gá-yu. Te mee Yă Ndiǒxí ní cachí-gá nándi cùu nchaa ñáyíu cundecu ndihi Yaá cáá dàtná cáá ìⁿ mbéé quití ní dánìcuèhé-güedé-áⁿ, te diu-ni ñáyíu-áⁿ cúú-yu ñáyíu ní cáháⁿ-gá te cùú-yu ñáyíu quìde ndáá ndécú ìchi-gá —duha càchí espíritú xínú cuèchi núú-gă.

¹⁵ Te ní cachí tucu espíritú-áⁿ xii-í:

—Ndute ñùhu núú núcõ ñadìhí ñaha ndècu ichi díí ìní-áⁿ, ndute-áⁿ cada iní-n sã cúú-xí ñáyíu nchaa nacióⁿ, ndihi ñáyíu nchaa ñuú, ndihi ñáyíu xìndecu nchaa xichi, ndihi ñáyíu càháⁿ ndí dííⁿ ndí dííⁿ núú tnùhu. ¹⁶ Te dàtná ní cachí-í sá ndè uxí ndiqui quití ní xiní-n-ăⁿ cúú-xí ùxí tnàhá cue téé quìndaha ñaha xii ñáyíu, te cue téé-áⁿ cuu úhú iní-güedé ñadìhí ñaha ndècu ichi díí ìní-áⁿ, te ni vă cádá cuendá ñáhá-gă-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yă Ndiǒxí ducaⁿ dàcaháⁿ-gá iní cue téé-áⁿ cuendá cada-güedé nàcuáa cuìní méé-gă, te xíáⁿ núu cuu ìⁿnuu-güedě cuendá cúñaha-güedě xii quití-áⁿ cada-di núú-güedě taxi tnùní-di, te ducaⁿ-ni càda-di núú-güedě taxi tnùní-di ndéé ná sàá nduu càda Yá Ndiǒxí nàcuáa ní cachí-gá. ¹⁸ Te ñadìhí ñaha ní xiní-n-ăⁿ cada iní-n sã cúú-áⁿ ñùú cáhnú ñùú ío

cùnuu, te ñuú-áⁿ ndécú tõe ío-gá cúnùu taxi tnuní nchaa cue tée yìndaha ñaha xii ñáyiu xĩndecu ñuyíú —duha ní cachí espíritú xínú cuèchi núú Yă Ndiõxí xii-í.

18

Ní naa ñuú Babiloniá

¹ Te ducaⁿ te dătnùní ní xiní tucu-í ingá espíritú xínú cuèchi núú Yă Ndiõxí, te ndée andiu nì dátăsaⁿ-xi te ní dáyèhé-xi ñuyíú, te espíritú-áⁿ ïo cùnuu-xi. ² Te níhi ní cáháⁿ-xi, te càchí-xi:

—Ní sáá nduu nàa ñuú cáhnú ñùú cúnùu nani Babiloniá, te xíaⁿ-nă natacá nchaa núú espíritú cùndìhi yucu ñávăha cundecu-xi, te vá quée-gă-xi xíaⁿ, te diu-ni xíaⁿ natacá nchaa quitì ndàva núú tàchí nchaa quitì ndehe quìde, quitì ñă túú tnàhá iní ñáyiu te xíaⁿ-nă cundecu-güedi. ³ Te ducaⁿ chi ñáyiu ñuú-áⁿ sánú ìchí-yu nchaa ñáyiu nihì ñuyíú ìchi cuèhé ìchi duha, te ducaⁿ-ni xĩnchícúⁿ nihnu nchaa ñáyiu ñuyíú xĩquidé-yu, te nchaa cue tée cùnuu yìndaha ñaha xii ñáyiu, cue tée-áⁿ cúú ìⁿnuu-güedé ndìhi nchaa ñáyiu ñuú-áⁿ quidé-güedé ndìhi-yu nándi sá cuèhé sá dúhá. Te nchaa ñáyiu dìco nándi sá dícó quèheⁿ ñáyiu ñuú-áⁿ ïo cùu cuicá-yu, te ducaⁿ quèheⁿ nchaa ñáyiu ñuú Babiloniá-áⁿ nchaa sá dícó ñáyiu-áⁿ cuëndá xíaⁿ cănehé-yu ndécú-yu ìchi cuèhé ìchi duha —duha càchí espíritú-áⁿ.

⁴ Te sátá dúcáⁿ te ní tecú dóho-í ní cáháⁿ ìⁿ sá nĩ cáháⁿ andiu, te càchí-xi:

—Nchaa nchòhó ñáyiu cùu cuendá-í quee-ndo ñùú Babiloniá cuëndá sá vă cùndècu-ndo tnahá-ndó ìchi cuèhé ìchi duha dătná ndécú

ñáiyu ñuú-án, te ducaⁿ te vá quíní-ndó tnündòho tnúhu ndàhú sá quíxí cùu xii ñáiyu-án. ⁵ Chi ío cuéhé cuěchi-yu ní cuu ndècu núú Yă Ndiǒxí, te mee-gă náhá-gă nàcuáa ndùu nchaa sá quidě-yu. ⁶ Te nchòhó ñáiyu cùu cuendá-í, chí nánchòcáva dandòho-ndo ñáiyu-án dàtná quidé mèe-yu dándohó-yu cue ñáiyu, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gá ndohó-yu. ⁷ Te ío quide cahnú-yu mèe-yu, te ío cùdí ìní-yu quidé-yu nchaa núú sǎ cuéhé sá dúhá, te sá dúcáⁿ xidó-yu quidé-yu nchaa sá cuéhé sá dúhá nùu xǎⁿ nchòhó ío dandòho-ndó-yu, te ducaⁿ chí ñáiyu ñuú-án sání ìní-yu, te càchí-yu: “Nchúhú cúú-ndǐ dàtná ìⁿ ñadìhí ñá túú quèé, ñaha ío cùnuu yindaha ñaha xii ñáiyu. Te ducaⁿ sǎtnahá-xi cùu-ndǐ chí nchaa-ni nduu ío váha cùu iní-ndǐ ndécú-ndǐ, te ni vǎ sǎá ìⁿ nduu te ndíhú iní-ndǐ”, duha càchí ñáiyu ñuú-án. ⁸ Te sá cuendá nchaa sá quidě-yu-án nùu xǎⁿ ìⁿ-ni ndùu sǎá tnündòho sá cúú-xǐ-yu, te ío ndohó-yu chí ñuú-yu coo tnamá, te coo cuéhé cahni ñaha-xi xǐ-yu, te ío ndíhú iní-yu, te cǎyú ñuú-yu, te ducaⁿ ndòhó-yu chí Dútú Ndiǒxí ío cùnuu-gá, te ñu-gá ducaⁿ dándohó ñaha-gá xǐ-yu —duha càchí sá ní cǎháⁿ àndíu-án.

⁹ Te nchaa cue téé cùnuu yindaha ñaha xii ñáiyu ío ndáhyú-güedé sá ndíhú iní-güedé òré ná quíní-güedé quene ñúhmá cǎyú ñuú cue ñáiyu Babiloniá, chí ñu cue téé-án cúú-güedé cue téé cùu ìⁿnuu ndíhí-yu quide-güedé nchaa núú sǎ cuéhé sá dúhá ndíhí-yu, te ducaⁿ chí ío tnàhá iní-güedé cundecu-güedé ndíhí-yu ichi díí ìní. ¹⁰ Te

cue téé-áⁿ xica-nă cundecu-güedé cundehe-güedě nàcuáa ndoho nchaa ñáyiú ñuú-áⁿ sã yùhú-güedé nchaa tnúndòho-áⁿ, te cachí-güedé:

—¡Ndàhú nchòhó ñáyiú ñuú cáhnú ñuú cúnùu nani Babiloniá! Chi uuⁿni ní sáá nchaa tnúndòho tnúhu ndàhú sá cúú-xí-ndó —duha cachí-güedé.

¹¹ Te nchaa ñáyiú dìco nchaa sá nándĩhi ñáyiú ñuú Babiloniá tnàhá-yu ío ndáhyú-yu sá ndìhú iní-yu chi vá yõ-gá cuaaⁿ nchaa sá dícõ-yu. ¹² Te dícó-yu nchaa sá ñi cuáha mee-ni dǐhúⁿ cuááⁿ, ndìhi nchaa sá ñi cuáha mee-ni dǐhúⁿ cuìxíⁿ, te dìco tucú-yu sá ñi cuáha mee-ni yúú vâha yúú nání pèrlá, ndìhi nchaa dava-gá sá ñi cuáha dava-gá yúú vâha, te dícó-yu tnàhá dóó sèdá, ndìhi ìngá núú dǒó vâha sá nání lǐnú, ndìhi dóó muràdú, ndìhi dóó tícuèhé te mee-ni dǒó vâha cùu-xi, te dìco tucú-yu tnàhá yutnu sá sàháⁿ tnámí, te dìco tucú-yu sá ñi cuáha sá nání màrǐl, te dìco tucú-yu sá ñi cuáha mee-ni yùtnu vâha sá ìo ndèyáhu, te dìco tucú-yu sá ñi cuáha mee-ni càá, ndìhi sá ñi cuáha mee-ni sã nání bròncé, ndìhi sá ñi cuáha mee-ni yúú vâha yúú nání mǎrmól. ¹³ Te dìco tucú-yu canèlá, ndìhi yúcu sã sàháⁿ tnámí, ndìhi dúsa sá sàháⁿ tnámí, ndìhi yúcu sã nání mǐrrá, te dìco tucú-yu ìngá núú dǔsa sá sàháⁿ tnámí nàni olivánú, te dìco tucú-yu ndudí ndéhé yoho yàha stilé, ndìhi acití yutnu nàni olívú, ndìhi yuchi triú vâha, te dìco tucú-yu nchaa dava-gá núú triú, te dícó-yu tnàhá mbéé, ndìhi cuáyú, ndìhi nchaa dava-gá quiti tatá, te dìco tucú-yu tnàhá carrètá, te dìco tucú-yu tnàhá ñáyiú xìnu cuechi, ñáyiú ñá túú tnàhí dàñá quee núú chíúⁿ pàtróóⁿ-xi. ¹⁴ Te nchaa ñáyiú dìco-áⁿ

cũñàhá-yu xii ñáyiú ñuú Babiloniá:

—¡Nchaa sá ïo cùdíí ìní-ndó cùndecu ndìhi-ndo ni cuu vá ndácú-gã-ndó ñihí-ndó vitna, te nchaa sá sání ìní-ndó sã ïo váha càa ndecu ndìhi-ndo ndìhi nchaa dava-gá sá ndécú ndìhi-ndo ní ndìhi nihnu-xi vitna, te ni ìíⁿ nduu-gá vá ñihí-ndó ni ìíⁿ xíãⁿ cundecu ndìhi-ndo! —duha cúñaha ñáyiú-áⁿ xii-yu.

¹⁵ Te nchaa ñáyiú ní cuu cuica ñí xóo dico nándi nchaa sá ñí xóo dico ñí queheⁿ cue ñáyiú ñuú Babiloniá, nchaa ñáyiú-áⁿ xica-ñã cundecú-yu cundèhé-yu sá yùhú-yu cuèndá nchaa tnúndòho sá yãha cue ñáyiú ñuú-áⁿ, te ío ndáhyú-yu sá ndìhú ìní-yu sá dúcáⁿ ndòho ñáyiú-áⁿ. ¹⁶ Te cúñaha tùcú-yu:

—¡Ndàhú nchòhó ñáyiú xĩndecu ñuú cáhnú ñuú nání Babiloniá! Chi nchòhó cúú-ndó dàtná ìíⁿ ñadìhí ñaha nihnu dóó vãha dóó murádú, ndìhi dóó tícuèhé, te mee-ni sã ñí cuáha díhúⁿ cuááⁿ, ndìhi mee-ni sã ñí cuáha yúú vãha yúú nání pèrlá, ndìhi sá ñí cuáha dava-gá yúú vãha sá ïo vii ndãa mee-ni nchàa xíãⁿ ní cuáha sá yíhí lõho-aⁿ, ndìhi sá ñúhú dũcúⁿ-aⁿ, ndìhi sá ñúhú dũcúⁿ ndáhá-áⁿ. ¹⁷ ¡Te uuⁿni ní ndìhi nihnu nchaandi túhú sá ndécú ndìhi ñadìhí-áⁿ, te ducaⁿ sãtnahá-xi cùu nchòhó ní cùu! —duha cúñàhá-yu xii cue ñáyiú ñuú Babiloniá.

Te nchaa cue tée dàcaça barcú ndìhi nchaa cue tée tàxi tnuní bàrcú-áⁿ, ndìhi nchaa ñáyiú ñùhu xití bàrcú-áⁿ, ndìhi nchaa dava-gá cue tée nándi chiúⁿ quide ndecu lamár, nchaa ñáyiú-áⁿ xica cùndecú-yu ¹⁸ te quiní-yu òré quene ñúhmá

cǎyú ñuú cue ñáyiú Babìloniá, te níhi cáháⁿ-yu, te cachí-yu:

—Ni ñⁿ ñuú ñá túú nǔtnahá-xi ñuú Babìloniá — duha cáháⁿ-yu.

19 Te nchaa ñáyiú-áⁿ chidó-yu ñuhu díquǐ-yu, te ngúíta-yu ndáhí-yu sá ndìhú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyiú xǐndecu ñuú cáhnú ñuú nání Bàbiloniá! Chi ío cuica-ndo ni cùu, te ñu-ndo ñí quide ní cuu cuica nchaa ñáyiú ndècu ndìhi barcú, te vitna uuⁿni ní naa-ndo ndìhi ñuú-ndó — duha cachí-yu.

20 Te nchaa nchòhó ñáyiú ndècu andìu ío chí cúdǐ ñí sá dúcáⁿ dándoho Yá Ndiǒxí nchaa ñáyiú ñuú Babìloniá-áⁿ, te ñu-ni ducaⁿ chǐ cúdǐ ñí nchaa nchòhó cue téé ní cachí Xítohó Jesucristú cáháⁿ tnúhu-gá, te ñu-ni ducaⁿ chǐ cúdǐ ñí nchaa nchòhó cue téé càháⁿ tnúhu Yá Ndiǒxí nàcuáa dàcahu ñí ñáhá-gǎ xii-ndo, te ñu-ni ducaⁿ chǐ cúdǐ ñí nchaa dava-gá nchòhó ñáyiú cùu cuendá-gá cuendá sá dúcáⁿ dándoho-gá nchaa ñáyiú ñuú-áⁿ. Te ducaⁿ càda ñaha-gá xii cue ñáyiú-áⁿ cuendá nchaa sá quidé ñáhá-yu xii-ndo.

21 Te sátá dúcáⁿ te ní xiní-í ñⁿ espíritú xínú cuèchi núú Yá Ndiǒxí, te espíritú-áⁿ ño ndee-xi te ní queheⁿ-xi ñⁿ yúú cáhnú dàtná càhnu yódó te ní dáquëe-xi xití ndute làmár, te càhí-xi:

—Dàtná ní quide-í ní dáquëe-í yúú xití ndute ducaⁿ càda-xi ñuú cáhnú ñuú Babìloniá, chi ñáyiú ñuú-áⁿ ño ndìhi naá-yu ndìhi ñuú-yu, te vá ñⁿ ndùu ñⁿ quíú-gǎ quini ñáhá ñáyiú xii-yu. 22 Te ni

ñá-gá ñáyiu càni arpá, te ni ñá-gá ñáyiu tìú vīlu, te ni ñá-gá ñáyiu tìú cútú, te ni ñá-gá yaá vá cóo ñúú-áⁿ, te ni ñá-gá cue ñáyiu xìní cada ñá núú chiuⁿ vá cóo-gă, te ni vă yõo-gá canehe chiuⁿ yúú cúú yõdó mulñú. ²³ Te ni ñá-gá ñuhú vá cündècu ñúú-áⁿ, te ni ñá nduu-gá vá cóo vico tnándaha, te ñáyiu ñúú-áⁿ ñáyiu quide ndáhú cúú-yu ñáyiu ío-gá cuicá-yu dàcúxí ñáyiu quide ndáhú xĩndecu ñihí ñuyúú, dico nchaá-yu naá-yu chi quide nduú-yu te ío dándahú-yu cue ñáyiu ñuyúú sã dúcáⁿ quidé-yu.

²⁴ 'Te ñá-ni ñúú-áⁿ ñá dácácă-yu ñihí cue téé ní cáháⁿ tnúhu Yá Ndiõxí, te ñá-ni ducaⁿ ñá quidé-yu nchaá dava-gá cue ñáyiu cùu cuendá-gá, te ñá-ni-yu quide xísahni tnàha ñáyiu ñuyúú —duha càchí espíritú-áⁿ.

19

¹ Te sátá dúcáⁿ te ní tecú dóho-í níhi ní cáháⁿ cuéhé víhí ñáyiu andiu, te càchí-yu:

Ío càhnu cuu Yá Ndiõxí!, chi ñá-gá cúú-gă Yaá ní dácăcu ñihnu ñaha xì-o núú ùhú núú ndàhú, te ío cùnuu-gá, te mee-ni sã vâha quide-gă,

² te mee-gă ío váha ndáá quidé-gă quidé ndăá-gá cuéchi nchaá ñáyiu,

chi ñá-gá ní dáquihíⁿ-gá ñadìhí ñaha ndècu ichi díí ñí núú ùhú núú ndàhú,

chi ñá-aⁿ ní sanu ichi-aⁿ ñáyiu ñuyúú ichi cuéhé ichi duha,

te ducaⁿ ñá dáquihíⁿ ñáhá-gă xii-aⁿ núú ùhú núú ndàhú chi nàchinaa-gá sá ñá sahani-aⁿ cue ñáyiu ní xinu cuechi nũú-gă.

Duha càchí-yu.

³ Te càchí tucú-yu:

—Ío cànhu cuu Yá Ndiöxí!, chi nchaa nduu nchaa quíú ducaⁿ-ni quène ñúhmá núú ñúhú ñàha-áⁿ càyú-aⁿ —duha càchí-yu.

⁴ Te ndi òcò cúmí cue téé cùu sacuéhé xĩndecu-áⁿ ñí ngüíñí xítí-güedè núú Yá Ndiöxí núú núcõo-gá táxí tnùní-gá, te tnàhá cue quiti cúmí xĩnutnñi-áⁿ ñí ngüíñí xítí-güèdi núú-gá, te cue téé-áⁿ càchí-güedé ndihi cue quiti-áⁿ:

—Sá ndàá sá ïo cànhu cuu Yá Ndiöxí —duha càchí-güedé ndihi cue quiti-áⁿ.

⁵ Te sátá dúcáⁿ te ní tecú dóho-í ní cáháⁿ ìⁿ sá ñí cáháⁿ mei núú nútñí xilé váha núcóo Yá Ndiöxí, te càchí sá cáháⁿ-áⁿ:

Nchaa nchòhó ñáyiu xìnu cuechi núú Yá Ndiöxí,
 ñi-ni nchòhó ñáyiu nèhe sá yíñùhu núú-gá,
 cáháⁿ-ndó sá ïo cànhu cuu-gá cuèi cùnuu-ndo àdi ñá
 túú cùnuu-ndo.
 Duha càchí sá cáháⁿ-áⁿ.

Íⁿ vico cùu datná vico tnãndaha

⁶ Te sátá dúcáⁿ te ní tecú dóho-í ní cáháⁿ cuéhé víhí ñáyiu andiu, te òré ducaⁿ ñí cáháⁿ-yu te ní quide-xi dàtná quidé-xí núú xíca cuéhé víhí ndùte, te ní quide tucu-xi dàtná quidé-xí òré cáháⁿ níhi víhi ñùhu, te càchí-yu:

Ío cànhu cuu Dútú Ndiöxí Yaá cúú Tátá-ó! Te ío cùnuu-gá táxí tnùní-gá, te quide-gá nchaandi túhú sá váha.

⁷ Te ío chí ná cùdí ìní-ó, te chí ná càchí-ó sá ïo cànhu cuu Yá Ndiöxí,

chi vitna ní sáá nduu càda Yaá cáá dàtná cáá ìⁿ mbéé quiti ní dánícuéhé-güedé ìⁿ vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndihí-yu sa ndècu túha-yu cundecú-yu vico-án, te cada iní-ó sã ñáyiú-án cúŷ-yu dàtná ìñ ñadìhí xíchí tnãndaha ndihí-gá,

⁸ te ñáyiú-án ñí nduu táhũ-yu cuihnú-yu dóó vãha dóó chàhnchí sá ìo vãha càndoo.

Duha càchí-yu.

Te sá dúcán ñí nduu táhú ñáyiú cùu cuendá Yã Ndiõxí dóó vãha ñìhnú-yu, xiãñ cútñuní iní-ó sã cúŷ-yu ñáyiú quide ndáá núú-gã.

⁹ Te ìñ espíritú xínú cuèchi núú Yã Ndiõxí ní cachí tnúhu-xi xii-í, te càchí-xi:

—Chido tnùnín-ñ ìñ núú tùtú nàcuáa na càhán-í-a: “Vãha táhú nchaa ñáyiú ní cáhán ñáhá Yáá cáá dàtná cáá ìñ mbéé quiti ní dánícuèhé-güedé cundecú-yu vico, te vico-án cúú-xí dàtná vico tnãndaha cada-gá”, te duha chido tnùnín-ñ chi tnúhu-a cùu-xi tnúhu ndáá tnúhu Yá Ndiõxí —duha càchí espíritú-án.

¹⁰ Te ní ngüíñí xítì-í núú espíritú-án cuendá chiñuhu-í-xi ñí cùu, te ní cachí-xi:

—Vá dúcán càda-n, chi tnàhá-í dícó xínú cuèchi-í núú Yã Ndiõxí dàtná quidé-n xìnu cuechi-n núú-gã ndihí nchaa dava-gá ñáyiú ndècu ndihí-n ichi-gá, ñáyiú nchícún nihnu quide ñí yuhu ñí iní nchaa nàcuáa càhán Xítóhó Jesucristú, te núú xiãñ càchí-í sá vã dúcán càda-n, chi mee Yã Ndiõxí chiñuhu-n —duha càchí espíritú-án.

Te nchaa cue téé càhán tnúhu Yá Ndiõxí càhán-güedé nàcuáa ndùu tnúhu càhán Xítóhó Jesucristú.

Cuendá Yáá yódó ìñ cuayú cuixí

11 Te ní xiní-í nchìi andiù, te ní xiní-í ní quee ìⁿ Yaá yódó-gã ìⁿ cuàýú cuìxíⁿ. Te Yaá-áⁿ nání-gã Yaá quidé ndää cuiti, duha nàni-gá. Te quide-gá nchaa sá càháⁿ-gá, te ío váha quide ndää-gá cuéchi nchaa ñáýiu, te nchaa ñáýiu nää ndihì ñaha xii-gá ío váha xini-gá nàcuáa cada ñaha-gã xii-yu chi ío ndää quidé-gã. 12 Te tinùu-gá dáyèhé-xi dàtná dáyèhé ñuhú, te titní coróná ñuhú dǐquí-gã, te nèhe-gá ìⁿ sá ndèé diù-gá, te vá yõo ìⁿ cùnuní iní-xi nása cuáháⁿ tnúhu-áⁿ, chi ìⁿdìi díi-ni mee-gã náhá-gã nàcuáa càháⁿ-xi. 13 Te Yaá-áⁿ níhnú-gã ìⁿ dóó nǐ cuu mee-ni nǐí, te Yaá-áⁿ càchí tnúhu-gá nchaa nàcuáa sàni iní Yã Ndiõxí, núu xǎⁿ nání-gã Tnúhu Yá Ndiõxí. 14 Te sátá-gã nchìcúⁿ nchaa espíritú xínú cuèchi núú Yã Ndiõxí, te cue espíritú-áⁿ cúú-xí dàtná sandàdú, te xixíhnu-xi dóó cuìxíⁿ dóó vǎha sá cándò, te xixódó-xi cuàýú cuìxíⁿ. 15 Te yuhu Yaá yódónùu-áⁿ quéné ìⁿ yuchí cáhnú, te ndihì yuchí-áⁿ dānicuèhé-gá nchaa ñáýiu xǐndecu ñuyíú, te ío dandòho ñaha-gá xii-yu, te dàtná quidé tēe quìhni ndéhé yoho yàha stilé ducaⁿ sǎtnahá-xi cada ñaha-gã xii-yu, chi ío dandòho ñaha-gá xii-yu cuèndá sá ío cùdééⁿ-gã. Te mee-gã ío cùnùu-gá táxí tnùnì-gá, te quide-gá nchaandi túhú sá vǎha. 16 Te sátá dǒó níhnú Yá-áⁿ ndihì núú tìcácaⁿ-gã yódó tnùnì nàcuáa nàni-gá, te duha càháⁿ-xi: “Tée ío cùnùu taxi tnunì ñáhá xii nchaa cue tēe yǐndaha ñaha xii ñáýiu ndihì nchaa dava-gá ñáýiu”, duha ndèé tnunì sátá dǒó-gã-áⁿ ndihì tìcácaⁿ-gã-áⁿ.

17 Te dàtnùnì ní xiní-í ìⁿ espíritú xínú cuèchi núú Yã Ndiõxí nùtnǐ-xi núú nchǐcanchii, te níhi

ní cáháⁿ-xi, te xǎhaⁿ-xi xìi nchaa quitì ndava núú tàchí:

—Nchaa nchòhó quitì ndàva, chí táquìxi chí caxi-ndo nchàa sá ñǎ quide túha Yá Ndiǒxí, ¹⁸ chí caxi-ndo cùñú nchaa cue téé yìndaha ñaha xii ñáiyu, ndihì cuñú nchaa cue téé tàxi tnuní ñáhá xii cue sandadú, ndihì cuñú nchaa cue téé ío ñíí xǐndáa, ndihì cuñú nchaa cuàyú, ndihì cuñú nchaa cue téé ní xódó ñaha xii-güedi, ndihì cuñú nchaa dava-gá ñáiyu, ñáiyu ñá túú tnàhí ni dàñá quee núú chíúⁿ pàtróóⁿ-xi, ndihì cuñú nchaa ñáiyu ní dáñá ñǎ quee núú chíúⁿ pàtróóⁿ-xi, ndihì cuñú nchaa ñáiyu cùnuu, ndihì cuñú nchaa ñáiyu ñá túú cùnuu, te nchaa cuñú-áⁿ caxi-ndo —càchí espíritú-áⁿ xǎhaⁿ-xi xìi nchaa quitì-áⁿ.

¹⁹ Te sátá dúcáⁿ te ní xiní tucu-í quitì ní quene xití làmár, ndihì nchaa cue téé yìndaha ñaha xii ñáiyu, ndihì nchaa cue téé cùu sandadú-güedé ní naníhí tnáhá-güedě ndihì quitì-áⁿ cuendá cuu ñⁿnuu-güedě ndihì-dì nàá-güedé ndihì Yaá yódó cuàyú-áⁿ, ndihì nchaa cue espíritú cúú sàndadú ndihì-gá. ²⁰ Te cue espíritú cúú sàndadú ndihì Yaá-áⁿ ñǎ tnì-xi quitì-áⁿ, ndihì téé ío dándahú ñáhá xii ñáiyu càchí sá càháⁿ tnúhu Yá Ndiǒxí te ñá ndáa sá càháⁿ-dé tnúhu-gá, te diu-ni téé-áⁿ ñǎ quide-dé tìtní núú sǎ vǎ yǒo tnàhí ndàcu cada núú quitì-áⁿ. Te sá dúcáⁿ ñǎ quide téé-áⁿ xǎⁿ ní dándahú-dé ñáiyu ní sándáa ínì-yu ní quéě-yu tnuní quitì-áⁿ, te ní chiñùhú-yu sá ñǎ dándacú ñàhá-yu xii-dì, te cue espíritú-áⁿ ñǎ dáquěe-xi quitì-áⁿ núú ñùhú núú ñùhú àzufré càyú-xi, ndihì téé ducaⁿ dándahú ñáhá xii ñáiyu-áⁿ, te xíaⁿ cuhuⁿ téé-áⁿ ndihì quitì-áⁿ, te ío ndoho-dé

ndihí-dí. ²¹ Te ndihí yuchí cáhnú sǎ quéné yùhu Yaá yódó cuàyú-áⁿ nǐ sahní-gá nchaa dǎva-gá cue téé cùndihí quítí-áⁿ, te nchaa cue quítí ndàva ní chítú xìtí-güedi ní xexi-güedi cuñú nchaa cue téé-áⁿ.

20

Úxí cièndú cuía

¹ Te sátá dúcáⁿ te ní xiní-í ìⁿ espíritú xínu cuèchi núú Yǎ Ndiǒxí ní quee-xi andiu, te nùndaha-xi ndacaá nacaáⁿ-xi yèhe ìⁿ yaú cùnú víhí nùú cùndècu sácúlnhá, te nùndaha tucu-xi ìⁿ cadená cáhnú. ² Te espíritú-áⁿ nǐ tniⁿ-xi quítí dééⁿ nání dràgón, te diu-ni quítí-áⁿ cúú-dí mèi yucu ñávǎha sá nání sácúlnhá, te diu xǎⁿ ní nduu-xi cóó ndèè sanaha. Te espíritú-áⁿ nǐ dácútú ñàha-xi xii-dí, te ducaⁿ-ni cùndutu-dí ndéé xínu úxí cièndú cuía. ³ Te sátá nǐ dácútú ñàha espíritú-áⁿ xii-dí te ní dáquèe ñàha-xi xì-dí yaú-áⁿ chi diu yaú-áⁿ tàú-dí quée-dí cundecu-dí. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuèndá sá và quéné-gǎ-dí dandàhú-dí cue ñáyiú ñuyíú, te xíaⁿ cundedí nihnu-dí ndéé xínu úxí cièndú cuía. Te sátá ná yǎha úxí cièndú cuía-ǎⁿ te nandáxí-dí te quene-dí yaú núú ñúhú-dí-ǎⁿ caca cuu tnaa-dí ìⁿ úú nduu.

⁴ Te dǎtnùní ní xiní-í xǐnutnǐ titnǐ xilé váha, te xíaⁿ xǐnucóo nchaa ñáyiú ní ngúndecu ndihí tnúhu ndee ìní cada ndáá cuéchi nchaa ñáyiú, te ní xiní-í xǐndecu tnàhá cue ñáyiú ní xehndé-güedé dúcúⁿ-xi cuèndá sá nǐ cáháⁿ-yu tnúhu Yá Ndiǒxí, ndihí cuèndá sá nǐ cáháⁿ váha-yu cuèndá Xítohó Jesucristú. Te diu-ni ñáyiú-áⁿ cúú-yu ñáyiú ñá túú ní chĩñuhú-yu quítí ní quene xìtí làmár-áⁿ, te ni ñà

túú ní chĩñuhú-yu sá nĩ dándácú ñǎyiu ní natava ñáhá-yu xii-di, te ni ñà túú ní dàñá-yu mèé-yu quée-yu tnuní quiti-áⁿ chi ni tnée-yu te ni ndàhá-yu ñá túú ní dàñá-yu quée tnuní-di. Te ní xiní-í ní ndoto cue ñáyiu-áⁿ cuendá tnàhá-yu cunùú-yu taxi tnùní-yu ndihĩ Xítohó Jesucrìstú úxí cièndú cuía. ⁵ Te dava ñáyiu ní xíhí ñá túú ní ndotó-yu, chi ndée yáha úxí cièndú cuía te dàtnùní ndotó-yu. Te ñáyiu ní xiní-í ní ndoto-áⁿ cúú-yu ñáyiu ní ndoto díhna nuu. ⁶ ;Te ío váha ní tnahá nchaa ñáyiu ní nduu táhú nĩ ndoto díhna nuu!, chi cue ñáyiu-áⁿ ïo cùdiú-yu núú Yǎ Ndiǒxí, te nchaa ñáyiu-áⁿ vǎ quihíⁿ-yu núú ùhú núú ndàhú, te ñáyiu-áⁿ cúú-yu dútú ndécú-yu núú Yǎ Ndiǒxí ndihĩ núú Xítohó Jesucrìstú, te ñáyiu-áⁿ cúnùú-yu dàtná cúnùu Xítohó Jesucrìstú, te cunuu ndihĩ ñahá-yu xii-gá úxí cièndú cuía.

⁷ Te sátá ná yáha úxí cièndú cuía-ǎⁿ te sácúíhná quee-xi núú yíndèdí nihnu-xi-áⁿ, ⁸ te ngúíta tucu-xi dandàhú-xi nchaa ñáyiu xĩndecu nihíi ñuyíú, te cuèi ñáyiu ñuú Gǒg, te cuèi ñáyiu ñuú Mǎgóg ducaⁿ quihíⁿ-xi dandàhú ñáhá-xí xii-yu, te datàcá-xi nchaa ñáyiu cuendá nàá-yu, te cuéhé víhí-yu dàtná cuéhé ñuhu cúchí làmár. ⁹ Te nchaa ñáyiu-áⁿ tnií-yu ichi quihíⁿ-yu ìⁿ ichi sá cuàháⁿ núú cáá ìⁿ yodo cahnu vihi, te sáá-yu núú xĩndecu ñáyiu cùu cuendá Yǎ Ndiǒxí, te ñáyiu-áⁿ chidòcò-yu cue ñáyiu cùu cuendá-gá-áⁿ ndihĩ ñuú-yu, te ñuú-áⁿ ïo cùu iní-gá, dico mee Yǎ Ndiǒxí dangòyo-gá ñuhú cahmi-gá nchaa ñáyiu ducaⁿ chidoco ñaha xii ñáyiu cùu cuendá-gá-áⁿ, te nchaa ñáyiu-áⁿ cuú. ¹⁰ Te sácúíhná sǎ dúcáⁿ dandahú ñáhá xii ñáyiu chidoco

ñaha xii ñáyiú cùu cuendá Yă Ndiöxí-áⁿ dàquée ñaha-gă xii-xi núú ñùhú núú ñùhú àzufré càyú-xi, te ñiú-ni xíáⁿ sa ñùhu quítì ní quene xítì làmár, ndihì téé ní dándàhú ñáyiú ní xáhaⁿ-dě xií-yu sá càháⁿ-dé tnúhu Yá Ndiöxí te ñá ndàá sá càháⁿ-dé tnúhu-gá, te xíáⁿ cuhuⁿ-xi ndoho-xi ni caa ni quíhíⁿ ndihì quítì ní quene xítì làmár, ndihì téé càchí sá càháⁿ tnúhu Yá Ndiöxí te ñá ndàá sá càháⁿ-dé tnúhu-gá.

Cùndáá cuéchi ñáyiú

¹¹ Te ní xiní-í nútñí ñⁿ xilé váha xilé cuixíⁿ, te núú xilé-áⁿ núcõ ñⁿ Yaá. Te ndèhe Yaá-áⁿ nì ndóñúhú àndiú ndihì ñuyíú-a, te ducaⁿ nì ndóñúhú-xí chi vá cùndècu-gá-xi. ¹² Te sátá dúcáⁿ te ní xiní-í nchaa ñáyiú ní xíhí ní cùu, ñáyiú cùnno ndihì ñáyiú ñá túú cùnno xínutñí-yu núú Yáá núcõ núú xilé váha-áⁿ, te Yaá-áⁿ cúú-gă Yă Ndiöxí, te òré-áⁿ nì nandicá nchaa tutú núú yódó tnùnì nchaa nàcuáa ndùu sá nì quide ñⁿ ñⁿ ñáyiú-áⁿ, te ní nandicá tucu ingá tutú núú yódó tnùnì nchaa ñáyiú ní naníhí tàhú, te nchaa ñáyiú ní xíhí ní cùu xínutñí-yu núú Yă Ndiöxí cundáá cuéchi-yu, te nchaa nàcuáa ndùu nchaa cuéchi-yu yòdo tnunì núú nchaa tutú-áⁿ ducaⁿ cùndáá. ¹³ Te nchaa ñáyiú ní xíhí xítì ndute làmár, ndihì nchaa ñáyiú ní xíhí núú ñuhu yìhí nchaa ñáyiú-áⁿ cundáá cuéchi-yu nàcuáa ní quidé-yu ñⁿ ñⁿ-yu. ¹⁴ Te vitna te vá cùú-gá ñáyiú chi ñá túú-gă tnúhu xíhí, te nchaa ñáyiú ñùhu núú ñùhú núú càyú ñáyiú-áⁿ cúú-yu ñáyiú ní xíta nihnu ni caa ni quíhíⁿ. ¹⁵ Te ducaⁿ chi nchaa ñáyiú ñá túú yòdo tnunì núú tütú núú yódó tnùnì nchaa ñáyiú naníhí tàhú ní dáquée ñaha Yă Ndiöxí xií-yu núú ñùhú núú càyú.

21

Andiu sàa ndihi ñuyúú sáá

¹ Te sáatá dúcáⁿ te ní xiní-í andiu sàa ndihi ñuyúú sáá, te andiu sã ndécú dǐhna ndihi ñuyúú sà ndécú dǐhna ní ndóñúhú-xí, te tñàhá làmár ní ndóñúhú-xí.

² Te yúhú té Juáá ní xiní-í ñúú Jerusàlén sáá ñí quee-xi núú ndécú Yã Ndióxi, te ñuú-áⁿ cúú-xí ñúú méé-gã, te ío vii càa chi càa datná cáá ñⁿ ñadihí xíchí tñandaha. ³ Te ní tecú dóho-í níhi ní cáháⁿ ñⁿ sá ñí cáháⁿ andiu, te càchí-xi:

—Chí cùndèdóho ñⁿ tnúhu na càháⁿ-í-a: Yá Ndióxi ndécú ndihi-gá cue ñáyiu vitna, te ducaⁿ-nã cundecu ndihi ñaha-gã xií-yu, te diú-yu cùú-yu ñáyiu cùu cuendá-gá, te vá ñⁿ ndùu ñⁿ quíú-gã te dañá ñaha-gá xií-yu. ⁴ Te mee Yã Ndióxi cada-gá sá ñà túú tñàhí-gá ná caní iní-yu cundecu-yu, te ñí vã quíní-gá-yu tnúhu xihí, te ñí vã quíní-gá-yu tnúhu ndàhyú, te ñí vã quíní-gá-yu tnúhu ndihú iní-xi, te ñí vã quíní-gá-yu tnúhu cùhú, chi nchaa sá ñí xiní-yu ñuyúú dǐhna vá quíní-gá-yu vitna —duha càchí sá ñí cáháⁿ-áⁿ.

⁵ Te Yaá núcõo núú xilé váha-áⁿ ñí cachí tnúhu-gá xii-í, te càchí-gá:

—Yúhú quidè-í nàcuáa nduu saa nchàa sá cùndècu vitna. Te vitna chido tñùní-n ñⁿ núú tütú nchaa tnúhu sá ñí cáháⁿ-í-a, chi nchaa tnúhu-a cùu-xi tnúhu ndáá cuiti —duha càchí-gá.

⁶ Te dǎtnùní ní cachí tnúhu tucu-gá xii-í:

—Sa ní xínu cava nchaa chiúⁿ ní sani iní-í cada-í, te diu-ñí yúhú cúú-í Yaá sa ndècu ndéé cùtñàhá ní ngáva ñuyúú, te diu-ñí-í cundecu-í ñí caa ñí quíhíⁿ. Te nchaa ñáyiu cuíní tuha ñaha xii-í te cada iní-yu

sá dàtná ndute cùu-xi sá cuǎñaha tǎhù-í xií-yu can-deca-xi iní-yu ni caa ni quíhíⁿ. ⁷ Te nchaa ñáyiu na cùndee iní yáha nándi sá ná yǎha-yu sá cuendá-í, te ñáyiu-áⁿ nduu táhǔ-yu cundecu váha-yu, te yúhú cuu-í Ndiǒxǐ-yu, te ducaⁿ mée-yu cuú-yu déhe-í. ⁸ Te nchaa ñáyiu na yùhú ndoho cuendá-í quíhíⁿ-yu núú ñùhú núú càyú ndihí ñáyiu ñá túú sàndáá iní ñáhá xii-í, ndihí ñáyiu quide nándi nchaa sá cuèhé sá dúhá, ndihí ñáyiu sàhni tnaha, ndihí ñáyiu ndècu ichi díí iní, ndihí ñáyiu quide nduu, ndihí ñáyiu chìñuhu nchaa sá càchí-yu cùu ndióxí ní cadúha cue téé ñuyíú-a, ndihí ñáyiu dàcuandehnde, nchaa ñáyiu ducaⁿ xíquide-áⁿ cuíta nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yǎ Ndiǒxí ní cachí tnúhu-gá xii-í.

Ñúú Jerusalén sáá

⁹ Te núú ùsá espíritú xínehe tícùú ñùhú tnùhu ndòho, te ìⁿ-xi ní quixi-xi te càchí-xi:

—Taqùxi, te na dànehé ñáhà-í xii-n nchaa ñáyiu cùu cuendá Yaá cáá dàtná cáá ìⁿ mbéé quiti ní dánícuèhé-güedé, ñáyiu-áⁿ cada iní-n sǎ cúŷ-yu dàtná ìⁿ xíchí cuéchí vìtna tnándaha, te ducaⁿ càda iní-n sǎ cúŷ-yu chi cundecú-yu ndihí-gá —duha ní cachí tnúhu espíritú-áⁿ xii-í.

¹⁰ Te òré quidé ñàha espíritú Yǎ Ndiǒxí xii-í nàcuáa càchí iní-xi, te espíritú néhé tícùú-áⁿ ndécá ñàha-xi xii-í cuásaá ìⁿ tìndúú dùcúⁿ, te xiáⁿ ní dánèhé núú ñáhá-xí xii-í ñuú Jerusalén te ñuú-áⁿ ní quee-xi núú ndécú Yǎ Ndiǒxí, te ñuú-áⁿ cúú-xí ñuú mée-gǎ. ¹¹ Te ñuú-áⁿ ìo càhnu cuu-xi chi ducaⁿ ìo càhnu cuu mee-gá, te dàtásaⁿ-xi dàtná dátásaⁿ yúú

vãha sá nání jãspé yúú cáá dàtná cáá vîdriú sá tûu ìngá xio ndàa sàtá-xi. ¹² Te ni càndéé yuhu ñúú-án sùúni dùcúⁿ nchaa sá ñúhú dòco, te nchii úxúú yuyèhe-xi, te ndi tnahá ìⁿ ìⁿ yuyèhe-án xîndecu ìⁿ caa espíritú xínú cuèchi núú Yá Ndióxi. Te ndi tnahá ìⁿ ìⁿ yuyèhe-án yódó tnùnì diù ìⁿ caa xichi cue ñáyiú isràél. ¹³ Te únì yuyèhe-xi nchií ndàa xio nacuáa quène nchíanchii, te únì tucu yuyèhe-xi nchií ndàa nacuáa quée nchíanchii, te únì tucu yuyèhe-xi nchií ndàa xio cuha nacuáa quène nchíanchii, te únì tucu yuyèhe-xi nchií ndàa xio datni nacuáa quène tucu nchíanchii. ¹⁴ Te sá ñúhú dòco-án chi úxúú tnahá yúú cúú cìmentú-xi, te ndi tnahá ìⁿ ìⁿ yúú-ãⁿ ndèè ìⁿ caa diù cue téé ní cáháⁿ tnúhu Yáá cáá dàtná cáá ìⁿ mbéé qui^ti ní dánìcuèhé-güedé, te diu mee-gã ní táúchiúⁿ-gã ní cáháⁿ-güedé tnúhu-gá.

¹⁵ Te espíritú sá cáháⁿ ndihì ñaha xì-i-án néhé-xí ìⁿ sá cánì ñí cuáha mee-ni díhúⁿ cuááⁿ, te ndihì xiáⁿ chícùhá-xi ñúú-án, ndihì sá ñúhú dòco ñúú-án, ndihì nchaa yuyèhe-xi. ¹⁶ Te ñúú-án ìⁿ-ni nèhe-xi cuendá quèhéⁿ-xí ndihì cuendá càni-xi, te espíritú-ãⁿ ní chícùhá-xi ndihì sá néhé-xí-ãⁿ ñúú-án, te nèhe-xi ócò úú cièndú mìl mètrú sá cánì te diu-ni ducaⁿ nèhe-xi cuendá quèhéⁿ-xí, te diu-ni ducaⁿ nèhe-xi sá dùcúⁿ nchaa vehe càa ñúú-án. ¹⁷ Te dàtnùnì ní chícùhá-xi sá ñúhú dòco ñúú-án, te xiáⁿ néhé-xí ùnídico cúmì mètrú sá dùcúⁿ, te ní chícùhá-xi dàtná chícùhá cue ñáyiú ñuyúú-a.

¹⁸ Te sá ñúhú dòco-án ñí cuáha mee-ni yúú vãha yúú sã nání jãspé, te nihii ñúú-án cúú-xí mèe-ni díhúⁿ cuááⁿ, te càa datná cáá vîdriú sá ìo vãha càndoo te túu ndàa ìngá xio. ¹⁹ Te ndi ùxúú yúú cúú

cìmientú sá ñúhú dòco-áⁿ ndèé ndí dííⁿ núú yùú vii cãa sãtã-xi, te yúú díhna ndèé mee-ni yúú vãha sã nãní jãspé sãtã-xi, te yúú cúú ùú ndèé tucu ìngã núú yúú vãha sã nãní zãfirú sãtã-xi, te yúú cúú ùní ndèé tucu ìngã núú yúú vãha sã nãní ägatã sãtã-xi, te yúú cúú cùmí ndèé ìngã núú yúú vãha sã nãní èsmeraldã sãtã-xi. ²⁰ Te yúú cúú ùhúⁿ ndèé tucu ìngã núú yúú vãha sã nãní ònicé sãtã-xi, te yúú cúú ìñú ndèé tucu ìngã núú yúú vãha sã nãní còrnalínã sãtã-xi, te yúú cúú ùsã ndèé tucu ìngã núú yúú vãha sã nãní crìsòlitú sãtã-xi, te yúú cúú ùná ndèé tucu ìngã núú yúú vãha sã nãní bèrilú sãtã-xi, te yúú cúú ìíⁿ ndèé tucu ìngã núú yúú vãha sã nãní tòpacíú sãtã-xi, te yúú cúú ùxí ndèé tucu ìngã núú yúú vãha sã nãní crìsopásã sãtã-xi, te yúú cúú ùxí ìíⁿ ndèé tucu ìngã núú yúú vãha sã nãní jãcintú sãtã-xi, te yúú cúú ùxúú ndèé tucu ìngã núú yúú vãha sã nãní àmatístã sãtã-xi. ²¹ Te ndí ùxúú yuyèhe sã ñúhú dòco-áⁿ cúú-xí mèe-ni yúú vãha sã nãní pèrlã, te ndùu nií yúú cúú ìíⁿ ìíⁿ yuyèhe-áⁿ. Te tnuú cáhnú ndècu xití ñuú-áⁿ cúú-xí mèe-ni díhúⁿ cuàáⁿ, te cãa-xi datná cáá vídriú sã tũu ndãa ìngã xio.

²² Te ní xiní-í sã ñà túú vèhe núú chíñùhu ñáyíu Dútú Ndiõxí cáá ñuú-áⁿ, chí mee-nã Dútú Ndiõxí Yaá quídé nchãa-ndí túhú sã vãha ndècu ñuú-áⁿ, ndíhí Yaá cáá dàtnã cáá ìíⁿ mbéé quiti ní dánicuehé-güedé. ²³ Te ñuú-áⁿ ñà túú-gã xíní ñùhu-xi nchíanchii dayèhé-xi, te ni yóó ñà túú-gã xíní ñùhu-xi, chí mee-nã Yã Ndiõxí dáýèhé-gã ñuú-áⁿ ndíhí Yaá cáá dàtnã cáá ìíⁿ mbéé quiti ní dánicuehé-güedé. ²⁴ Te cue ñáyíu nchaa ñuú cáá ñùyíú, ñáyíu ní naníhí tàhú xíndecu ñuú-áⁿ

dáyèhé-gá núŷ-yu, te nchaa cue téé yìndaha ñaha xii-yu nèhe-güedé sá yíñùhu sá cúú-xí ñuú-áⁿ, te quide cahnu ñaha-güedé xii-gá. ²⁵ Te yuyèhe ñuú-áⁿ ñà túú tnàhí nàndedí, te ñuú-áⁿ ñà túú tnàhí cùndiquíⁿ. ²⁶ Te nchaa ñáyiu nèhé-yu sá yíñùhu sá cúú-xí ñuú-áⁿ te quide cahnú-yu Yá Ndiöxí. ²⁷ Te ñuú-áⁿ vǎ cúú cùndecu ni ñⁿ ñáyiu ndècu ichi cuehé ichi duha, te ni ñⁿ ñáyiu ndehnde, te ni ñⁿ ñáyiu quide sá ñà túú cùu váha iní Yǎ Ndiöxí vá cúú cùndecú-yu ñuú-áⁿ, chi mee-ni ñǎyiu naníhí tàhú ñáyiu yòdo tnuní núú tütú Yaá cáá dàtná cáá ñⁿ mbéé quiti ní dánċuèhé-güedé, mee-ni ñǎyiu-áⁿ cundecú-yu ñuú-áⁿ.

22

¹ Te sátá dúcáⁿ te diu-ni espíritú-áⁿ nǐ dánèhé núú ñáhá-xí xì-í yúte núú ñúhú ndùte candoo canine, te ndute-áⁿ candeca-xi iní ñáyiu ni caa ni quíhíⁿ, te ndute-áⁿ quée-xí mèi núú núcõo Yá Ndiöxí ndihí Yaá cáá dàtná cáá ñⁿ mbéé quiti ní dánċuèhé-güedé. ² Te cuádava tnuú cáhnú yǎha xití ñuú-áⁿ cáá yǔte-áⁿ, te xio xio yuhu yǔte-áⁿ níhnú yùtnu cuuⁿ sávidí-xi, te sávidí nchaa yutnu-áⁿ cúú tucu-xi sá cándèca iní ñáyiu ni caa ni quíhíⁿ, te nchaa yutnu-áⁿ cúúⁿ sǎvidí-xi úxúú xito ñⁿ cuíá chi ndi tnahá yóó cúúⁿ sǎvidí-xi, te nchaa ndaha-xi cùu-xi tátna sá cúú-xí nchàa ñáyiu. ³ Te vá yõo ñⁿ-gá cada ñⁿ sá ñà túú cùu váha iní Yǎ Ndiöxí ñuú-áⁿ. Chi ñuú-áⁿ núcõo mee Yá Ndiöxí ndihí Yaá cáá dàtná cáá ñⁿ mbéé quiti ní dánċuèhé-güedé xǐtaxi tnùní-gá, te nchaa ñáyiu xìnu cuechi núú-gǎ

cada càhnu ñahá-yu xii-gá. ⁴ Te nchaa ñáyi-u-án cundehe núu-yu Dútú Ndiöxí, te tneé-yu cundeé dèu-gá. ⁵ Te ñuú-án vǎ quìní-gá-yu niú, te ni vǎ cánèhe chiuⁿ-gá-yu ñuhú cutnùní núu-yu, te ni nchǎcanchii ñá túú-gǎ xíní ñùhu-xi dayehé ñuú-án chi mee Dútú Ndiöxí dáyèhé-gá, te ni caa ni quíhíⁿ cunúu-yu cundecú-yu ñuú-án.

Sa ta cùyatni nduu quixi tucu Xítóhó Jesucrístú

⁶ Te sátá dúcáⁿ te ní cachí tnúhu espíritú xínú cuèchi núú Yǎ Ndiöxí-án xii-í:

—Nchaandi túhú tnúhu-a cùu-xi mee-ni tnúhu ndáá cuíti. Te Yá Ndiöxí Yaá dácàhu iní nchaa cue téè càháⁿ tnúhu-gá nàcuáa càháⁿ-güedé ní tendaha-gǎ ìⁿ espíritú xínú cuèchi núú-gǎ ní quixi-xi ní dánèhé-xi nchaa ñáyi-u xínu cuechi núú-gǎ nchaa nàcuáa cada-gá, te vǎ cùyàa-gá ducaⁿ càda-gá —duha càchí espíritú-án.

⁷ Te ní càháⁿ Xítóhó Jesucrístú, te càchí-gá:

—ǰlo ndǎhi quixi tucu-í!

’ǰTe ío váha tnahá nchaa ñáyi-u tñì nchaa tnúhu càháⁿ Yǎ Ndiöxí yódó tnùní núú tütú-a! —duha càchí-gá.

⁸ Te yúhú té Juàá ní tecú dóho-í nchaa nàcuáa ní ngódó tnùní núú tütú-a, te ní xíní núu-í nchaa nàcuáa cada-xi ndéé cuèé-gá. Te sátá dúcáⁿ ñǎ cuu te ní ngüíñí xítì-í núú espíritú sá ñǎ dánèhé núú ñáhá nchaa xiǎⁿ cuëndá chiñuhu-ǎ-xi ni cùu. ⁹ Te ní cachí-xi:

—Vǎ dúcáⁿ càda-n, chi yúhú dìcò xínú cuèchi-í núú Yǎ Ndiöxí dàtná cúú yòhó ndihí nchaa dava-gá ñáyi-u ndècu ndihí-n ichi-gá càháⁿ-ndó tnúhu-gá, ndihí nchaa ñáyi-u tñì nchaa tnúhu ndéé núú

tùtú-a, te xíǎⁿ càchí-í sá vǎ dúcáⁿ càda-n, chi mee Yǎ Ndiǒxí ducaⁿ chĩñuhu-n-gá —càchí espíritú-áⁿ xii-í.

10 Te ní cachí tnúhu tucu-xi xii-í, te càchí-xi:

—Vá chídǎhu-n nì ìⁿ tnúhu Yá Ndiǒxí ndéé núú tùtú-a, chi sa ní cuyatni cada-xi nchaa nàcuáa ndéé tnuní. 11 Te dañá sǎ ncháá ñǎyiu ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dàña-n nchaa ñáyiu quìde nándi-gá nchaa sá cuèhé sá dúhá ná càda nahi-ní-yu nchaa sá cuèhé sá dúhá sàni iní-yu, te nchaa ñáyiu quìde váha te ducaⁿ-ni na càda váha-yu cundecú-yu, te nchaa ñáyiu quìde nchaa nacuáa cùu váha iní Yǎ Ndiǒxí te ñu-ni ducaⁿ na càdá-yu cundecú-yu —duha càchí espíritú-áⁿ.

12 Te ní cachí Xítohó Jesucrístú:

—Cundedóho-n tnúhu na càháⁿ-í-a. Ío ndĩhi quixi tucu-í, te canehe-í nchaa sá ndúú táhú ñáyiu quixi, te nàcuáa ndùu chiuⁿ ní quidé-yu ìⁿ ìⁿ-yu te ducaⁿ cùnduu sá cuǎñaha-ĩ nduu táhũ-yu. 13 Te yúhú cúu-í Yaá sa ndècu ndéé cútnàhá ní ngáva ñuyíú, te ñu-ni-í cundecu-í ni caa ni quíhíⁿ —duha càchí-gá.

14 Te váha táhú nchaa ñáyiu sa ní nduu ndoo ní nduu nine iní-xi, chi ñáyiu-áⁿ nĩ nduu táhũ-yu quíhu-yu xití ñuú-áⁿ, te caxí-yu sávídí yutnu nùtní-áⁿ te xíǎⁿ candeca-xi iní-yu ni caa ni quíhíⁿ.

15 Te ñuú-áⁿ vǎ cúu quíhu ni ìⁿ ñáyiu ndècu ichi cuehé ichi duha, ni cuè ñáyiu quìde nduu, te ni cuè ñáyiu ndècu ichi díí ìní, te ni cuè ñáyiu sàhni tnaha ñáyiu-xi, te ni cuè ñáyiu chĩñuhu nchaa sá nĩ cadúha cue téé ñuyíú-a càchí-yu cùu ndiǒxí, te ni cuè ñáyiu

tnàhá iní dacuàndehnde, te ni ìⁿ ñáyiú ducaⁿ xǐquide vǎ ndúú tǎhǔ-yu quǐhu-yu xití ñuú-áⁿ.

16 Te ní cáháⁿ tucu Xítóhó Jesucrístú, te cǎchí-gá:

—Yúhú Xítóhó Jesucrístú ní tendaha-í espíritú xínú cuèchi núù-í cuendá cachí tnúhu-xi xii-n nàcuáa ndúu tnúhu cúñaha-n xii nchaa ñáyiú ndècu ndihí-n ichi-í dǎcuàha tnúhu-í ìⁿ ìⁿ ñuú. Te yúhú cúù-í mei ñàní tnàhá ndíi Dáví, te cada iní-n sǎ cúù-í dàtná ìⁿ chódíní quití quène datnee —duha cǎchí-gá.

17 Te nchaa ñáyiú cùu cuendá Xítóhó Jesucrístú Yaá cáá dàtná cáá ìⁿ mbéé quití ní dánícuèhé-güedé, diu-ni ñáyiú-áⁿ cúù-yu ñáyiú cada iní-ó sǎ cúù-yu ìⁿ ñadhí xíchí tnǎndaha ndihí ñaha xii-gá, te ñáyiú-áⁿ ìⁿ-ni cǎháⁿ-yu ndihí Espíritú Yǎ Ndiǒxí, te xǎhǎⁿ-yu ndihí Espíritú-gá xii nchaa dava-gá ñáyiú:

—Chí táquixi —cachí-yu xǎhǎⁿ-yu ndihí Espíritú Yǎ Ndiǒxí.

Te nchaa ñáyiú ducaⁿ ndèdóho tnúhu-áⁿ vitna, te xini ñuhu-xi ducaⁿ cáháⁿ-yu tnàhá-yu cúñàhá-yu xii nchaa dava-gá ñáyiú-áⁿ, te nchaa ñáyiú cuení tuha ichi-gá te na quixí-yu, te dìcò ducaⁿ cùu tǎhǔ-yu sǎ cándèca iní-yu ni caa ni quíhíⁿ.

18 Te nchaa nchòhó ñáyiú ndèdóho nchaa nàcuáa cǎháⁿ tnúhu Yá Ndiǒxí ndéé núú tütú-a cǎháⁿ-í dóho-ndo. Te núu ìⁿ ñáyiú na còdo-gá tnúhu chido tnùní-yu núú tütú-a, te Yá Ndiǒxí ío dandòho ñaha-gá xii-yu chí yáha-yu nchaa tnúndòho yodo tnuní núú tütú-a te núu ducaⁿ na càdá-yu. 19 Te núu ìⁿ ñáyiú na chidáhu dava tnúhu Yá Ndiǒxí ndéé núú tütú-a te ñáyiú-áⁿ vǎ ndúú tǎhǔ-yu cundecú-yu

ñuú-gá, te ni vǎ ndúú tǎhǔ-yu sá cándèca iní-yu ni
caa ni quíhíⁿ dàtná yódó tnùní núú tütú-a.

²⁰ Te Xítóhó Jesucristú Yaá càháⁿ sá ncháá
tnǔhu-a cùu-xi tnúhu ndáá ní cáháⁿ-gá ní tecú
dóho-í, te càchí-gá:

—Ndáá sá ío ndǐhí quixi tucu-í —duha càchí-gá.

Te yúhú ní xáhaⁿ-ǐ xii-gá:

—Ducaⁿ na cùnduu, taquìxi yohó Xítóhó Jesu-
cristú —duha ní xáhaⁿ-ǐ xii-gá.

²¹ Te Xítóhó Jesucristú ío na chìndee chitúu
ñaha-gǎ xii-ndo nchàa-ndo. Te ducaⁿ na cùnduu. Te
íó chí cádá ndèe iní-nǎ vitna.

Tnúhu ní cáháⁿ yǎ ndiǒxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939